

**BOSNA I HERCEGOVINA  
FEDERACIJA BOSNE I HERCEGOVINE  
Tuzlanski kanton  
GRAD TUZLA  
GRADSKO VIJEĆE**

# **S T E N O G R A M**

**S TRINAESTE SJEDNICE GRADSKOG VIJEĆA TUZLA ODRŽANE 31.  
MARTA 2022. GODINE U POSLOVNOM OBJEKTU „GRAFIČAR“ S POČETKOM  
U 10 SATI**

**- SJEDNICI PRISUSTVUJE 31 VIJEĆNIK**

**U Tuzli, mart 2022. godine**

## **NATAŠA PERIĆ – predsjedavajući Gradskog vijeća Tuzla**

Pozivam vijećnike da uđu u salu da počnemo sa radom. Molim vijećnike da zauzmu svoja mjesta. Molim vijećnike da sjednu na svoja mjesta već kasnimo. Počni.

(Intoniranje himne Bosne i Hercegovine.) Poštovani vijećnici Gradskog vijeća Tuzla, obrađivači materijala, predstavnici medija, otvaram 13. redovnu sjednicu Gradskog vijeća.

Konstatujem, da prema evidenciji Stručne službe Gradskog vijeća, sjednici prisustvuje 30 od ukupnog broja vijećnika. Svoje kašnjenje je najavio vijećnik Zijah Rifatbegović i predlažem da mu uvažimo njegov zahtjev.

Obavještavam vijećnike da su Sabiha Mujkanović Mujačić, Lejla Osmančević i Omer Delalić vijećnici u Gradskom vijeću Tuzla 11. 03. 2022. dostavili obavijest predsjedavajućoj Gradskog vijeća Tuzla da od 11. 03. nisu članovi Saveza za bolju budućnost da napuštaju Klub vijećnika SBB-a u Gradskom vijeću Tuzla, te da će do kraja mandata nastupati kao samostalni vijećnici u Gradskom vijeću Tuzla kao i da su formirali Klub samostalnih vijećnika te da će funkciju predsjednika Kluba obavljati Omer Delalić.

Podsjećam vijećnike da su, uz materijale za današnju sjednicu, dobili i Zapisnik, a svaki Klub vijećnika i stenogram sa 12. redovne sjednice Gradskog vijeća Tuzla, održane 23. 02. 2022. godine.

Da li ima primjedbi na Zapisnik? Niko se ne javlja.

Ako nema, stavljam na izjašnjavanje Zapisnik sa 12. redovne sjednice. Molim vijećnike da se izjasne. Glasanje je okončano.

Konstatujem da je 30 vijećnika glasalo za Zapisnik sa 12. redovne sjednice i tako da je zapisnik usvojen.

Za današnju redovnu sjednicu Gradskog vijeća Tuzla predlažem dnevni red koji ste dobili u materijalu za sjednicu.

Omer Berbić, vijećnik Naše stranke, je predložio da se u dnevni red 13. redovne sjednice Gradskog vijeća Tuzla uvrste sljedeće tačke dnevnog reda:

Pod jedan: Informacija o presudi Ustavnog suda u korist Islamske zajednice povodom prodaje vakufskog zemljišta.

Hoćete obrazložiti? (vijećnik Omer Berbić govori s mjesta bez mikrofona op.a.) Dobro poslali ste. (SLAĐANA KRAJINA – Pa ima treba pročitati samo piše ti tu.) Aha. Vijećnik Berbić je u međuvremenu dostavio obavijest da odustaje od ovog prijedloga. (SLAĐANA KRAJINA – Sva tri. Tri su prijedloga zajedno dostavljena pa onda odustaje.) Aha. Dobro dakle, vijećnik je još dvije zatražio dopune dnevnog reda a druga je: Informacija je o izborima u mjesnim zajednicama i Informacija o radovima na stadionu „Tušanj“.

Vijećnik Berbić je u međuvremenu obavijestio da odustaje od prve tačke dnevnog reda koja, dopune koja se odnosi na Informaciju o presudi Ustavnog suda u korist Islamske zajednice povodom prodaje vakufskog zemljišta.

Drugi prijedlog za dopunu je:

- Informacija o izborima u mjesnim zajednicama pa evo Omere ako možete da ukratko obrazložite svoj prijedlog prije glasanja?

### **OMER BERBIĆ – vijećnik Naše stranke**

Hvala ljepo. Pa kao što se zna mi smo u Budžetu odvojili dobar dio sredstava za izbore u mjesne zajednice. Od tada do sada nemamo nikakve informacije kada bi se izbori u mjesnim zajednicama mogli desiti. Prema nekim neformalnim informacijama koje smo dobili iz Gradske uprave izbori za mjesne zajednice nisu planirani ove godine čime bi mi kršili Statut Grada kojeg smo donijeli ove godine što ja mislim da sebi ne smijemo dopustiti ni u kom slučaju.

Tako da bih ja volio evo da nam nadležna služba objasni dokle je došlo sa prijedlogom za izbore u mjesnim zajednicama, da li su počeli bilo kakvi radovi na tom polju i kada bi eventualno u kojem mjesecu mi mogli očekivati da će biti izbori u mjesnim zajednicama s obzirom da se mi svi ovdje moramo je li pripremiti za iste?

Tako da evo nek to ne bude neka duga tačka dnevnog reda, ali bi voljeo da nam služba generalno da ove informacije koje mi nemamo. Hvala ljepo.

### **NATAŠA PERIĆ**

Ovo možete samo na Kolegiju tražiti. Prvo na kolegij da ide pa onda...(MENSUR ALIĆ – Ja se izvinjavam.)

### **OMER BERBIĆ**

Ne izvinite imam ja po Poslovniku pravo.

### **NATAŠA PERIĆ**

Pa imate pravo ali kažem, mislim obzirom da je 48 sati ovaj mal, mali period za sačinjavanje informacije. Izvolite Mensure.

### **MENSUR ALIĆ – vijećnik Tuzlanske alternative**

Pozdravljam sve prisutne. (NATAŠA PERIĆ – Imate pravo.) Ja bih zamolio kolegu Omera da jednu od pauza kad bude da odustane sad od tačke ovog dnevnog reda, a da u pauzi Kolegij donese zaključak i da dostavi službama da dostavi informaciju o ovome. Mislim da bi to najbolje bilo da ne raspravljamo danas na Vijeću ako se složi kolega oko toga. (NATAŠA PERIĆ – Jel ostajete?) Mislim Kolegij možemo. Možemo Kolegij odmah i zakazat posle prve tačke odmah. (NATAŠA PERIĆ – Dobro.) Otić pet minuta i takav zaključak donijeti. Zahvaljujem.

### **NATAŠA PERIĆ**

Izvolite.

### **OMER BERBIĆ**

Okej, okej može. Evo odustajem od ove tačke dnevnog reda. (NATAŠA PERIĆ – Dobro.) Tako da evo nadam se da ćemo dobiti informaciju do idućeg Kolegija dokle, dokle je došlo sa ovim. Hvala.

**NATAŠA PERIĆ**

Pa to. Nato sam i ja mislila. Ništa imate vi još jedan prijedlog to je: Informacija o radovima na stadionu Tušanj. Izvolite.

**OMER BERBIĆ**

Pa ništa pošto sam u međuvremenu vidio neke slike itd. na fejbuku da se na stadionu „Tušanj“ rade određeni dijelovi, također sam evo i kontaktirao našeg kolegu koji tamo radi i dobio sam informaciju da će biti stvarno dobrih, dobrih nekih stvari na stadionu „Tušanj“.

Mislim da bi bilo dobro da dobijemo informacije da neki zajednički zaključak u ovom dijelu napravimo jer stadion „Tušanj“ je u zadnjih tri-četiri mjeseca pretrpio ogromne kritike što se tiče trave, što se tiče infrastrukture.

Mislim da bi bilo dobro evo da obavijestimo ljude da su počeli radovi i da očekujemo radove na tom tom i tom dijelu stadiona „Tušanj“ u iduća tri mjeseca i da će se on dovesti u neko infrastrukturno stanje koje on zaslužuje.

**NATAŠA PERIĆ**

U redu ovaj Vijećnik Mensur Alić opet. Izvolite.

**MENSUR ALIĆ**

Evo ja bih opet kolegu zamolio da isto to zajedno uradimo. Evo ja bih odmah posle usvajanja dnevnog reda Kolegij da zasjedne i da donese takav zaključak da tražimo informaciju da se dostavi. (NATAŠA PERIĆ – Za narednu sjednicu.) Jeste. Ako pristaje naravno Omer.

**NATAŠA PERIĆ**

Može. Može. U redu. Znači odustajete i od ove tačke?

**OMER BERBIĆ**

Imam ja jednu tačku koja bi trebala da ide po hitnom postupku.

**NATAŠA PERIĆ**

To nismo još dotle došli. (OMER BERBIĆ - Kad dođemo samo da znate.) Dobro dobro ima još. Dobro. U redu.

Admir Čavalić vijećnik Stranke za Bosnu i Hercegovinu je predložio da se u dnevni red 13. redovne sjednice uvrste sljedeće tačke:

1. Usvajanje zaključka o podršci Republici Ukrajini i narodu Ukrajine.
2. Informacija o izvještajima članova nadzornih odbora u javnim ustanovama i javnim preduzećima Grada Tuzla i
3. Informacija o prihvatanju apelacije Ustavnog suda Bosne i Hercegovine koja se odnosi na problem zaštite imovine vakufa Gazi Turali-begove džamije u Tuzli. Izvolite vijećniče Čavaliću.

## **ADMIR ČAVALIĆ – vijećnik Stranke za Bosnu i Hercegovinu**

Hvala vam puno predsjedavajuća. Ja ću iskoristiti ovo vrijeme da obrazložim neke od ovih prijedloga i da objasnim zašto bih eventualno odustao od određenih.

Dakle, prije svega usvajanje zaključka o podršci Republici Ukrajini i narodu Ukrajine smatram da Gradsko vijeće Grada Tuzla po uzoru i na ostala dakle Gradska vijeća i Opštinska vijeća širom Bosne i Hercegovine koja su donijela i ove zaključke ili deklaracije i sl. treba danas dakle da iskaže podršku narodu Ukrajine. Razumijemo da to neće ništa značajno doprinjeti na geopolitičkom planu ali bitno je da se odredimo da znamo dakle na kojoj smo strani historije na onoj pravoj strani historije. I mislim da se ovo naslanja prirodno dakle, na onaj skup koji je organizovan u Tuzli i čestitam za organizaciju datog skupa dakle, u organizaciji naše izvršne vlasti. Evo sada predstavnička vlast, odnosno Gradsko vijeće Grada Tuzla treba da doprinese i da takođe izrazi podršku narodu Ukrajine.

To je prvi zahtjev (NATAŠA PERIĆ – Prijedlog.) odnosno prijedlog za dopunu dnevnog reda.

Što se tiče drugog. Informacija o izvješ... (NATAŠA PERIĆ – Pa de da se odmah izjasnimo za prvi?) Može.

### **NATAŠA PERIĆ**

Stavljam na glasanje. Nusrete? Šefik? Glasanje je okončano.

Konstatujem da je prijedlog vijećnika Admira Čavalića da se uvrsti tačka pod nazivom: USVAJANJE ZAKLJUČKA O PODRŠCI REPUBLICI UKRAJINI I NARODU UKRAJINE usvojen sa,

30 glasova za, niko nije bio protiv i nije bilo suzdržanih.

Sada drugi prijedlog. Hoćete obrazložiti?

### **ADMIR ČAVALIĆ**

Dobro hvala. Informacija o izvještajima članova nadzornih odbora u JU i JP Grada Tuzla.

Vi se sjećate da sam ja i prošle godine pretočio onu Uredbu na nivou Kantona i mi smo kao Kolegij donijeli zaključak da dobijamo svaka tri mjeseca izvještaje predstavnika, odnosno članova nadzornih odbora sa područja Grada Tuzla. Nažalost to se nije dešavalo. Ja sam razgovarao ranije sa kolegama vijećnicima i mislim da je, možemo to elegantnije uraditi danas i evo ja bi odustao od ove tačke dnevnog reda uz uvjet da predlažem zaključak koji treba Gradsko vijeće da donese da ubuduće dakle, svaka tri mjeseca mi dobivamo kao vijećnici na naše imeil adrese ovu informaciju da ne ide u dnevni red dakle, o njoj se neće raspravljati, već samo svaka tri mjeseca da dobijamo izvještaje nadzornih odbora sa područja našeg Grada košto je definisano Kantonalnom uredbom.

A na kraju sumirano dakle, kada dođu godišnji izvještaji JU i JP onda da dobijemo dakle, sumirano pregled svih tih izvještaja članova nadzornih odbora. (NATAŠA PERIĆ – U redu.) Tako da odustajem od tačke dnevnog reda i predlažem ovaj zaključak.

### **NATAŠA PERIĆ**

Vijećnik Mensur Alić. Izvolite. De samo Admire molim te.

## **MENSUR ALIĆ**

Ja bih takođe kolegu zamolio da to i dogovarali smo malo prije da to idemo isto na (NATAŠA PERIĆ – Kolegij) Kolegij i da zajedno donesemo zaključak sa ovim, sa ova dva već koja imamo. To bi treći bio zaključak (NATAŠA PERIĆ – Dobro.) na Kolegiju (NATAŠA PERIĆ – Dobro.) ako se slaže. A slaže se.

## **NATAŠA PERIĆ**

Slažemo se. Dobro. I treći prijedlog.

## **ADMIR ČAVALIĆ**

Treći prijedlog dakle, odustajem od ove tačke dnevnog reda zato što sam ranije naveo ako dobijemo do sjednice Gradskog vijeća Grada Tuzla informaciju o tome šta se dešava po pitanju apelacije Ustavnom sudu Bosne i Hercegovine u vezi zaštite imovine na Brčanskoj Malti onda ću odustat odustajem od te tačke dnevnog reda. Hvala.

## **NATAŠA PERIĆ**

U redu hvala. Vijećnik Nikica Vidović vijećnik Hrvatske demokratske zajednice Bosne i Hercegovine HDZ Bosne i Hercegovine je predložio da se u dnevni red 13. redovne sjednice Gradskog vijeća uvrsti tačka pod nazivom:

Novo imenovanje članova savjeta mjesne zajednice i razrješenje članova savjeta mjesnih zajednica zbog promjenjenih okolnosti a do provedbe izbora u mjesnim zajednicama. Vijećniče Vidoviću izvolite.

## **NIKICA VIDOVIĆ - vijećnik Hrvatske demokratske zajednice BiH**

Dobar dan. Ja vas sve srdačno pozdravljam predsjedavajuću, zamjenika predsjedavajuće, naravno sve kolege, kolegice, medije i sve one koji će sada ili kasnije pratit ovu sjednicu Gradskog vijeća.

Pa ovo je upućeno u suštini od Gradskog odbora jel ovo manje više je poznato da mi nismo i da nismo zadovoljni i da smo oštećena strana.

Onaj događaj ili ono biranje što ste vi i evo i ja sam ponovo to dao kao prilog raspored članova savjeta mislim da ne odgovara prvo političkim subjektima koji su bili s početka mandata, a evo lagano, mislim kratko ću obrazložiti. Znači, uopće ne ulazim u sadržaj i neću i to nije ni moje ko je subjekt i sve to, nego ponovo ću podvući da želim ono što je stanovništvo izabralo i ono što je bilo na izborima da se to ispoštuje. To je evo ukratko objašnjeno. Mislim da ja ne moram to nešto opširno elaborirati.

Ja sam ovdje pod dva mislim pravni, pravno smo pokušali i da gradonačelnik da svoje mišljenje na koji sam ja već prije sedam-osam mjeseci pisao nešto slično. Naravno nisam dobio odgovor i evo čekam još jedno mjesec-dva da istekne da mogu ponovo govoriti o statutu i svemu tome pa ću ponovo podnijeti neke inicijative.

Smatram da mi trebamo izvršiti reset ovih imenovanja i da se imenuje po novim novim okolnostima. Naravno i tad im nije bilo ispravno a sad smatram da potpuno ne odražava volju stanovništva i vjerujem da i vi a i mi moramo ovo dovesti ponovo na stol i da se usaglasimo i da se imenuje do izbora.

Evo ja sam neki dan i u medijima reko ja mislim osobno da par godina neće biti izbori, ali do tada se mora ispoštovati volja stanovništva i mora se zadovoljiti politički subjekti i ljudi koji su glasovali na izborima 2020-te godine.

Evo toliko i smatram da bi trebalo uvrstiti ovu točku, raspravljati o njoj, donjeti neki ozbiljan zaključak. Poslije sjesti za stol i ispoštovati ponoviti ću volju naših evo glasača koji su bili na izborima. Mislim da to nije nešto što je sporno i treba razgovarati. Ako u ovom slučaju ne može ja sam i vijećničku inicijativu na sličan način promijenio i podnio i želim želim neki pravni odgovor jel ga nisam dobio već sedam- osam mjeseci.

Ali evo pozivam sve nas koji sudjelujemo u Vijeću da sjednemo za stol i da se ovo riješi jel mislim da ovaj način da se biraju savjeti po ne znam kojoj formuli. Ovo više nema nikakvog pravnog, državnog, nikakvog drugog utemeljenja nego da se po nekakvim mišićima daju imena i montiraju po mjesne zajednice. Ja smatram da naši stanovnici Tuzle to nisu zaslužili i nisu zaslužili ni gradska većina ni mi trideset i jedan vijećnik da takve stvari podržavamo.

Evo ja vas pozivam da se vratimo za stol da uradimo najbolje rješenje i da ga ovdje svi zajedno podržimo, da usaglasimo i da to traje i naravno sa tendencijom da čim prije napravimo izbore u mjesnim zajednicama. Ja iskreno ne vidim da će se to dogoditi ali evo ja, evo zamolbu. Evo zamolba da se sjedne i da se do sljedeće sjednice usaglasi jel vi ste vidjeli i u ovom materijalu. Ja nemam ništa protiv ko kako predlaže i ja ne mogu prihvatiti 12 imena kao politički subjekt koji je dobio i te glasove i taj tu volju birača.

Eto toliko hvala i ja bih vas zamolio da ovo uvrstimo ili da nađemo neko, naravno da nađemo neko rješenje. Ponavljam ja sam vijećničku inicijativu na koju smatram da trebam dobiti odgovor i obrazloženje ili vi sigurno i s tim ću završiti znate da je bilo pravnih i svakih drugih propusta. Mi smo se kao HDZ izuzetno korektno ponašali. Nisam, evo i ja osobno htio ni one prijave podnositi zato što bi od službi evo gospođa Krajina i neko bi dobio prijavu, gradonačelnik i mnogi ljudi koji su u ovome sudjelovali ili oni ravnatelji koji nisu sudjelovali nego su dobili naređenje kako da to izračunaju ne bi ništa odgovarali. Evo ja sam samo iz tog nekog razloga korektnosti prema gospođi koja nema i funkcijama tim u službi nemaju veze s tim nisam to podnio, ali vrlo rad sam to uraditi jel imam i pritisak svog političkog subjekta i moji ljudi koji sjede i koji odlučuju smatraju da ovo treba već zakonski potjerati i možda sam ja pogriješio što nisam to uradio. Toliko i hvala.

**NATAŠA PERIĆ**

Hvala. Vijećnik Mensur Alić.

**MENSUR ALIĆ**

Slažem se sa kolegom Nikicom da treba ovdje nešto uraditi i da je vrijeme da ovaj dio popravimo ako je bilo greški bilo kakvih i predlažem da za sljedeće Vijeće kolega predloži članove savjeta i predsjednike gdje ga sleduju pa nek Vijeće odluči ovdje.

Ja ne bih pravio nikakve velike sastanke. Nećemo se dogovoriti. Ponovo ćemo izgubiti vrijeme to on dobro zna da će tako biti. Zna i Nikica da to nećemo na sastancima riješiti, da predloži a da Vijeće i Kolegij prije toga samo sjede i Kolegij vidi jel to to gdje treba izvršiti zamjene i gdje treba on da predloži svoje kandidate smatrajući onoliko da ne bude samo previše nego da bude normalno koliko ga sleduje.

Ja mislim da će se složiti u potpunosti da ne lutamo. I mislim da to konačno možemo na sljedećem Vijeću donjeti takvu takvu odluku. Zahvaljujem.

**NATAŠA PERIĆ**

Vijećnik Nikica Vidović.

**NIKICA VIDOVIĆ**

Evo ja ću kratku repliku. Ako je to povod da ono ja dam 12 imena vi usvojite to ne dolazi u obzir, a ako je povod da ja dam mjesta koja mislim da smo osvojili, a vi ne podržite i to nije uredu.

Naravno da je velik problem sad i pregovarati s kime, s političkim subjektima da, sa onima koji su dobili glasove od birača to da, ali ova trgovina je da neko svoje kao član Gradskog vijeća, kao vijećnik svojim ne znam Komisijama ili svojim nekim članovima u savjetima trguje mislim da to nije uredu.

A isto tako ja ne mogu prihvatiti da je. Evo neću navoditi ni jedan primjer ali da x-y mjesto zauzme x-y osoba. Znači, x-y mjesto koje je meni oteto možda može biti oteto i donekle od političkog subjekta ali od nekih od običnog mislim od imena i prezimena mislim da nije uredu. Smatram i ne govorim ni za jedan politički subjekt nemojte me uopće me to...Vi znate da je moj stav da tu stranka treba dobit i vratit joj se sve. Neću ulaziti uopće me to i nemojte mi to pripisivati ja tražim samo ono što je HDZ dobio da se ispoštuje voljan sam, ali mislim da se treba razgovarati jer napomenut ću da prošli put je donešeno papiri i usvojeno ovdje na mišiće znači nije se ni razgovaralo, nije se ni jedna procedura...Uvijek se šesnesta, dvanesta, osma se barem razgovaralo ovaj put ste donijeli knjigu koju ste na silu usvojili. Znači, to nije nije to parlamentarna demokracija i ja ne mogu govoriti ni do 31. 03. mi smo svjesni da je ovo izašlo iz svih okvira parlamentarne demokracije i onih poslovnika koji definitivno važe samo u Tuzli. Hvala.

**NATAŠA PERIĆ**

U redu. Replika. Mensur Alić.

**MENSUR ALIĆ**

Ma ispravka krivog navoda. (NATAŠA PERIĆ – Aha ispravka krivog navoda.)

Ja nisam mislio uopšte na dvanaest i nisam spominjao dvanaest mislim da me kolega pogrešno razumio. Ja želim da razriješimo ovaj problem na obostrano zadovoljstvo. Nisam mislio uopšte na dvanaest i ne želim o tome o brojevima razgovarati uopšte. (NATAŠA PERIĆ – Dobro.) Zbog toga mislim da nije, nije korektno. Ja predlažem neko rješenje dobro, a onda dobijem ovakav odgovor. Mislim da to nije korektno. Onda mogu odustati od toga u potpunosti da se ne miješam u taj dio. (NATAŠA PERIĆ – Dobro.) Al sam kao vijećnik i kao građanin htio da pomognem da se ovo, ovaj problem riješi. Zahvaljujem.

**NATAŠA PERIĆ**

U redu. Stavljam na izjašnjenja... Samo malo. Recite. (NIKICA VIDOVIĆ – Ispravka krivog navoda.) Pa za mikrofonom. Molim vas.

**NIKICA VIDOVIĆ**

Samo ispravku. Onda sam. Mislim isprika je. Ja nisam ja vjerujem da sam bio korektan i stvarno nisam bio protiv nikoga ovdje. Smatram ako je to neki korektan broj, ali mislim u



svakom slučaju da se treba prije toga razgovarati. Ja neću što bi to mladalački rekli ovdje ljudi da se provaljujem. Dolazim iz jednog ozbiljnog političkog subjekta i mislim da se samnom i sa, treba se razgovarati da dođem normalno i da se kaže košto se i onda moglo reći nećete dobi i to je to.

Ja sam samo tražio da se bude korektni odnos i naravno za dvanaest neću ni predavat. Evo godinu i po mi smo izgubili ono što smo izgubili. Izgubili smo ja sam vam govorio u dva mandata jedan čitav mandat. Znači, nije nam do novca nije nam ni do čeg. Bitno nam je da nam ljudi koji su birani moraju biti u savjetu gdje su birani to je poenta. (NATAŠA PERIĆ – Hvala.) Hvala vam i ispričavam se ako sam koga osobno uvrijedio nema nikakve veze s tim. Hvala.

## **NATAŠA PERIĆ**

U redu, u redu. Vijećnica Esana Kavazbašić.

### **ESANA KAVAZBAŠIĆ HUSKANOVIĆ – vijećnik Platforme za progres**

Dobar dan svima. Ja samo želim reći da mi u potpunosti podržavamo kolegu Nikicu Vidovića jer otprilike ista sudbina je znači obuhvatila i Platformu za progres što se tiče imenovanja članova mjesnih zajednica.

Mi smo isto tog stava da bi se trebali održati izbori i da bi se trebali imenovanja vršiti prema broju glasova koji smo osvojili na izborima i da bi to bio jedini fer odnos, a ne da se kao dosadašnje... Da se ispunjavaju dosadašnje procedure prema kojima se prema dogovoru znači postavljali ljudi na određena mjesta a što smatram da nije uopšte u redu. Toliko od nas.

## **NATAŠA PERIĆ**

Dobro. Hvala.

Stavljam na izjašnjavanje prijedlog vijećnika Nikice Vidovića. Molim da se vijećnici izjasne. (Pogriješio sam Nataša.) Molim? (Pogriješio sam.) Poništavam glasanje. Molim vijećnike ponovo da se izjasne. Dakle, 1 je za, 2 protiv, 3 suzdržan. (Ponovi.) Molim? (Ponovi ponovo.) Poništavam glasanje. Molim malo koncentracije vijećnike da se izjasne ponovo.

Konstatujem da prijedlog vijećnika Nikice Vidovića za dopunu dnevnog reda nije dobio potrebnu većinu,

9 vijećnika je glasalo za, niko nije bio protiv i 21 suzdržan.

Klubovi vijećnika parlamentarne većine u Gradskom vijeću se pozivaju na član 61. stav 4. gdje stoji: Izuzetno ako postoji opasnost po život, zdravlje i imovinu na području Grada Tuzle i ako bi ne donošenjem odluka ili zaključaka od strane Gradskog vijeća nastupila šteta po Grad Tuzlu klubovi vijećnika ili gradonačelnik mogu tražiti izmjenu i dopunu dnevnog reda na samoj sjednici pod uvjetom da predoče činjenice i okolnosti koje opravdavaju takve postupke.

Klubovi vijećnika parlamentarne većine traže da se u dnevni red današnje sjednice Gradskog vijeća uvrsti tačka pod nazivom: ZAHTJEV GRADSKOG VIJEĆA TUZLA ZA STRIKTNO POŠTIVANJE REZOLUCIJE ZAKLJUČAKA VIJEĆA O ODBIJANJU SKLADIŠTENJA PRIRODNOG GASA U ISKORIŠTENIM KOMORAMA RUDNIKA SOLI „TETIMA“.

Kao što znate ovih dana se ponovo aktuelizira ideja koja ima svoje trajanje već tridesetak godina o skladištenju prirodnog gasa u napuštenim komorama Rudnika soli

„Tetima“ od strane pojedinaca iz energetskog sektora Bosne i Hercegovine koji za to traže podršku vlasti.

Gradonačelnik Imamović i Gradsko vijeće Tuzla su 2016. i 2017. čini mi se donijeli rezoluciju 2016-te i jedan zaključak 2017-te gdje je Vijeće jednoglasno donijelo Rezoluciju i određene zaključke u kojima se protive skladištenju gasa u komorama Rudnika soli „Tetima“ i iz tog razloga obzirom da ovo može ugroziti grad tražimo da se na današnjoj sjednici uvrsti ova tačka dnevnog reda pod brojem tri. (ADMIR ČAVALIĆ – Poslovnička.) Poslovnička. Izvolite.

### **ADMIR ČAVALIĆ**

Dakle, shodno članu 61. stav 4. vi morate predočiti nama jasne dokaze da je nešto došlo, da se nešto desilo što zaista kreira vanrednu situaciju. Ja ne vidim ovdje nikakve dokaze i pazite evo čak i da uzmemo medijske natpise kao dokaze, a nisu dokazi. Možete li nam molim vas dostaviti eto to ja nisam nigdje ni, koji pojedinci nisam pročitao ili pazite. Vanredna situacija bi bila u smislu zaista da neko od institucija sa Kantonalnog, Federalnog, Državnog nivoa nešto uradi, donese neki akt bilo šta po ovom pitanju. Dakle, molim vas da ne zloupotrebjavamo Poslovnik jer nije se nikakva vanredna situacija desila.

Dakle, možda će sutra neki drugi pojedinac opet nešto napisati. Možda neko na tviteru na fejbuku itd. ali mi ko Gradsko vijeće sad treba da proglašavamo vanrednu situaciju. (NATAŠA PERIĆ – Pa mi ne proglašavamo vanrednu situaciju. Mi hoćemo preventivno da djelujemo, jer za dan dva može doći do realizacije.) Ali nije došlo. (NATAŠA PERIĆ – Pa ne znate.) Ne, ne. Pa ne znam. Evo vidte...

### **NATAŠA PERIĆ**

Ja mislim dovoljno da se pojavilo u javnosti da je dovoljan razlog da reagujemo ponovo, a nije slučajno da su mediji objavili i više medija. (ADMIR ČAVALIĆ – Pazite.) I mislim da ovim želimo da zaštitimo naše građane i ne znam da iko ovdje bi trebao da bude protiv ovog prijedloga. Jer vijećnici u prethodnim mandatima su jednoglasno znači, nije se postavljalo pitanje uopšte. I tada se u medijima pojavila ova informacija i mi smo reagovali isto kao što ćemo i danas reagovati. Prema tome ovdje nije nikakva zloupotreba Poslovnika Gradskog vijeća.

### **ADMIR ČAVALIĆ**

Jel mogu nastaviti? Mogul nastaviti? (NATAŠA PERIĆ – Možete.) E hvala vam puno. Pazite vi ste sad u vašem izlaganju naveli da se nije pojavila vanredna situacija. Stenogram postoji dakle, ali da se možda može pojaviti za par dana ali da nije nastupila nikakva vanredna situacija što znači automatski sami sebe ste pobili u vašem zahtjevu jer ste rekli da nije došlo do vanredne situacije.

### **NATAŠA PERIĆ**

Ali isto tako piše izuzetno ako postoji opasnost po život, zdravlje i imovinu na području grada Tuzle. Prema tome pozivam se na ovo. (ADMIR ČAVALIĆ – Ako mogu nastaviti?) I privodite kraju svoju diskusiju.

## **ADMIR ČAVALIĆ**

Pa ne možete me prekidati i onda tražiti da privodim kraju. (NATAŠA PERIĆ – Pa privodite kraju.) Jel mogu dobit garanciju da me nećete prekidati? (NATAŠA PERIĆ – Možete. Neću, neću.) i nešto ste stvarno...Pazite trenutno evo vraćamo se na opasnost. Ako postoji opasnost. Molim vas tražim da mi kao Gradskom vijećniku i nama kao Gradskom vijeću dostavite dokaz da postoji nekakva opasnost da se nešto u proteklih nekoliko dana desilo, jer ja zaista ne znam ni šta se desilo, šta se promijenilo, i nemojte da to je zloupotreba poslovnika i generalno dnevnog reda. Dakle, dajte pretočite napismeno možemo li dobit napismeno šta se desilo evo? Šta se desilo? Ja vas pitam šta se desilo, jel mi može neko odgovorit šta se konkretno desilo? Eto.

## **NATAŠA PERIĆ**

Vijećnik Hasib Hirkić. Izvolite. (OMER BERBIĆ – Izvinjavam se ja sam se javio prije.) Aha izvinjavam se. Vijećnik Omer Berbić. Izvolite, pa onda vijećnik Hirkić, pa Muratović.

## **OMER BERBIĆ**

Hvala ljepo. A ovo je isto kao da sam ja na njuz.net pročitao da će meteor udarit u Tuzlu i da ja sad tražim po članu 61. Pa mislim da je to stvarno apsurd da se ne treba izigravat na neke politike, da se ne mora ovako grubo kršiti Poslovnik. A uopšte neću da ulazim u meritum toga o čemu vi pričate.

Ja znam pitanje je skladištenja gasa i ovo ostalo. To je bilo pitanje kada su se opet neki natpisi pojavili da bi se možda Selim Bešlagić mogao kandidovati za gradonačelnika opet protiv Jasmina pa je to bilo pitanje neke privatne osvete.

Molim vas ako donosimo zaključke na Gradskom vijeću da donosimo po osnovu stručnih mišljenja a ne po osnovu nekih političkih mišljenja ili ličnih mišljenja ljudi koji apsolutno ne znaju o čemu pričaju, ne znaju o čemu se ovdje radi.

Ja stvarno ne mogu glasati za nešto gdje mi tehničko lice nije došlo i objasnilo koji su to konkretno, koje su to konkretno opasnosti za grad i o kakvim opasnostima mi ovdje pričamo i da vidimo da li uopšte postoji ta navodna opasnost o kojoj se ovdje priča.

A ovdje totalno apsolutno podržavam vijećnika Čavalića i mislim da je i ovo dobro evo da opet idemo kao što je gospodin Alić prije govorio da se i ovdje uputi zaključak od strane evo Kolegija i da vidimo da li ima išta od tih natpisa. Da se uputi zaključak stručnim tijelima na nivou Federacije ili Kantona zavisno od toga šta je čija nadležnost i da se pita da li se ovo opet dovodi u bilo kakav opticaj, jer smatram da je apsolutno nepotrebno da o ovom diskutujemo i da donosimo neke Rezolucije na bazi nekih rekla kazala navoda. To je izigravanje Poslovnika, izigravanje Gradskog vijeća.

Ja vas pozivam da napravite pauzu i da se dogovorite da i ovo ide na Kolegij, jer ako smo kolega Čavalić i ja bili toliko korektni da smo sve naše koje su u propisanom roku, sve naše dopune dnevnog reda stavili da ide na Kolegij mislim da i ovo može da ide na Kolegij i da nema potrebe da se diže neka frka i opasnost bez ikakvog realnog razloga.

Znači, samo ono što ja ovdje zahtjevam jeste korektnost i sa druge strane ukoliko smo mi bili korektni iz opozicije. Hvala ljepo.

## **NATAŠA PERIĆ**

Gradonačelnik Jasmin Imamović se javio za riječ.

## **JASMIN IMAMOVIĆ – gradonačelnik Grada Tuzle**

Pozdravljam predsjedavajuće, pozdravljam vijećnice i vijećnike. Ma ne radi se ni o kakvoj ako treba samo malo hronologije jer smo dugo u toj priči. Dakle, vidjeli ste nešto u momentu kada je Rezolucija donošena, nešto u momentu nakon donošenja Rezolucije, vidjeli ste podpredsjednika, bivšeg podpredsjednika Vlade Srbije kad je predsjednik Vlade Srbije bio Koštunica kad objašnjava sastanak Tadića, Koštunice sa Putinom i Medvedovim kada Tadić traži od Putina i Rusije da mu pomogne da napravi naj-veće skladište plina u Evropi i kako on kaže u napuštenim rudnicima soli kod Tuzle. Dakle, nije ovo Srbija nego je ovo Bosna i Hercegovina. To ste svi vidjeli. A sad se događa rat i ovaj strah od separatizma.

Ovo što gospodin Čavalić traži. Opravdano traži da kaže ko je to rekao. Normalno ne mogu sve teme i sve medije da prate niko od nas pa ni vijećnici. Dakle, problem je ponovo izbio. Mi imamo Rezoluciju i ona dok se ne promijeni ona je na snazi.

Na zasjedanju BH komiteta Međunarodnog vijeća za velike energetske sisteme (CIGRA) i tu je izjavio ovaj neki koji se bavi plinom sa Pala, a zatim Edhem Bičakčić kao predsjednik tog komiteta iz Sarajeva da treba aktivirati tu priču o skladištenju plina ispod Tuzle. Et to je bio razlog.

Mi smo to analizirali i mi imamo Rezoluciju ne treba nova odluka Vijeća. Ne treba nije ništa to na silu, nije nikakva to pokušaj nikakve manipulacije. Ako Vijeće misli da treba donijeti zaključak da se ostaje pri onoj Rezoluciji neka to odluči. Ako Vijeće misli da to ide, da to nema potrebe jer Rezolucija već postoji vi se dogovorite. Ali je bio značajan dio građana je to pročitao u medijima i postavili su veliki broj pitanja administraciji.

Dakle, naš je stav nepromjenljiv i uopšte nemamo namjeru niš-ta drugo nego ukoliko Vijeće smatra da je dobro da se kaže da Vijeće ostaje a da ne bude uznemirenosti građana, da se nisu promijenile okolnosti itd. kod Rezolucije donesene šesnaeste godine onda to nije problem. Ako treba Vijeću pauza to se vi dogovorite predsjedavajuća neka o tome odluči. Ali ja sam ovo ovako razumio. Hvala vam što ste me saslušali.

## **NATAŠA PERIĆ**

U redu hvala. Vijećnik Mensur Hirkić pardon, pa onda vijećnik ima Muratović ma ja. Izvolite Hasibe.

## **HASIB HIRKIĆ – samostalni vijećnik**

Evo i ja ću da pozdravim sve prisutne i da nam zaželim danas uspješan rad. Po ovom pitanju ja mislim da ne bi trebali dizati nikakve tenzije imajući u vidu da postoji ta odluka predhodnih saziva Gradskog vijeća. Mislim da ovo Gradsko vijeće ima i obavezu da štiti znači građane i njihovu imovinu. Ovdje samo je možda potrebno da damo prostor da izglasamo tu istu odluku kako bi u narednom periodu gradonačelnik i Gradske službe mogli preventivno djelovati da ne čekaju vanrednu sjednicu ili nešto drugo po pitanju toga. Mislim da je to jasno ko dan. Hvala.

## **NATAŠA PERIĆ**

U redu hvala. Vijećnik Damir Muratović pa onda. Molim? Aha. Dobro. Nikice samo malo bolje ruku tu više podigni. Nekako stidljivo uvijek digneš.

## NIKICA VIDOVIĆ

Sve vas ponovo pozdravljam ali mislim da evo i radi kolega kolega vijećnika i vijećnica evo uzet ću za pravo u par trenutaka da probam objasniti o čemu se radi.

Prvo tekst, naslov i tekst nema nikakvog smisla je li napomenut ću vas da je Rudnik soli Tušanj bio ovo o čemu bi vi pričali ispod grada. Rudnik soli Tuzla ili Tetima kako se naziva Tetima je ležište. Rudnik soli ra-di znači, potpuno naslov nema nikakve veze. Nije napušteni nego je rudnik koji radi i u procesu je proizvodnje i nalazi se na Tetimi. Znači, ne ispod grada.

Iskreno nije mi jasno zašto se ovo potencira. Ne bi volio da mene i moje kolege i kolegice uvlačimo u nešto. Ako je ovo neki obračun glede puta u Mandićima, glede očite promjene vlasti u županiji i možda na čelu rudnika i da se ovdje nekako razračunavamo zbog nečega što je prevažno za grad Tuzlu i za Bosnu i Hercegovinu.

I kratko ću reći vi znate svi da mi svi resurse moramo imati energente za tri mjeseca. Ova priča je toliko paušalna i toliko nekorektno napisana i uzbuđujemo stanovništvo bez potrebe.

Ono što se, evo i tu ću podvuć s tehničke strane to je gore u planini i ne postoje još uvijek relevantni dokazi da se tu uopće može složiti ili ne može znači, to su priče za koje se treba istražiti i vjerovatno trebat će godine da se izrade bušotine po nekom drugom principu. 30 bušotina trenutno radi. Vi znate da je 6 izbušeno, da ima jedna sporna koja se trenutno treba bušiti i mislim da to treba trenutno ostaviti. Odavde treba otići poruka pozitivna.

Znači, nema trenutno nikakve bojazni i da li će se desiti, mislim da ovo nije nije tekst primjeren i mislim da vi nesmijete biti obmanuti. Ja ću vas ponoviti da to nije skladište ispod Tuzle, da je to potpuno nešto drugo i da definitivno za sad nema nikakvih indicija da se tu nešto skladišti.

Moji su kolege i prijatelji jako isprovocirani juče bili gdje se piše napušten, ne znam gdje su ljudi bili. Na poslu. A piše se napušteno. Fotografija je rezervoara oštećenih iz nemilih događaja koja je lakirana itd. itd. Znači, potpuno jedna kriva slika koja je. Nije lijepo da vi to ne znate je li i živite u Tuzli. Izuzetan dragulj Tuzle, izuzetna tri-četiri problema koja mi danas imamo zbog tog istog x-y predmeta i ja bi vas zamolio samo da nas ne umješate, a osobno izaći ću kod glasanja, jel nemam ništa protiv i svoj imam stav i naravno nisam za skladištenja bilo čega ispod Tuzle to je definitivno, ali definitivno treba neki papir dati a ne paušalno govoriti. Evo ja vas kao neko koji se vrlo malo razumije u ovo. Hvala vam.

## NATAŠA PERIĆ

U redu. Vijećnik Damir Muratović, neka se pripremi vijećnik Mensur Alić.

## DAMIR MURATOVIĆ – vijećnik Socijaldemokrata BiH

Hvala predsjedavajuća. Pozdravljam sve prisutne kolege, predsjedavajuću, sekretara, podpredsjedavajuće i predstavnike službi svi koji su prisutni danas pošto se prvi put obraćam.

Nije uopšte sporno ako postoji rezolucija razgovarao sam sa kolegom Vujadinovićem i Miškovićem oni su bili u tom sazivu Gradskog vijeća na čelu Gradskog vijeća i ako postoji ta rezolucija moglo je se moglo je se na drugi način definisati. Znači, ne vidim nikakvu potrebu evo i sam je gradonačelnik rekao niko od nas ne spori da smo svi protiv toga.

Međutim, ono što sporimo što često znate reći opoziciji vezano za populizam tako i ja mogu slobodno reći pošto evo taj plin se skladišti ne znam koliko dvadeset-trideset godina nikako da se uskladišti. Znači, ovo je jedan od klasičnih fantomskih neprijatelja grada Tuzle zna se čijim obraćanjima, tako da stvarno ne vidim potrebe da dižemo tenzije, a naravno da smo svi i ovdje smo svi da čuvamo moralne i etičke norme i štitimo pra-va, zdravlje i sigurnost

naših građana i to nije sporno bili mi pozicija ili opozicija ali da konstantno idemo na tu priču da opozicija radi populizam ovo ja ne vidim ništa drugo nego da je populizam. A kao što je kolega rekao za meteor i ja kažem sad prijeti atomska bomba Tuzli i sad sutra trebamo svi sjest, u Dnevnom avazu izađe i sutra svi sjedamo ovdje i govorimo mi smo protiv. Pa naravno da smo protiv. Sve što je protiv građana i mi smo protiv. Nas su građani birali. Hvala.

## **NATAŠA PERIĆ**

U redu hvala. Vijećnik Mensur Alić.

## **MENSUR ALIĆ**

Pa evo ja sam bio vijećnik kad se donosila ta Rezolucija i tada, moram objasniti nekima koji ne znaju i koji pričaju neke priče ovdje gdje se nalazi. To se nalazi na području Gornje Tuzle gdje sam imamo tad preko 200 potpisa građana Tuzle da su protiv toga i tad su bili pojedini vijećnici, da ne govorim njihova imena, su bili zato jer je bio lobi i postojao da se to radi i tom Rezolucijom mi smo to spriječili. Ja predstavljam građane Tuzle, ali predstavljam i građane Gornje Tuzle odakle dolazim, jer to se nalazi u Gornjoj Tuzli. Hiljadu metara ili kilometar ili kilometar samo od prvih kuća se nalazi. To se ne nalazi na Tetimi, nego na području Gornje Tuzle i to je uznemirilo građane i od mene su takođe tražili čitajući ove informacije u raznim medijima, tražili od mene da se ogradimo oko toga i ja jesam zato za ovo Čavalić što je predložio.

Ako smo prihvatili dva zaključka ovako su bili korektni, ja jesam zato da napravimo pauzu i da napravimo zaključak samo da podržimo ono što smo donijeli prije kolko godina i završena priča da ne raspravljamo puno od toga. Ja se slažem u potpunosti da idemo na taj način da ne stavljam. (NATAŠA PERIĆ – Da povučemo.) Da ne stavljam. Evo sad pauzu ćemo napraviti odmah da ne stavljam u dnevni red (NATAŠA PERIĆ – Tražit ću ja pauzu.) i time smo podmirili sve, a ostajemo pri onome, nikad se ne zna šta se može desit. Ovdje, ovdje je čitav svijet u situaciji takoj da se može promijeniti u 48 sati svašta. Prema tome. Devedeset druge nismo bili oprezni na početku pa smo posle shvatili šta se desilo. (NATAŠA PERIĆ – Dobro.) Moramo biti oprezni. Ovo je svijet ludila. Zahvaljujem.

## **NATAŠA PERIĆ**

Dajem pauzu 10 minuta i molim predstavnike Kolegija da u sali... (OMER BERBIĆ – Jel može usred diskusije pauza?) Može, može. Naravno da može. Ko kaže da ne može? (OMER BERBIĆ – Usred diskusije pauza?) Pa nije diskusija. Zaključena je diskusija. (OMER BERBIĆ – Kad je zaključena?) Pa zaključena je njegova diskusija imam pravo da tražim pauzu. (vijećnik Omer Berbić govori s mjesta bez mikrofona op.a.) (Pauza.)

Molim vijećnike da se vrate na mjesta nastavljamo sa radom.

Što se tiče prijedloga parlamentarne većine da se uvrsti tačka vezano za skladištenje prirodnog gasa u iskorištenim komorama Rudnika soli „Tetima“ na Kolegiju Gradskog vijeća smo se dogovorili da ovu tačku povučemo i da se ova tačka razmatra na sljedećoj sjednici Gradskog vijeća.

Mislim da ćete svi dobiti ako već niste materijal koji je vezan za Rezoluciju i za zaključke iz prethodnih mandata, tako da evo mi povlačimo i evo ja stavljam na..(MENSUR ALIĆ – Ali ide zaključak.) Ali idu dobro i zaključci. (SLAĐANA KRAJINA - Oni su već

usvojeni na Kolegiju.) Imaju određeni zaključci koji su usvojeni na Kolegiju uglavnom se podržava, podržava ova Rezolucija i sve.

E sad stavljam na izjašnjavanje cjelokupni dnevni red. (Mogu li ja ponovo?) Može. Poništavam glasanje. Molim vijećnike da se ponovo izjasne. Nikice? Nikice? Jel nema Nikice? Glasanje je okončano.

Konstatujem da je cjelokupni dnevni red usvojen sa,  
30 glasova za, niko nije bio protiv i nije bilo suzdržanih.

## **D N E V N I R E D**

**- Usvajanje Skraćene verzije Zapisnika sa 12. redovne sjednice Gradskog vijeća Tuzla, održane 23. 02. 2022. godine**

### **1. VIJEĆNIČKA PITANJA I INICIJATIVE**

**2. USVAJANJE ZAKLJUČAKA O PODRŠCI REPUBLICI UKRAJINI I NARODU UKRAJINE**

**3. a) RAZMATRANJE INFORMACIJE O RADU KOMISIJE ZA PROVOĐENJE JAVNOG OGLASA ZA IMENOVANJE SEKRETARA GRADSKOG VIJEĆA TUZLA SA KONAČNOM RANG LISTOM NAJUSPJEŠNIJIH KANDIDATA ZA IMENOVANJE SEKRETARA GRADSKOG VIJEĆA TUZLA**

**b) DONOŠENJE RJEŠENJA O KONAČNOM IMENOVANJU SEKRETARA GRADSKOG VIJEĆA TUZLA I DAVANJU OVLAŠTENJA ZA ODLUČIVANJE O PRAVIMA I OBAVEZAMA SEKRETARA GRADSKOG VIJEĆA TUZLA**

### **4. RAZMATRANJE I USVAJANJE :**

**a) RJEŠENJA O RAZRJEŠENJU ČLANA GRADSKE IZBORNE KOMISIJE TUZLA**

**b) IZVJEŠTAJA O PROVEDENOJ PROCEDURI ZA IMENOVANJE ČLANA GRADSKE IZBORNE KOMISIJE TUZLA PO JAVNOM OGLASU ZA IMENOVANJE ČLANA GRADSKE IZBORNE KOMISIJE TUZLA, OBJAVLJENOM 4.2.2022. GODINE U "VEČERNJEM LISTU" I NA WEB STRANICI GRADA TUZLA ([www.tuzla.ba](http://www.tuzla.ba))**

**c) RJEŠENJA O IMENOVANJU ČLANA GRADSKE IZBORNE KOMISIJE TUZLA**

### **5. RAZMATRANJE I USVAJANJE:**

**a) IZMJENE DIJELA REGULACIONOG PLANA PROSTORNE CJELINE "SOLANA SJEVER" U TUZLI**

**b) ODLUKE O IZMJENI I DOPUNAMA ODLUKE O PROVOĐENJU REGULACIONOG PLANA PROSTORNE CJELINE "SOLANA SJEVER" U TUZLI**

**c) ODLUKE O USVAJANJU IZMJENE DIJELA REGULACIONOG PLANA PROSTORNE CJELINE "SOLANA SJEVER" U TUZLI**

**6. RAZMATRANJE I USVAJANJE ODLUKE O DAVANJU SAGLASNOSTI ZA ZAKLJUČENJE UGOVORA O REGULISANJU MEĐUSOBNIH PRAVA I OBAVEZA U VEZI SA POVJERAVANJEM NA UPRAVLJANJE DOBRA U OPĆOJ UPOTREBI I JAVNOG DOBRA (SA TEKSTOM UGOVORA)**

### **7. RAZMATRANJE I USVAJANJE:**

**a) ODLUKE O RASPISIVANJU JAVNOG OGLASA ZA IZBOR I IMENOVANJE DVA ČLANA NADZORNOG ODBORA U JKP "PANNONICA" d.o.o. TUZLA (sa tekstom Javnog oglasa)**

**b) ODLUKE O UTVRĐIVANJU POSEBNIH USLOVA I KRITERIJA ZA IZBOR I IMENOVANJE DVA ČLANA NADZORNOG ODBORA U JKP**

**“PANNONICA” d.o.o. TUZLA U KOJEM GRAD TUZLA VRŠI OVLAŠTENJA PO OSNOVU UČEŠĆA DRŽAVNOG KAPITALA**

**c) RJEŠENJA O IMENOVANJU KOMISIJE ZA IZBOR DVA ČLANA NADZORNOG ODBORA U JKP “PANNONICA” d.o.o. TUZLA, U KOJEM GRAD TUZLA VRŠI OVLAŠTENJA PO OSNOVU UČEŠĆA DRŽAVNOG KAPITALA**

**d) ODLUKE O PRIJEDLOGU KANDIDATA ZA PRIVREMENO IMENOVANJE NA UPRAŽNJENA MJESTA DVA ČLANA NADZORNOG ODBORA IZ REDA DRŽAVNOG KAPITALA U JKP “PANNONICA” d.o.o. TUZLA**

**8. RAZMATRANJE I USVAJANJE ODLUKE O DAVANJU PRETHODNE SAGLASNOSTI NADZORNOM ODBORU JP BIT CENTAR d.o.o. U TUZLI ZA IMENOVANJE DIREKTORA DRUŠTVA**

**9. RAZMATRANJE I USVAJANJE:**

**a) ODLUKE O DAVANJU SAGLASNOSTI NA ZAKLJUČENJE UGOVORA O ZAKUPU POSLOVNE PROSTORIJE SA ZAKUPCEM JP BIT CENTAR d.o.o. TUZLA**

**b) ODLUKE O DODJELI U ZAKUP POSLOVNIH PROSTORIJA NEPOSREDNOM POGODBOM JKP SAOBRAČAJ I KOMUNIKACIJE d.o.o. TUZLA**

**10. RAZMATRANJE IMOVINSKO-PRAVNIH ODLUKA I RJEŠENJA:**

**a) ODLUKE O PRODAJI NEKRETNINE U VLASNIŠTVU GRADA TUZLE NEPOSREDNOM POGODBOM RADI OBLIKOVANJA GRAĐEVINSKE PARCELE ZA IZGRADNJU KOLEKTIVNOG STAMBENOG OBJEKTA U ULICI SRPSKA VAROŠ U TUZLI**

**b) RJEŠENJE O IMENOVANJU KOMISIJE ZA PROVOĐENJE POSTUPKA PREGOVARANJA ZA PRODAJU NEKRETNINE U VLASNIŠTVU GRADA TUZLE NEPOSREDNOM POGODBOM RADI OBLIKOVANJA GRAĐEVINSKE PARCELE ZA IZGRADNJU KOLEKTIVNOG STAMBENOG OBJEKTA U ULICI SRPSKA VAROŠ U TUZLI**

**c) RJEŠENJE O ODBIJANJU KAO NEOSNOVANOG ZAHTJEVA ZA OTKUP GRAĐEVINSKOG ZEMLJIŠTA (Mustafić Fikret, lokacija KO Slavinovići), broj: 01/07-27-9853/21**

**11. RAZMATRANJE I USVAJANJE ODLUKE O PROSJEČNOJ KONAČNOJ GRAĐEVINSKOJ CIJENI STAMBENOG PROSTORA IZ PREDHODNE GODINE**

**12. RAZMATRANJE I USVAJANJE:**

**a) ODLUKE O POKRETANJU POSTUPKA IZMJENA GRANICA KATASTARSKIH OPŠTINA NA PODRUČJU GRADA TUZLA**

**b) RJEŠENJA O IMENOVANJU KOMISIJE ZA IZMJENE GRANICA KATASTARSKIH OPŠTINA BUKINJE I HUSINO NA PODRUČJU GRADA TUZLE**

**c) RJEŠENJA O IMENOVANJU KOMISIJE ZA IZMJENE GRANICA KATASTARSKIH OPŠTINA HUSINO I PLANE NA PODRUČJU GRADA TUZLE**

**13. RAZMATRANJE I USVAJANJE:**

**a) ODLUKE O DAVANJU SAGLASNOSTI NA ODLUKU NADZORNOG ODBORA JKP VODOVOD I KANALIZACIJA D.O.O. TUZLA O IZMJENAMA I DOPUNAMA OPŠTIH USLOVA ZA SNABDIJEVANJE VODOM I USLUGAMA ODVOĐENJA OTPADNIH VODA OPĆINE TUZLA**

**b) ODLUKE O DAVANJU SAGLASNOSTI NA ODLUKU NADZORNOG ODBORA CENTRALNO GRIJANJE D.D. TUZLA O DONOŠENJU NORMATIVNIH AKATA**

**14. RAZMATRANJE I USVAJANJE:**

**a) ODLUKE O DAVANJU SAGLASNOSTI ZA ZAKLJUČENJE ANEKSA UGOVORA O REGULISANJU MEĐUSOBNIH PRAVA I OBAVEZA U VEZI SA**



**POVJERAVANJEM NA UPRAVLJANJE I KORIŠTENJE JAVNIH DOBARA, KOMUNALNE I DRUGE INFRASTRUKTURE I OBJEKATA (JKP VODOVOD I KANALIZACIJA D.O.O. TUZLA)**

**b) ODLUKE O DAVANJU SAGLASNOSTI ZA ZAKLJUČENJE ANEKSA UGOVORA O REGULISANJU MEĐUSOBNIH PRAVA I OBAVEZA U VEZI SA POVJERAVANJEM NA UPRAVLJANJE I KORIŠTENJE JAVNIH DOBARA, KOMUNALNE I DRUGE INFRASTRUKTURE I OBJEKATA (JKP KOMEMORATIVNI CENTAR D.O.O. TUZLA)**

**c) ODLUKE O DAVANJU SAGLASNOSTI ZA ZAKLJUČENJE ANEKSA UGOVORA O REGULISANJU MEĐUSOBNIH PRAVA I OBAVEZA U VEZI SA POVJERAVANJEM NA UPRAVLJANJE I KORIŠTENJE JAVNIH DOBARA, KOMUNALNE I DRUGE INFRASTRUKTURE I OBJEKATA (TRŽNICE - PIJACE D.O.O. TUZLA)**

**d) ODLUKE O DAVANJU SAGLASNOSTI ZA ZAKLJUČENJE ANEKSA UGOVORA O REGULISANJU MEĐUSOBNIH PRAVA I OBAVEZA U VEZI SA POVJERAVANJEM NA UPRAVLJANJE I KORIŠTENJE JAVNIH DOBARA, KOMUNALNE I DRUGE INFRASTRUKTURE I OBJEKATA (CENTRALNO GRIJANJE D.D. TUZLA)**

**e) ODLUKE O DAVANJU SAGLASNOSTI ZA ZAKLJUČENJE ANEKSA UGOVORA O REGULISANJU MEĐUSOBNIH PRAVA I OBAVEZA U VEZI SA POVJERAVANJEM NA UPRAVLJANJE I KORIŠTENJE JAVNIH DOBARA, KOMUNALNE I DRUGE INFRASTRUKTURE I OBJEKATA (JKP KOMUNALAC D.O.O. TUZLA)**

**f) ODLUKE O DAVANJU SAGLASNOSTI ZA ZAKLJUČENJE ANEKSA UGOVORA O REGULISANJU MEĐUSOBNIH PRAVA I OBAVEZA U VEZI SA POVJERAVANJEM NA UPRAVLJANJE I KORIŠTENJE ZEMLJIŠTA, PLAŽA, OBJEKATA I OPREME U OKVIRU I U FUNKCIJI DVA SLANA JEZERA SA SLANIM VODOPADIMA I BAZENIMA U GRADU TUZLA (JKP PANNONICA D.O.O. TUZLA)**

**15. RAZMATRANJE I USVAJANJE IZVJEŠTAJA O RADU GRADSKOG PRAVOBRANILAŠTVA TUZLA ZA 2021. GODINU**

**16. RAZMATRANJE IZVJEŠTAJA KOMISIJE ZA IZBOR I IMENOVANJA**

**17. TEKUĆA PITANJA**

**a) Obavještenje Službe za kulturu, sport, mlade i socijalnu zaštitu o razlozima prolongiranja Informacije o realizaciji Akcionog plana za Rome 2018-2021**

Prelazimo na realizaciju.

**VIJEĆNIČKA PITANJA I INICIJATIVE** su prva tačka.

Evo molim samo da ukratko obrazložite pitanja i to.

Prvo vijećničko pitanje Elvir Bijedić. Izvolite.

**ELVIR BIJEDIĆ – zamjenik predsjedavajućeg Gradskog vijeća Tuzla,  
- vijećnik Socijaldemokratske partije**

Zahvaljujem predsjedavajuća. Pozdravljam sve prisutne s obzirom da se prvi put javljam. Dakle, imam vijećničko pitanje za Službu za komunalne poslove, izgradnju i poslove mjesnih zajednica i za Centralno grijanje.

Da li je i za kada planirano proširenje zone centralnog grijanja u Mjesnoj zajednici Mosnik za ulice Branislava Nušića, Vikaljska i Gine Herman?

Naime, građani Mjesne zajednice Mosnik su se obratili pismenim putem i zatražili sastanak na kojem su iznijeli činjenicu da je ogranak voda centralnog grijanja prošao kroz ulicu Amalija Lebeničnik koja je u neposrednoj blizini ulicama Nušićeva, Gine Herman i Vikaljska, (NATAŠA PERIĆ – Molim vas malo tišine.) te konstatovali da bi proširenje zone i na ove tri spomenute ulice znatno unaprijedilo uslove života stanovanja građana ove mjesne zajednice te doprinijelo smanjenju uticaja aerozagađenja koje nastaje loženjem fosilnih goriva. Hvala.

### **NATAŠA PERIĆ**

U redu hvala. Sljedeće vijećničko pitanje Admir Čavalić. Izvolite. Tri. A ne ima. (ADMIR ČAVALIĆ – Tri, tri.) Tri. Daj. Aha dok pročitaš.

### **ADMIR ČAVALIĆ**

Hvala puno predsjedavajuća. Prvo vijećničko pitanje:

Zamolio bih za dostavu kompletne evidencije registrovanih smještajnih kapaciteta na području Tuzle i Tuzlanskog kantona. Evidencija bi trebala sadržavati sve objekte koji su registrovani za pružanje smještaja, bilo da je riječ o fizičkim ili pravnim licima – uz navođenje smještajnih kapaciteta. Uz navedeno, zamolio bih za podatke o broju turističkih noćenja na području Grada Tuzla u 2021. godini i Tuzlanskog kantona u 2021. godini. Naravno pored Turističke zajednice Grada Tuzla ovo pitanje je upućeno i adresi na Turističku zajednicu Tuzlanskog kantona.

Drugo vijećničko pitanje:

Koja je procedura za izvršenje numeracija neke ulice u Tuzli?

Obrazloženje:

Veliki broj ulica, odnosno određeni broj ulica u našem gradu nažalost nema numeraciju, nema brojeve i to stvara brojne probleme dakle, kako za dostavljače tako i za poštare ili bilo kakve druge administrativne, birokratske ili tržišne operacije koje se vežu za numeraciju dakle, što olakšava istoj. Brojni građani bi volili da se njihove ulice numerišu tako da me zanima procedura numeracije ovih ulica.

I zadnje pitanje je:

Kada je planirana realizacija projekta iz 2018. godine dakle, staro 14 godina projekat – toplifikacija ulice 6. bosanska brigada?

Građani ulice 6. bosanske brigade, koja se nalazi stotinjak metara od Trga slobode i zaista predstavlja uže gradsko jezgro, izlijepili su juče i prekuče plakate na kojima je napisano: Molimo gradonačelnika i Gradsko vijeće da realizuju projekat centralnog grijanja koji postoji od 2018. godine! Krajnje je vrijeme da se ovo pitanje riješi i zbog toga postavljam ovo vijećničko pitanje, te bih zamolio za konkretan odgovor da zaista izvrši se toplifikacija ovog tuzlanskog naselja, odnosno ulice. Hvala puno.

### **NATAŠA PERIĆ**

U redu hvala. Sljedeća vijećnička pitanja vijećnik Anel Ibeljić.

### **ANEL IBELJIĆ – vijećnik Socijaldemokratske partije**

Prilažem.

## **NATAŠA PERIĆ**

Dobro. Vijećnica Selma Čatibušić. Izvolite. Neka se pripremi vijećnik Senad Mehmedinović.

### **SELMA ČATIBUŠIĆ – vijećnik Platforme za progres**

Dobar dan svima. Prvi put se javljam za riječ pa eto želim nam ugodan dan i rad.

Moje prvo pitanje slično kao i Admirovo je li kada će početi realizacija zapravo isto priključka na centralno grijanje u naselju Šesta bosanska i molim da mi se dostavi izvještaj o dosadašnjem angažmanu i radu kada je u pitanju ovaj projekat? To su tačno ulice Kojšino, 6. bosanska, Kristijana Krekovića obzirom da je projekat gotov više od 9 godina. Centralno grijanje odradilo kompletnu dokumentaciju sve do Komemorativnog centra ali nije izvršena realizacija. Da li će uopšte doći do izvršenja, tj. realizacije ovog projekta ukoliko građani pokažu volju i mogućnost da se priključe na Centralno grijanje?

Drugo vijećničko pitanje odnosi se naravno, tj. upućeno je direktoru Doma zdravlja Javnoj ustanovi Dom zdravlja „Mustafa Šehović“ Tuzla. Mi smo navikli na moje dopisivanje s njim kada je ovo pitanje.

Da li je napokon završena procedura nabavki ginekološkog stola prilagođenog osobama sa invaliditetom obzirom da sam dobila odgovor prije više od tri mjeseca da je raspisana procedura za nabavku istog, te koliko je potrebno da procedura traje za nabavku jednog ginekološkog stola da li je zaista potrebno četiri mjeseca? Ukoliko nije završena procedura, kada će biti završena i prema zaključku dužan je o tome izvijestiti Gradsko vijeće? Hvala.

## **NATAŠA PERIĆ**

U redu hvala. Vijećnik Senad Mehmedinović, neka se pripremi vijećnica merima Softić Sprečić.

### **SENAD MEHMEDINOVIĆ – vijećnik Pokreta demokratske akcije**

Dobar dan svima.

Prvo vijećničko pitanje je Službi za komunalne poslove, izgradnju i poslove mjesnih zajednica: Koliko mjesnih zajednica je u 2021. godini dostavilo izvještaj o radu?

U članu 100. Statuta Grada Tuzle koji se odnosi na odgovornost Savjeta mjesnih zajednica definisano je da „Savjet mjesne zajednice za svoj rad odgovara Vijeću Grada i u tom smislu mu obavezno putem nadležne gradske službe za praćenje rada mjesnih zajednica, podnosi godišnji izvještaj o svom radu“. Shodno navedenom članu Statuta Grada Tuzle molim da mi se dostavi odgovor na vijećničko pitanje. Također, molim vas da u sastavnom dijelu odgovora bude spisak mjesnih zajednica koje su postupile po članu 100. Statuta Grada Tuzle.

Drugo pitanje:

Na kojoj visini ide Saobraćaj i komunikacije – Tuzla: Na kojoj visini se postavljaju saobraćajni znakovi u naseljima i trotoarima?

Prema Pravilniku o saobraćajnim znakovima i signalizaciji definisana je visina za postavljanje saobraćajnih znakova u naseljima. Između ostalog u Pravilniku stoji da visina i položaj saobraćajnog znaka moraju biti takvi da ne ugrožavaju kretanje pješaka i da ih pješaci i vozila ne zaklanjaju. U razgovoru sa građanima, skrenuta mi je pažnja da su neki saobraćajni znakovi gdje se kreću pješaci niski npr. kod MUP-a što otežava kretanje slijepim i slabovidnim licima, odnosno može doći do povrede istih. Stoga, zanima me na kojoj visini se postavljaju

saobraćajni znakovi u naseljima i trotoarima, te ovom prilikom sugerišem da se u budućnosti vodi računa o visini znakova kako nebi došlo do eventualne povrede slijepih i slabovidnih lica.

Treće prilažem pitanje predsjedavajuća.

## **NATAŠA PERIĆ**

U redu hvala. Sljedeća vijećnička pitanja Merima Softić Sprečić, neka se pripremi vijećnik Nikica Vidović.

### **MERIMA SOFTIĆ SPREČIĆ – vijećnik Socijaldemokratske partije**

Pozdravljam sve prisutne. Hvala predsjedavajuća. Prvo vijećničko pitanje upućujem menadžmentu Javnog komunalnog preduzeća Vodovod i kanalizacija:

Kada će se pristupiti zamjeni i saniranju dotrajalih cijevi vodovodne i kanalizacione mreže u Mjesnoj zajednici Slavinovići a po zaključku Vijeća o prioritetnom saniranju i postavljanju vodovodne i kanalizacione mreže – dionica puta od auto praone prema Hotelu Tehnograd preko raskrsnice pa cijelom dužinom pored Binga prema semaforu?

Obrazloženje:

Kao vijećnica sam u nekoliko navrata vodila diskusiju, posebno kod usvajanja nacрта i prijedloga Budžeta, koja je bila sa posebnim osvrtom na asfaltiranje dijela sada već uništene ceste u Slavinovićima. Na osnovu zaključaka koje sam tada predložila, a Vijeće usvojilo, Mjesna zajednica Slavinovići i ovaj dio ceste je uvrštena kao prioritet i obećano je za govornicom da će se izaći na teren i u što kraćem roku a najdalje do oktobra 2021. godine, završiti rekonstrukcija i zamjena dotrajale vodovodne i kanalizacione mreže, što bi u konačnici značilo, asfaltiranje ceste od strane komunalne službe Grada a nakon završetka radova preduzeća Vodovod i kanalizacija.

Dobila sam informaciju da zbog objektivnih razloga nije moglo doći do zamjene vodovodne i kanalizacione mreže, pa samim tim niti asfaltiranje nije bilo moguće, za koje je već završen projekat i obezbjeđena sredstva Gradske uprave.

Sada na osnovu novih saznanja o mogućnosti što skorijeg izlaska na teren, tražim da se postupi kao u naslovu pitanja, da se u što kraćem vremenskom roku, a obzirom na lijepo vrijeme koje nam je stiglo, izađe na teren i svi radovi oko postavljanja novih i zamjenu dotrajalih cijevi završe do kraja.

S tim u vezi tražim od menadžmenta preduzeća Vodovod i kanalizacije, da odgovore koji je okvirni rok planiran za završetak ovih radova a isto pitanje postaviću nakon vašeg odgovora i komunalnoj službi koja će svojim sredstvima uraditi asfaltiranje.

Drugo vijećničko pitanje postavljam Službi za komunalne poslove, izgradnju i poslove mjesnih zajednica:

Šta se uradilo po pitanju Inicijative koju sam predložila za postavljanje dječijih sprava u krugu vrtića Zeko na Bulevaru, odnosno izlaska na teren, kako bi se donijelo rješenje o izgradnji malog dječijeg igrališta koje bi bilo ograđeno i prilagođeno potrebi djece koja pohađaju vrtić Zeko, a koji se nalazi u stanu na prizemlju stambene zgrade, te isti nema niti izlaz na balkon?

Djeca trebaju provoditi vrijeme na otvorenom, a svi znamo koje su prednosti boravka napolju bar na kratko, tako da se nadam da ćete u što skorijem roku izgraditi igralište.

Treće vijećničko pitanje se takođe odnosi na Službu za komunalne poslove, izgradnju i poslove mjesnih zajednica:

Kada će se asfaltirati dionica puta u Mjesnoj zajednici Dragunja, dužine oko 680 metara od Društvenog doma do kuće Saletović Šemsudina?

Obrazloženje:

Građani ove mjesne zajednice, traže od nadležne službe, da po osnovu svih dosadašnjih dogovora, dopisa koje su slali ispred savjeta i inicijativa, službe izađu na teren, utvrde činjenično stanje i njihov problem koji se tiče asfaltiranja pomenute dionice puta, rješe na dobrobit svih. Hvala. Toliko.

### **NATAŠA PERIĆ**

U redu hvala. Vijećnik Nikica Vidović, neka se pripremi vijećnik Hirkić.

### **NIKICA VIDOVIĆ**

Službi za komunalne poslove izgradnju i poslove mjesnih zajednica postavljam jedno vijećničko pitanje:

Kada će započeti realizacija asfaltiranja dva putna pravca u Mjesnoj zajednici Par Selo, s obzirom da su preduvjeti za realiziranje istog stvoreni krajem prošle godine i uplaćena sredstva na račun Grada, prethodno prikupljena od strane žitelja i to: Dionica prometnice Mandušine njive i dionica prometnice naselje Miškovići. Evo kratit ću.

Nadležna Služba za komunalne i poslove mjesnih zajednica sačinila je ovjereni predračun, dostavila žiteljima gdje su ta sredstva od 20% uplaćena tako da vrijednost projekta 94 tisuće 266 KM-ova uplaćeno je 18 tisuća 800 KM-ova, pod b) za drugu 52 tisuće 414 je predračun uplaćeno je 10 tisuća 482 marke. Vjerujem da će nadležna Služba poduzeti aktivnosti da se ova kapitalna investicija što prije realizira. Hvala.

### **NATAŠA PERIĆ**

U redu hvala. Vijećnik Hasib Hirkić, neka se pripremi vijećnica Esana Kavazbašić Huskanović.

### **HASIB HIRKIĆ**

Zahvaljujem predsjedavajuća. Evo ja neću iznositi nikakva vijećnička pitanje nego ću se zahvaliti Službi za komunalne poslove. Već prije odgovora kojeg sam dobio oni su izašli na teren i već 15 dana su radili, sanirali, uređivali sve. Vidim da su krenuli i u druge mjesne zajednice tamo gdje sam tražio da se saniraju putevi ili prekopi nakon vodovoda i ovim putem bih želio da se zahvalim još jednom. Hvala.

### **NATAŠA PERIĆ**

U redu hvala. Vijećnica Esana Kavazbašić Huskanović, neka se pripremi vijećnik Omer Berbić. Molim vas tišina.

### **ESANA KAVAZBAŠIĆ HUSKANOVIĆ**

Ja imam samo jedno pitanje. Slično je kao što je malo prije bilo. Znači, 74 vlasnika objekta u Mjesnoj zajednici Mosnik znači, obratili su mi se sa molbom. Znači, molba građana za proširenje zone grijanja.

Molim vas da razmotrite ovaj naš zahtjev za proširenje zone grijanja kako bi se i mi priključili na isti. Jedan ogranak centralnog grijanja je prošao kroz ulicu Amalije Lebeničnik a ista se nadovezuje na ulice Branislava Nušića, Vikaljska i Gine Herman, a mi smo sa svojim

kućama okolo u neposrednoj blizini i sa svojim ložištima zagađujemo okolinu i to u naselju Oaza kao i zgrade koje će se graditi Lucijana na prostoru rudničke garaže.

Molimo vas da putem Službe za komunalne poslove Grada Tuzle i Gradskog vijeća razmotrite mogućnost proširenje zone grijanja kako bi se i mi sa svojim kućama priključili na istu.

U nadi povoljnog rješenja unaprijed zahvalni građani Mjesne zajednice Mosnik. Tako da (NATAŠA PERIĆ – U redu.) volila bih da ovo uđe u razmatranje. Hvala.

**NATAŠA PERIĆ**

Hvala. Vijećnik Omer Berbić. Izvolite.

**OMER BERBIĆ**

E hvala ljepo. Evo moje prvo pitanje:

Koliko je koji vijećnik ili vijećnica pojedinačno postavio ili postavila pitanja i inicijativa u prošloj godini, te koliko se puta ko javio za riječ u diskusijama?

Drugo pitanje:

Kada automobil udari u banderu gdje ide novac od osiguranja?

I treće:

Kada će se ulica u Batvi vratiti u prvobitno stanje (NATAŠA PERIĆ – Molim vas tišina.) prvobitno stanje u odnosu na ono kad su počeli radovi za toplifikaciju, odnosno 14. 02.? Hvala ljepo.

**NATAŠA PERIĆ**

U redu hvala. Ima li još neko za pitanja ko nije dostavio?

**PRELAZIMO NA INICIJATIVE**

Evo ja ću krenut od sebe kao vijećnica pokrećem inicijativu koju upućujem prema Službi za komunalne poslove i pitanja mjesnih zajednica i Službi civilne zaštite te tražim da se pripremi informacija o regulaciji čišćenju, odnosno održavanju vodotoka na području Grada Tuzla u poslednjih 20 godina. Obzirom da je ovo obimna da će ovo biti obimna informacija tražim da najdalje do kraja mjeseca maja ova informacija bude spremna i da bude uvrštena u dnevni red sjednice. Hvala.

Omer Delalić sljedeći.

**OMER DELALIĆ – samostalni vijećnik**

Hvala. Postavljam inicijativu za postavljanje novog krova na objektu Društvenog doma u Donjoj Obodnici:

Kod svake padavine krov na društvenom domu u Donjoj Obodnici prokišnjava. U tom trenutku nije moguće biti u Društvenom domu. Savjet mjesne zajednice je upozorio da zbog loše instalacije svi koji se tada nalaze u domu su životno ugroženi. Društveni dom svakodnevno koristi Savjet mjesne zajednice, uposlenik Grada Tuzla i građani posebno najmlađi koji koriste salu i teretanu u Društvenom domu.

Zbog svega pomenutog molimo vas da hitno završite zamjenu krova na Društvenom domu te na taj način omogućite svakodnevno korištenje istog bez ugrožavanja bilo koga. Hvala.

**NATAŠA PERIĆ**

U redu hvala. Sljedeća vijećnica Sabiha Mujkanović Mujačić.

**SABIHA MUJKANOVIĆ MUJAČIĆ – zamjenik predsjedavajućeg Gradskog vijeća Tuzla – samostalni vijećnik**

Znači kod mene je urgencija na inicijativu koju sam već ranije postavljala a danas se nekako držimo obodnice. Znači, ranije sam postavila i evo upućujem urgenciju na inicijativu za rekonstrukciju i asfaltiranje dijela ceste u ulici 17. maja u Mjesnoj zajednici Donja Obodnica.

Dio ceste koji je potrebno rekonstruisati i asfaltirati dužine je 550 metara i počinje od kuće broj dva u ulici 17. maja pa sve do igrališta koje se nalazi ispred Mjesne zajednice Donja Obodnica.

Od velike je važnosti da se pored asfalta postave i ivičnjaci barem sa jedne strane jer usljed kiše znači voda odnese sav kameni nasip, potkopava cestu te proizvodi materijalnu štetu. Zahvaljujem.

**NATAŠA PERIĆ**

U redu hvala. Sljedeća vijećnička inicijativa vijećnik Alen Kapidžić.

**ALEN KAPIDŽIĆ – vijećnik Socijaldemokratske partije**

Hvala predsjedavajuća. Pa ja ću svoju vijećničku inicijativu priložit a evo da kažem samo evo shodno prošloj diskusiji na prošlom Vijeću što se tiče mojih vijećničkih inicijativa ja sam evo sad dobio odgovore i izjašnjenja na vijećničke inicijative od Službe za komunalne poslove, još od nekih nisam dobio ali evo to ćemo na nekoj od narednih sjednica mada ja nisam ni sugerisao na ovu Službu. Ova Služba po meni kolko obiman posao radi, radi svoj posao odgovorno i profesionalno ali jednu samo hoću da sugerišem stvar. Ovdje mi je odgovoreno na pitanje, u stvari urgenciju na inicijativu za razmatranje mogućnosti pokretanja linije za proizvodnju peleta.

Oni su ovdje kaže da nisu nadležni ja to znam a prihvatam mogućnost da možda ni ja nisam dobro formulisao jer sam je formulisao ovako usmeno. Znači, istu sad urgenciju šaljem Službi za ekonomski razvoj, poduzetništvo i poljoprivredu. Znači, želim da mi oni odgovore i čak mislim kad sam pismeno podnio ovu inicijativu da sam prvobitno njima uputio i urgencija se odnosila na ovu Službu je li.

Ali evo da ponovo pokrećem urgenciju na ovu inicijativu ali Službi znači za ekonomski razvoj, poduzetništvo i poljoprivredu. Hvala.

**NATAŠA PERIĆ**

U redu. Hvala Alene. Sljedeća vijećnička inicijativa Elvir Bijedić. Izvolite.

**ELVIR BIJEDIĆ**

Zahvaljujem predsjedavajuća. Moja inicijativa je upućena Službi za inspeksijske poslove:

Dakle, tiče se suzbijanja nelegalne prodaje poljoprivrednih i duhanskih proizvoda u Mjesnoj zajednici Novi Grad 1.

Dakle, nakon čestih razgovora sa predstavnicima Mjesne zajednice Novi Grad 1, građanima, a i obilazeći ovu mjesnu zajednicu skrećem pažnju da se svakodnevnom nelegalnom prodajom poljoprivrednih proizvoda u ulici Rade Peleša i nelegalnom prodajom duhanskih proizvoda u ulici Maršala Tita ugrožava bezbjednost učesnika u saobraćaju, a naročito pješaka. Naime, prodaja se vrši na trotoarskim površinama koje su uzurpirane od strane nelegalnih prodavača, te su pješaci prinuđeni silaziti sa trotoara na saobraćajnice koje su vrlo frekventne i time se ugrožava njihova bezbjednost.

Također, želim istaći činjenicu da smo u više navrata tražili i od Službe za inspekcijske poslove, kao i od preduzeća Tržnice Pijace da se pronađe mogućnost da se prodaja poljoprivrednih proizvoda legalizuje na način da se to radi na štandovima pijace koja je u neposrednoj blizini. Hvala.

## **NATAŠA PERIĆ**

U redu hvala. Sljedeća vijećnička inicijativa Admir Čavalić. Izvolite.

## **ADMIR ČAVALIĆ**

Hvala puno predsjedavajuća. Dakle, postavljam i upućujem tri vijećničke inicijative.

Prva je da se postavi adekvatna rasvjeta za igralište na lokaciji ulice Miroslava Krležu 17, uz naknadno uređenje navedenog igrališta.

Riječ je o kompleksu igrališta. Dakle, izuzetna stvar gdje imamo omladine, imamo naše djece. Ono što je problem jeste da je osvijetljenje solidno ili ga nema nikako dakle, na jednom igralištu koje je blizu garaža. Bilo bi dobro dakle da se postavi osvijetljenje. To upućujem JKP „Saobraćaj i komunikacije“ Tuzla, a s druge strane uređenje da preuzmu nadležne Gradske službe.

Druga inicijativa je:

Da se riješi problem odlaganja smeća, odnosno formiranje ilegalne deponije smeća na prostoru zgrade C8 i Klinike za plućne bolesti – Slavinovići.

Dakle, mještani ovog dijela Tuzle su se obratili i oni navode da ima problem dakle, ilegalnog bacanja smeća. Ono što je problem navedenog je širi sociološki dakle, to se zove „stakleni prozor“, a šta to znači? Ako neko baca smeće i vi ništa ne reagujete onda krenu i drugi mještani bacati smeće onda nastane deponija dakle. Idealno bi bilo da odmah evo sada kad su krenuli bacati smeće da se to počisti pa da demotiviramo druge da bacaju.

I zadnja inicijativa:

Da se pod hitno sanira put koji povezuje naselje Paša Bunar i Moluhe, pored Azila za pse „Nirina“.

Meni je ovo baš fascinantna inicijativa. Uputio sam ove i fotografije kako sad izgleda dakle, ovo je opet malo Černobilski dakle ovaj put, ima dosta otpada, spaljenog drveća i sl. Zahvaljujem dakle, piscu Meši Parganu koji je prošao i snimio video ovdje vrlo dobar dio Tuzle. Dakle može biti zaista dobra priroda za rekreativce, šetače i sl. Mi smo ko djeca išli tu igrali se fudbala. Sada je u katastrofalnom stanju dakle, potpuno zapušteno i građani ne znam više ni odakle bacaju smeće tu. Dakle, možda ne bi bilo loše da razmišljamo o revitalizaciji ovog dijela Tuzle da to možda bude neka nova Ilinčica itd. Hvala puno.

## **NATAŠA PERIĆ**

U redu hvala. Vijećnik Anel Ibeljić.



**ANEL IBELJIĆ**

Prilažem.

**NATAŠA PERIĆ**

Dobro. Vijećnica Selma Ćatibušić.

**SELMA ĆATIBUŠIĆ**

Evo ovako. Inicijativa za rješenje problema i načina odlaganja smeća, te faktički formiranja ilegalne deponije na prostoru naselja Slavinovići, između Klinike za plućne bolesti i zgrade C8:

Kada je u pitanju ova lokacija, više građana nam se obraćalo za rješenje ovog problema. Neophodno je da se napravi redovniji raspored odlaganja smeća, postavljanje više kontejnera, i potencijalno sigurnosnih kamera, kako bi se moglo početi i sa sankcionisanjem bacanja smeća i pravljenja ilegalne deponije. Obzirom da se radi o jednom od prilaza prema Klinici za plućne bolesti je razlog više brzo i hitno rješenje ovog problema. Grupe građana i pojedinci su čistili više puta ovaj prostor ali to nije sistemsko rješenje. Prilažem naravno i fotografije.

Druga vijećnička inicijativa jeste:

Postavljanje rampi prilagođenim osobama sa invaliditetom u stambenim zgradama, javnim ustanovama, na trotoarima.

Već se na neki način na tome radi. Rečeno je barem da će se raditi u narednom periodu. Međutim, smatram da je neophodno da Služba izađe na teren i da vidi, da razmotri mogućnost gdje je to nekako najpotrebnije i kako na što bolji način Tuzlu učiniti inkluzivnijom.

Dalje. Vijećnička inicijativa za postavljanje dodatnih klupa i kanti za smeće na šetalištu na Bulevaru u predjelu od opštine Grada Tuzla do škole „Novi Grad“.

Već tu imaju određene klupe i kante za smeće međutim, građani su mi se obraćali sa eto željom da tu budu dodatne klupe obzirom da je jako frekventno i jako jedno lijepo šetalište u kojem bi mogli uživati i oni ljudi koji tamo žive ali i oni koji prolaze.

I inicijativa ispred Progresivnog bloka:

Ja sam dostavila uz ovu inicijativu dopis koji je nama u Progresivnom bloku stigao na naše imeil adrese tako da eto molim Službu da razmotri ovaj dopis, izađe na teren Službu za inspeksijske poslove i potencijalno da vidimo na koji način da se riješi ovaj problem, a sve stoji u dopisu pa da ne čitam.

**NATAŠA PERIĆ**

U redu hvala. Vijećnik Damir Muratović. Izvolite.

**DAMIR MURATOVIĆ – vijećnik Socijaldemokrata BiH**

Prilažem inicijativu. Vezano samo za urgenciju koju sam evo drugi put od Službe za komunalne poslove dobijam pogrešan odgovor. Znači, već su mi uputili te odgovore u junu – julu i ponovo mi šalju iste odgovore znači. Oni ne znaju ni koja je sjednica bila, nit znaju koje odgovore šalju. Znači uvažavam ovo što je kolega Alen rekao da imaju velik obim posla, ali već drugi put mi se dešava da na moju urgenciju dobivam odgovor koji sam već dobio, a ono što sam tražio nisam dobio. Pa samo da malo više povedu računa u toj Službi a evo znači nisam jedini koji ne dobiva odgovore. Hvala.

**NATAŠA PERIĆ**

U redu hvala. Vijećnica Lejla Osmančević. Izvolite.

**LEJLA OSMANČEVIĆ – samostalni vijećnik**

Zahvaljujem predsjedavajuća. Pozdravljam sve prisutne.

Inicijativa za izgradnju objekta koji će ispunjavati uslove Ambulante Porodične medicine u u Mjesnoj zajednici Donja Obodnica.

U obrazloženju:

Građani Mjesne zajednice Donja Obodnica koriste ambulantu Breške i ambulantu Dragunja. Udaljenost ambulante Breške od Mjesne zajednice Donja Obodnica je oko 2 kilometra dok je najbliža autobusna stanica od kuća građana Mjesne zajednice Donja Obodnica udaljena oko 2 kilometra i do nje je teško doći zbog specifične konfiguracije terena sa velikom uzbrdicom. Ambulanta Dragunja je takođe udaljena oko 2 kilometra od Mjesne zajednice Donja Obodnica. Važno je napomenuti da zdravstvene usluge ove dvije Ambulante koristi isključivo stanovništvo starosne dobi iznad 65 godina i da zbog lošeg socijalnog statusa i nemogućnosti da plate prevoz bolesni stanovnici Mjesne zajednice Donja Obodnica idu pješke. Zbog pomenute situacije upućujem inicijativu da se u narednom periodu utvrde troškovi izgradnje objekta ili adaptacija nekog od postojećih koji će ispunjavati uslove Ambulante u Mjesnoj zajednici Donja Obodnica i time omogućiti jednakopravno pružanje usluga zdravstvene zaštite svim kategorijama stanovništva a naročito onima kojima je najpotrebnija penzionerima, starim osobama i osobama u stanju socijalne potrebe kao i djeci. Hvala.

**NATAŠA PERIĆ**

U redu hvala. Vijećnik Senad Mehmedinović.

**SENAD MEHMEDINOVIĆ**

Kolega Berbić mi je nabacio na ovu inicijativu tako da hvala kolega Berbiću.

Stručnoj službi za poslove gradonačelnika i Stručnoj službi vijeća:

„Inicijativa za pokretanje novog servisa na web stranici grada Tuzle – objavljivanje vijećničkih pitanja, inicijativa i odgovora“.

U 21. stoljeću kojeg karakteriše napredak tehnologije sve više je prisutna digitalizirana korespodencija i komunikacija. S ciljem transparentnijeg i efikasnijeg rada Gradskog vijeća, kao i informisanja javnosti o radu vijećnika, pokrećem inicijativu za pokretanje novog servisa na web stranici grada Tuzle koji će omogućiti uvid u postavljene inicijative i vijećnička pitanja pokrenutih od strane vijećnika. Inicijativa podrazumijeva da sva pitanja i inicijative vijećnika budu objavljeni javno na novom servisu u sklopu web stranice grada Tuzle, ali isto tako podrazumijeva i da odgovori nadležnih Službi i preduzeća budu objavljeni na stranici.

Primjer kako to sve može izgledati šaljem vam u prilogu. Hvala ljepo.

**NATAŠA PERIĆ**

U redu hvala. Vijećnik Nikica, a vijećnica Ana Pejić. Pardon.

**ANA PEJIĆ - zamjenik predsjedavajućeg Gradskog vijeća Tuzla,  
- vijećnik Socijaldemokratske partije**

Hvala. Jedna inicijativa se odnosi za sanaciju klizišta i izgradnju potpornog zida u ulici Bajrama Malkočevića Mjesna zajednica Brčanska Malta.

Druga inicijativa je za postavljanje klupa i sanaciju dječijeg igrališta kod zgrade Pecara 2.

I treća je urgencija na inicijativu za postavljanje stalaka za bicikla na parking mjestima u blizini Panonskih jezera.

**NATAŠA PERIĆ**

U redu hvala. Vijećnik Nikica Vidović. Izvolite.

**NIKICA VIDOVIĆ**

Hvala. Podnosimo dvije vijećničke inicijative za Gradsko vijeće, nadležna služba i gradonačelniku:

Da se za sjednicu Gradskog vijeća, koja će se održati u travnju 2022. godine, žurno pripremi, sukladno važećim aktima i propisima tiskani dokument Poslovnik o radu Gradskog vijeća i zadnje zakonske promjene vezane za rad Vijeća.

Više puta u mandatu je promijenjen Poslovnik o radu Gradskog vijeća i potreban je jedinstven dokument radi lakšeg praćenja rada Vijeća. Promjene i dopune i prečišćavanje teksta usložnjava korištenje Poslovnika gradskog vijeća. Već je razgovarano na ovu spomenutu temu nekad već prije par sjednica.

Tražim i očekujem da će nadležna gradska služba i gradonačelnik razmotriti ovu inicijativu, te žurno pristupiti realizaciji iste.

Druga vijećnička inicijativa je temeljem je vezana za onu točku sa početka sjednice za uvrštavanje točke dnevnog reda a tiče se:

Da se za sjednicu Gradskog vijeća, koja će se održati u travnju dvadesetdruge godine, žurno pripremi, sukladno važećim aktima i propisima novo imenovanje članova Savjeta mjesne zajednice i razrješenje članova Savjeta mjesnih zajednica, zbog promijenjenih okolnosti, a do provedbe izbora u mjesnim zajednicama.

Također pod dva:

Da gradonačelnik da svoje mišljenje o prijedlogu, čije donošenje nije inicirao i da iznese stav o navedenom pitanju. Ja sam ovdje pravni okvir ostavio, a ja ću samo par dijelova pročitati.

Svjedoci smo da su imenovanja i pored činjenice da ista nisu izvršena sukladno propisima i sadašnji izbor članova savjeta je izgubio svoj legitimitet i legalitet, obzirom na činjenicu da su imenovani članovi savjeta iz reda stranaka, koje nakon izlaska iz iste, nemaju svoje vijećnike u Gradskom vijeću.

Mislim da je vrijeme da se žurno pristupi kako ponovnom imenovanju do provedbe izbora, tako i žurnom stvaranju preduvjeta za realiziranje izbora u mjesnim zajednicama i donošenje statuta mjesnih zajednica, jer je rok od 6 mjeseci istekao krajem dvadesetprve godine.

Ja neću ovdje čitat imaju citati i naravno i odlomci iz zakona. Ali evo bitno je istaknuti da u slučaju prestanka mandata, razrješenja i imenovanja novih do donošenja propisa u rokovima propisanim članovima 167. i 169. izbor članova savjeta će se vršiti na identičan način prvobitnih imenovanja, nakon izbora 15. 11. dvadesete, a u skladu sa važećim propisima koji

su važili u vrijeme imenovanja. Tako smo mi naravno i vršimo zamjene trenutno i imenujemo do izbora. Toliko. Daljni tekst ćete dobiti pisano. Hvala.

## **NATAŠA PERIĆ**

U redu hvala. Vijećnička inicijativa Nusret Muminović. Izvolite.

## **NUSRET MUMINOVIĆ – samostalni vijećnik**

Prilažem.

## **NATAŠA PERIĆ**

U redu hvala. Molim? Aha. Izvoli Omere. Esana pa ja sad razmišljam jeste ne znam reko jeste se javili ili? (ESANA KAVAZBAŠIĆ HUSKANOVIĆ – Jesam na urgenciju.) Dobro, dobro.

## **OMER BERBIĆ**

Hvala ljepo. Prva moja vijećnička inicijativa i mislim da je ovo realno izvodljiva jeste da Grad poogne stanovnicima Ši Sela u inicijativi da se trg kod stare mjesne zajednice obnovi po projektu u prilogu.

Ja sam zadnjih dana u saradnji sa Nakićem Avdićem to je jedan mladi arhitekta perspektivan, mi smo napravili evo ovaj jedan prijedlog kako bi taj trg trebao da izgleda i u tom trgu je sadržano dosta stvari.

Trenutno je ovaj trg mjesto okupljanja nažalost alkoholičara izgleda više kao kafana na otvorenom a stara mjesna zajednica je jedna ruševina koja prijeti tamo čak i da ugrozi ljudske živote. Mislim da se okupljaju žohari, miševi itd. i niko od nas trenutno nije u mogućnosti da koristi taj jedan prostor koji je u samom centru Ši Sela i kao što znamo Ši selo je najveća mjesna zajednica u gradu Tuzla.

Ja ću Službi dati evo ovaj projekat. Stojimo na raspolaganju da ga damo i u drugim verzijama i da vidimo imamo li mogućnost da Grad Tuzla barem isfinansira grube radove a građani Ši Sela su evo obećali da će se maksimalno angažovati u cijelom svom kapacitetu i da ćemo probati da što više materijala obezbjedimo od postojećeg stanja i da napravimo sebi jedno mjesto koje će služiti na ponos cijelom gradu Tuzla i građanima Ši Sela.

Nadam se da će ova vijećnička inicijativa biti prihvaćena i da će krenuti neki radovi. Mi ovdje govorimo o ne prevelikim parama. Govorimo o 10-15 hiljada maraka a stvarno bi to puno značilo za svakog čovjeka koji živi na području Ši Sela jer trenutno nemamo niti jedan park, niti jedan trg u Ši Selu ito je zaista jedno ruglo grada u najvećoj mjesnoj zajednici u Tuzli, a možda čak u najvećoj mjesnoj zajednici u Bosni i Hercegovini.

Imam još dvije inicijative. Jedna je:

Postavljanje većeg broja kanti za smeće na šetalištu od mosta u Slavinovićima do kraja šetališta.

A drugo je: Vraćanje parka u Bukinju u prvobitno stanje.

Znači, park na koloni Bukinje je izrovan radi radova od strane gradskih javnih komunalnih preduzeća i nikada nije vraćen u prvobitno stanje što je zakonska obaveza kada se nešto napravi da se vrati u prvobitno stanje. Tako da su to moje tri inicijative. Hvala ljepo.

**NATAŠA PERIĆ**

U redu hvala. Vijećnica Esana Kavazbašić Huskanović.

**ESANA KAVAZBAŠIĆ HUSKANOVIĆ**

Ja danas podnosim znači urgenciju na jednu od mojih prethodnih inicijativa a odnosi se na primjenu inkluzivnih sprava na dječija igrališta. Pošto ide lijepo vrijeme i smatram to veoma važnom problematikom u Tuzli molila bi Službu za komunalne poslove da bar u Tuzli obezbjedimo ako ništa drugo jedno igralište znači, gdje će biti postavljene te inkluzivne sprave za djecu sa teškoćama u razvoju. Znači, da ona ne bi više bila diskriminirana i da bi imali svoje mjesto gdje će moći otići i koristiti te sprave. Hvala.

**NATAŠA PERIĆ**

U redu hvala. Da li ima još neko inicijativu? Selma Ćatibušić. Izvolite.

**SELMA ĆATIBUŠIĆ**

Ma nije inicijativa više je onako mogućnost Službi pri Gradskom vijeći ili koja je već nadležna.

Obzirom da ovo što je Omer spomenuo za eto kolegu Nakića koji je arhitekta i momak stvarno pravi super neke projektne prijedloge da Služba razmotri mogućnost da ovdje imamo jedan TV gdje ćemo moći i pokazati neke stvari ukoliko želimo preko stika nešto da u sklopu naših diskusija pokažemo ili neki video kako bismo kolegama što bolje prikazali neke naše ideje ili projekte ili eto eventualno mogućnost da i ljudi koji imaju ideje pustimo ne znam dvije-tri minute. Ovako npr. Nakić je mogao objasniti šta je on želio postići jer je to naš sugrađanin koji je odvojio svoje slobodno vrijeme, bavi se time, to mu je struka, a evo radi faktički za svoj grad besplatno što mislim da je izuzetno pohvalno i bilo bi lijepo da imamo eto makar tu mogućnost da možemo da na pravi način prikažemo ono o čemu želimo da govorimo.

I eto samo me zanima i naše vijećničke ove iskaznice i dokle je to došlo pa ako Slađa može posle odgovorit bila bi ti zahvalna.

**NATAŠA PERIĆ**

U redu. (SLAĐANA KRAJINA – Jel odmah?) Pa nemojte odmah. Samo malo da evo mi...

**SLAĐANA KRAJINA – sekretar Gradskog vijeća Tuzla**

Mogu naravno odgovorit ali mislim da još desetak vijećnika nije dostavilo slike i pored onih naših silnih molbi i mejlova i poziva pa. Pa napraviti ćemo, napraviti ćemo. I ostavili smo do ove sjednice još da sačekamo. Ali evo još sutra eventualno ako neko može dostaviti da možemo napraviti.

**NATAŠA PERIĆ**

Ništa. Zaključujemo prvu tačku Dnevnog reda.

Prelazimo na drugu:

## USVAJANJE ZAKLJUČAKA O PODRŠCI REPUBLICI UKRAJINI I NARODU UKRAJINE

Vijećnik Admir Čavalić je već dao na početku obrazloženje.

Ja sad evo otvaram raspravu po njegovom obrazloženju, ako nema da odmah sekretar pročita prijedlog zaključka.

Možete Slađana? Izvolite. (Mogu naravno.)

### SLAĐANA KRAJINA – sekretar Gradskog vijeća Tuzla

- Gradsko vijeće Tuzla i Grad Tuzla izražavaju zabrinutost zbog eskalacije sukoba u Ukrajini i prijetnji po mir u svijetu.

- Gradsko vijeće Tuzla i Grad Tuzla osuđuju agresiju na Ukrajinu i upućuju podršku Ukrajini i poruke mira i solidarnosti narodu Ukrajine.

- Gradsko vijeće Tuzla upućuje čestitke izvršnoj vlasti na organizaciji skupa podrške grada Tuzle Ukrajini i miru u Evropi i Bosni i Hercegovini.

- Gradsko vijeće Tuzla traži od svih nadležnih organa da ulože maksimalne napore, kada je u pitanju zbrinjavanje izbjeglica iz Ukrajine.

### NATAŠA PERIĆ

U redu. Pozivam vijećnike da se izjasne o pročitanim zaključcima. Glasanje je okončano. Molim? Glasali ste. Glasanje je okončano.

Konstatujem da su pročitani zaključci usvojeni sa,

27 glasova za, niko nije bio protiv i nije bilo suzdržanih i dajem pauzu od 30 minuta i molim Službu samo da otvori balkone malo da se provjetri. (Pauza.)

Molim vijećnike da sjednu na svoja mjesta nastavljamo sa radom.

Prelazimo na treću tačku Dnevnog reda:

### **Pod a) RAZMATRANJE INFORMACIJE O RADU KOMISIJE ZA PROVOĐENJE JAVNOG OGLASA ZA IMENOVANJE SEKRETARA GRADSKOG VIJEĆA TUZLA SA KONAČNOM RANG LISTOM NAJUSPJEŠNIJIH KANDIDATA ZA IMENOVANJE SEKRETARA GRADSKOG VIJEĆA I**

### **b) Donošenja RJEŠENJA O KONAČNOM IMENOVANJU SEKRETARA GRADSKOG VIJEĆA TUZLA I DAVANJU OVLAŠTENJA ZA ODLUČIVANJE O PRAVIMA I OBAVEZAMA SEKRETARA GRADSKOG VIJEĆA**

Predlagač je Kolegij Gradskog vijeća.

Obrađivač je Komisija za provođenje Javnog oglasa za imenovanje sekretara Gradskog vijeća (pod a) i Stručna služba Gradskog vijeća (pod b).

Materijal su razmatrali: Komisija za statutarna pitanja i propise, Komisija za izbor i imenovanja i klubovi vijećnika.

Ima li potrebe za uvodnim izlaganjem? Nema.

Ima li potrebe da se pročitaju izvještaji Komisija? Nema.

Otvaram raspravu Klubova vijećnika. Niko se ne javlja. Zatvaram raspravu klubova vijećnika.

Otvaram raspravu vijećnika. Niko se ne javlja. Zatvaram raspravu vijećnika.

Stavljam na izjašnjavanje pomenutu tačku. Glasanje je okončano.  
Konstatujem da je za pročitane informacije i rješenje 28 vijećnika glasalo za, niko nije bio protiv i nije bio suzdržan.

Čestitamo našem sekretaru još jednom. (Aplauz.)

Sasvim zaslužen. (Aplauz.)

Sljedeća tačka:

#### **RAZMATRANJE I USVAJANJE:**

Pod **a) RJEŠENJA O RAZRJEŠENJU ČLANA GRADSKO IZBORNE KOMISIJE TUZLA**

**b) IZVJEŠTAJA O PROVEDENOJ PROCEDURI ZA IMENOVANJE ČLANA GRADSKO IZBORNE KOMISIJE TUZLA PO JAVNOM OGLASU ZA IMENOVANJE ČLANA GRADSKO IZBORNE KOMISIJE TUZLA, OBJAVLJENOM 4.2.2022. GODINE U "VEČERNJEM LISTU" I NA WEB STRANICI GRADA TUZLA ([www.tuzla.ba](http://www.tuzla.ba))**

**c) RJEŠENJA O IMENOVANJU ČLANA GRADSKO IZBORNE KOMISIJE TUZLA**

Predlagač je Kolegij Gradskog vijeća.

Obrađivač je Konkursna komisija za imenovanje člana Gradske izborne komisije Tuzla (pod b) i Stručna služba Gradskog vijeća (pod a i c).

Materijal su razmatrali: Komisija za statutarna pitanja i propise, Komisija za izbor i imenovanja i klubovi vijećnika.

Ima li potrebe za uvodnim izlaganjem? (Nema.)

Ima li potrebe da se pročitaju izvještaji Komisija? (Nema.)

Otvaram raspravu Klubova vijećnika. Vijećnik Damir Muratović ispred Kluba SD-a. Izvolite.

#### **DAMIR MURATOVIĆ**

Hvala predsjedavajuća. Ovdje samo želim da čestitamo mladome gospodinu koji je izabran u Gradsku izbornu komisiju. Lično se ne poznajemo. Želim mu sve najbolje u budućem radu, a što se tiče bivšeg člana mislim da je ovo značajnije za Gradsku izbornu komisiju za izborni proces neg svi naponi Evropske Unije koja radi na izborima, čak možda važnije nego i elektronsko glasanje uvođenje. Svi koji ste učestvovali u izbornom procesu da li u jednom ciklusu ili u više ciklusa znate vrlo dobro o čemu ja govorim.

Znači, također želim i Gradskoj izornoj komisiji sa novim članom u budućem radu sve najbolje i naravno da su Gradskoj izornoj komisiji bili potrebni novi ne kompromitovani članovi pogotovo mladi, kompetentni, po mogućnosti i pravnici. Tako da ne bih ovo posebno obrazlagao. Nadam se da je ovo za sve, za sve nas koji ćemo učestvovati i koji su učestvovali jedan jedan veliki trenutak ja bih ga iz svog ličnog iskustva nazvao istorijski trenutak za rad izborne komisije u Gradskom vijeću Tuzla, a posebno čestitam predsjednici Gradske izborne komisije Asji Kravić i nadam se i njoj da će biti ti utezi i okovi skinuti tako da će biti ovo govorim u smislu transparentnosti, ispravnosti i poštenja na izborima. Hvala.

#### **NATAŠA PERIĆ**

U redu hvala. Sljedeća za riječ se javila vijećnica Selma Čatibušić ispred Kluba Platforme za progres.

## **SELMA ČATIBUŠIĆ**

Ovaj ništa, ja bih samo da prokomentarišem isto nešto slično što je kolega Damir rekao nadovezala bih se na to. Mislim da ovaj put je napravljen jedan korak, odnosno iskorak kada je u pitanju ovaj izbor i konkretno hajd mislim nije to ni tolko relevantno, ali poznajem osobu koja će biti imenovana i mogu slobodno da kažem da smatram da da jedna takva osoba i zaslužuje to mjesto obzirom da znam kakav je bio i studen i koliko je doprinio i doprinosi ovoj lokalnoj zajednici i koliko zna. Tako da eto ovaj put ne bih kritikovala ovaj dio, tako da nadam se da će se nastaviti na neki način sa ovom ma-lo boljom praksom.

## **NATAŠA PERIĆ**

U redu. Hvala vam. Vijećnik Omer Berbić. Jel ispred Kluba Omere? Stranka za BiH i Naša stranka.

## **OMER BERBIĆ**

Evo ispred Kluba stranka za BiH i Naša stranka želim da prije svega pohvalim rad i mislim da je ovo jedan od rijetkih Javnih poziva koji je završen da kažem ne političkim dijelom, da nisu ljudi koji su direktno ili indirektno vezani za politiku, barem dio njih. Mislim da je ovo izuzetno dobra stvar za Grad Tuzlu i da ćemo ovim ovakvim pristupom depolitizirati Gradsku izbornu komisiju, uvesti ljude koji će se brinuti da papiri završe na svom mjestu, koji će se brinuti da više nećemo morati da gledamo glasačke listiće ili one zelene listiće po kojekakvim odvodima u Mejdanu itd.

Želim da pohvalim i stvarno čestitam ko je vodio ovu proceduru i mislim da zaista napokon pravi ljudi dolaze na pravo mjesto i ovakvim jednim sistemskim mijenjanjem unutar Gradske izborne komisije dobijamo zaista na važnosti i na transparentnosti cijelog biračkog procesa. Hvala ljepo.

## **NATAŠA PERIĆ**

U redu hvala. Zaključujem raspravu klubova vijećnika.

Otvaram raspravu vijećnika. Da li se neko javlja za riječ? Vijećnik Čavalić.

## **ADMIR ČAVALIĆ**

Hvala puno predsjedavajuća. Nisam bio na prošloj tački ali želim iskoristiti dakle, sada ovo vrijeme da pohvalim uvaženu gospođu Slađanu Krajnu. Zaista profesionalac na pravom mjestu i iskrene čestitke za reizbore.

Vezano za tačku dva Gradska izborna komisija. Posebno hvala dakle, za ovaj postupak izbora. Vidimo da kada se CIK umiješa u smislu procedura da stvari idu drugačije. Imamo stenogram, odnosno imamo odgovore na pitanja od kandidata.

Shodno navedenom ja bih predložio zaključak da ubuduće bilo kada se bira nešto u Gradu Tuzla za nadzorne odbore, upravne odbore i sl. da dobijemo stenogram sa intervjuja. Gdje god ima Komisije za intervju da dobijemo stenogram da vidimo šta kako su odgovarali kandidati a zarad transparentnosti i stavljanja da kažemo pred problem zloupotreba eventualno ako postoje, ali vjerovatno u našem gradu nema zloupotreba pri izboru određenih kandidata.

Vezano za GIK. Velika je odgovornost za novog člana i za sve nove članove. Molim vas budite profesionalni, borite se, radite svoj posao kako treba, kako ste i do sad radili. Smanjite uticaj određenih centara moći u našem gradu koji pokušavaju uticati na birački proces



u smislu da ne biraju glasači već brojači. Dakle, ta praksa nam ne treba. Par puta sam naglašavao. Nažalost GIK Tuzla je uvijek na lošem glasu. Ako upišete sada na guglu vidjet ćete imamo najvećih problema evidentiranih po pitanju tužiteljstva i sl. u odnosu na neke druge izborne Komisije. Volio bih dakle, da novi sastav, novi članovi i ovi ranije što smo izabrali prošle godine da radite maksimalno svoj posao i kako treba. Sada ćete imati priliku dakle, akobogda bit će izbori u oktobru da se dokažete. Molim vas nemojte dozvoliti da određeni centri moći utiču na vas, da rade pritisak i sl. dakle, vi ste tu izabrani da branite integritet naroda, odnosno svih onih koji učestvuju u biračkom procesu.

Eto to je. Zaključak je dakle, da mi preuzmemo ovu dobru praksu CIK-a, CIK nam je dao tu praksu da se stave stenogrami a ja to dostavljam kao jedan zaključak. Mislim da je to super stvar. Sve što je dobro jel treba preuzet, sve što je loše treba odbaciti. Evo imamo ovdje primjer dobre prakse izbora članova GIK-a to treba preuzeti, a naravno sve loše prakse u našem gradu odbaciti. Hvala puno.

### **NATAŠA PERIĆ**

Hvala vam. Sljedeći za riječ se javio vijećnik Omer Berbić.

### **OMER BERBIĆ**

E hvala ljepo. Pa ponukan ovom diskusijom gospodina Čavalića ja bih isto želio da mi evo mi novoj Gradskoj izbornoj komisiji da damo jedan zaključak na ovoj tački.

Gradsko vijeće podržava novi izbor Gradske izborne komisije te je poziva da obezbjedi materijalno-tehničke uslove za pravičan, za pravičan izborni proces. Ovo se pogotovo odnosi na materijale u crnim vrećama, te na listiće zbirnih glasova sa biračkih mjesta.

Znači, ovdje smo više puta diskutovali i ja sam diskutovao, donosio slike gdje se vidjelo da su zbirni glasovni listići završavali po kojekakvim odvodima, te da su crne vreće bile ispred Mellaina i da je to otvarao ko kako želi i mislim da je to utjecalo na pravičan izborni proces.

Tako da evo ovo je ovo je jedan zaključak koji bi mi kao Gradsko vijeće dali Gradskoj izbornoj komisiji koja bi onda po osnovu ovog radila daljnje korake. Hvala ljepo.

### **NATAŠA PERIĆ**

Vijećnik Hasib Hirkić. Izvolite.

### **HASIB HIRKIĆ**

Zahvaljujem predsjedavajuća. Kako kolega Berbić kaže ponukan ovim što su oni već kazali ja bih rekao da nije to ni do GIK-a ni do CIK-a nego do nas. Mi predlažemo ljude u biračke odbore i posmatrače, tako da ni GIK ni CIK ne čuva vreće, nego oni ljudi koje mi postavimo i oni to donose i oni rade šta, šta hoće u stvari po nalogu onih ljudi koji su im dali i prostor i sve ostalo a i zadaću šta oni trebaju da urade. Pa o tome treba povesti računa mi koji predlažemo ljude da ne predlažemo ljude te koji su skloni svemu i svačemu. Hvala.

### **NATAŠA PERIĆ**

U redu hvala. Da li se još neko javlja? Niko se ne javlja.

Zaključujem raspravu vijećnika.

Stavljam na izjašnjavanje pročitana rješenja i izvještaj vezano za imenovanje člana Gradske izborne komisije kao i razrješenje člana Gradske izborne komisije. (Poništi. Poništi.)

Poništavam nemoj Admiru još snimat. Molim vas ponovo glasajte za...koncentracije bila je pauza. Glasanje je okončano.

Konstatujem da su pročitane tačke Dnevnog reda i podtačke usvojene sa, 30 glasova za, niko nije bio protiv i nije bilo suzdržanih

Dajem pauzu od 5 minuta većina sastanak. (Pauza.)

Molim vijećnike da uđu u salu zauzmu mjesta nastavljamo sa radom.

Molim sekretara da pročita zaključke proistekle iz rasprave i da se vijećnici izjasne.

### **SLADANA KRAJINA – sekretar Gradskog vijeća Tuzla.**

Prvi prijedlog zaključka:

- Gradsko vijeće Tuzla traži da ubuduće kada se provode procedure izbora i imenovanja vijećnici uz izvještaj, odnosno informaciju o provedenoj proceduri dobiju i stenogram sa intervjua.

A drugi zaključak:

- Gradsko vijeće Tuzla podržava izbor novog člana Gradske izborne komisije i poziva Gradsku izbornu komisiju da obezbjedi materijalno-tehnička sredstva za pravičan izborni proces naročito kada su u pitanju crne vreće za pakovanje izbornog materijala i zbirni obrasci izbornih rezultata.

### **NATAŠA PERIĆ**

Molim vijećnike da se izjasne. (Ponovi.)

(SLADANA KRAJINA – Zaključak ili glasanje?) Poništavam glasanje. Molim vijećnike da se...Molim vas ponovo se izjasnite o pročitanim zaključcima. Glasanje je okončano.

Konstatujem da pročitani zaključci nisu dobili potrebnu većinu, 9 vijećnika je glasalo za, niko nije bio protiv i 21 suzdržan.

Prelazimo na petu tačku:

#### **RAZMATRANJE I USVAJANJE:**

Pod a) **IZMJENE DIJELA REGULACIONOG PLANA PROSTORNE CJELINE “SOLANA SJEVER” U TUZLI**

b) **ODLUKE O IZMJENI I DOPUNAMA ODLUKE O PROVOĐENJU REGULACIONOG PLANA PROSTORNE CJELINE “SOLANA SJEVER” U TUZLI I**

c) **ODLUKE O USVAJANJU IZMJENE DIJELA REGULACIONOG PLANA PROSTORNE CJELINE “SOLANA SJEVER” U TUZLI**

Predlagač je gradonačelnik Grada Tuzla.

Obrađivač je Služba za prostorno uređenje i zaštitu okoline i Zavod za urbanizam.

Materijal su razmatrali: Komisija za statutarna pitanja i propise, Komisija za prostorno uređenje i zaštitu okoline i klubovi vijećnika.

Obavještavam vijećnike da je gradonačelnik Grada Tuzle, kao predlagač, dostavio AMANDMAN NA ODLUKU O IZMJENI I DOPUNAMA ODLUKE O PROVOĐENJU REGULACIONOG PLANA PROSTORNE CJELINE “SOLANA SJEVER” U TUZLI.

Amandman predlagачa ste dobili u materijalu podijeljenom neposredno pred početak sjednice i podsjećam da se o amandmanu predlagачa ne izjašnjava nego amandman postaje sastavni dio odluke.

Ima li potrebe za uvodnim izlaganjem? Nema.

Ima li potrebe da se pročitaju izvještaji Komisija? (Nema.)

Otvaram raspravu Klubova vijećnika. Vijećnik Ćerim Rastoder ispred zajedničkog Kluba.

### **ĆERIM RASTODER – zamjenik predsjedavajućeg Gradskog vijeća Tuzla – samostalni vijećnik**

Zahvaljujem se predsjedavajuća. Uvažene kolegice i kolege s obzirom da dolazim sa prostora Mjesne zajednice „Solana“ htio bih nešto samo reći po pitanju ovog regulacionog plana.

Drago mi je što se u zadnje vrijeme sve više i više ovo naselje Solana Tuzla So Salis itd. koji nosi znači najstariji naziv i naziv možemo reći gotov po gradu Tuzli što se radi. Mi smo prije par godina dobili jedan dole moderni hotel „Salis“, imamo onaj Robotov centar i sad evo ide se znači, na izgradnji ovog stambenog bloka, odnosno četiri stambena bloka u ovom naselju i to je jako dobro da se uvaži u tomo dijelu grada. Prošle godine smo ulagali nešto u Domu kulture dole. Imali smo skoro uređenje jedne raskrsnice u Solani, tako da sve aktivnosti koje se realizuju zaista su dobro došle na tom prostoru.

Ja koliko vidim ovdje ova izmjena plana od ova četiri bloka podrazumjeva da se na dva bloka umjesto planiranih šest ide na osam spratova i to je dobro.

Posebno mi je drago što ćemo prema onome koliko sam ja ovdje razumio u tim naseljima imati negdje do tri hiljade više stanovnika i s tog aspekta i ja podržavam sve ove aktivnosti koje su planirane i smatram da će taj dio grada, a taj dio zapadnog grada nam je na ulazu u uže jezgro Tuzle dobit jednu novu konturu i jedan novi kvalitet života. Toliko. Hvala.

### **NATAŠA PERIĆ**

U redu hvala. Sljedeći za riječ se javio vijećnik Alen Kapidžić ispred Kluba SDP-a. Izvolite. Ćerime Mikrofon.

### **ALEN KAPIDŽIĆ**

E hvala. Pa ja samo imam jedno pitanje. S obzirom da ovdje u materijalu koji smo dobili u uvodnom dijelu piše da predložene izmjene se odnose na usaglašavanje ranije predloženog rješenja izgradnje stambeno-poslovnih objekata blok B, blok D i poslovnog objekta E sa realnim potrebama investitora.

Dalje dole kaže. Obzirom da se ovom izmjenom, odnosno povećanjem vertikalnih gabarita navedenih objekata povećava i broj stambenih jedinica bilo je neophodno dodati po jednu podrumsku etažu u svakom od njih kako bi se povećao kapacitet parkirnih i garažnih mjesta za saobraćaj u mirovanju što je neophodno utvrditi detaljnom tehničkom dokumentacijom, tj. idejnim projektom.

Po ovome što smo mi dobili ja sam shvatio da se ovdje samo ovaj jedan dio regulacionog plana mijenja, a s obzirom da sam ja uputio jednu inicijativu za izmjenu jednog drugog regulacionog plana i nikad nisam na tu inicijativu dobio izjašnjenje, ja sad pitam obrađivača jesam li u pravu da se samo dio regulacionog plana mijenja?

Evo samo to želim da mi odgovori, a ukoliko dobijem potvrđan odgovor tražim pauzu od pet minuta sa većina.

## NATAŠA PERIĆ

Dobro. Hvala. Ispred Kluba Naša stranka i Stranka za Bosnu i Hercegovinu Admir Čavalić. Izvolite.

## ADMIR ČAVALIĆ

Hvala puno predsjedavajuća. Ja bih odmah da kažem na početku ja mislim ovo kolega Kapidžić što je naveo vjerovatno i jeste dakle, ovo je jedna vrlo mala minorna izmjena. Sjećate se da smo prije nekoliko isto Gradskih vijeća imali sličnu stvar.

Vezano za ovu izmjenu dijela Regulacionog plana prostorne cjeline Solana Sjever u Tuzli pozivam sve kolege, kolegice, vijećnice, vijećnike u Gradskom vijeću Grada Tuzla da ovo jednoglasno podržimo. Ovo opet stvara pretpostavke za revitalizaciju ovog dijela grada dakle, Solane. Vrlo bitno da i zajedno sa naseljima tu koje imamo Moluha dakle, Drežnik, Suljetovići koji grafitiraju ka Robotu, ka hotelu i evo nadam se novom trgovinskom objektu koje je opet mjesto za te sredine. To je mjesto susreta. Mjesto koje jednostavno oživljava zajednicu tako da bi zamolio da svi jednoglasno ovo podržimo.

Inače Solana je zapuštena dugo vremena. Drago mi je da se sada nešto radi. Ja sam uputio inicijativu da se sanira krov dakle, onog Spomen doma. Još par kolega mislim da je da je i kolega Delalić i sl. dakle, ranije on mi je fotografisao kako to rade, završili su. Želim da pohvalim dakle, Službu kako odradi to kada treba. Meni je posebno taj Spomen dom dakle, simbolički emocionalno bitan jer moj rahmetli dakle pradjed Pašaga Jogunčić je bio mjesni odbornik ispred Moluha i manje više dakle gradio, krenuo je sa izgradnjom tog Spomen doma tako da mi je, emocionalno me veže sve u vezi navedenog i zahvaljujem se dakle službama što su blagovremeno reagovali.

Takođe u vezi sanacije puta dole kod Šoleta i nekim drugim mjestima. Evo sada ćemo imati još jednu novu aktivnost u vezi jedne nove raskrsnice i evo i ova maloprije koju je kolega Čerim spomenuo. Dakle, radi se, ali treba se malo više raditi jer je zaista zapostavljena Solana.

Ja bi predložio da mi kao Gradsko vijeće generalno podržimo dakle, revitalizaciju i aktivaciju dakle dole radova u Solani da se to gradi i radi kao u nekim drugim mjesnim zajednicama tipa Mramor sad što je aktuelno i čestitam vijećniku na tome i da se obavežemo evo, a znam da je i kolega Alen dao tu inicijativu. Dao sam je i ja.

Molim vas evo zaključak da se krene pod hitno sa toplifikacijom do Spomen doma Moluha, da se krene sa toplifikacijom. Kolega Čerim je maloprije naveo bit će veći broj građana u Solani. Hoće, ali je problem ako imamo dosta više ljudi a žive tu a zagađenost ostaje ista ili čak šta više još veća zato što nema riješenog pitanja sistema centralnog grijanja.

Dakle, da mi kao Gradsko vijeće dadnemo podršku tome projektu pored ovog da se čim prije s tim krene, jer građani Solane ne smiju biti građani drugog reda dakle, oni su dio Tuzle. Odatle se i gradila Tuzla i krenulo i to je najmanje što možemo uraditi za njih. Dakle, znate i sami već kad prođete dole Irac pogotovo naveče u zimskim vremenima vidite da je zrak užasan, da smrdi, niko ne šeta, rasvjeta je nerjetko problematična i sl. Dakle, moramo moramo se malo više založiti za tu mjesnu zajednicu, ali svakako za svaku mjesnu zajednicu od 40 u našem gradu. Hvala puno.

## NATAŠA PERIĆ

U redu hvala. Da li se još neko javlja ispred klubova vijećnika? Vijećnik Damir Muratović. Izvolite.

## DAMIR MURATOVIĆ

Hvala predsjedavajuća. U svakom slučaju pohvaljujem revitalizaciju ovog dijela grada dole i sve te projekte koji se angažuju i evo saznao sam neću postavljati pitanje da je znači Bingo kao investitor imao priliku i ranije krenuti sa stambenim objektima ili već poslovnim kako je planirao ali iz njemu poznatih razloga nije. Znači, ova promjena regulacionog plana nije mu, mu omogućava i nadam se da će u što kraćem vremenu to uraditi.

Takođe što se tiče tog dijela Solane meni je žao što nisam prisustvovao ovom svečanom otvaranju. Gospodin Ćerim je bio sa našim gradonačelnikom. Ja sam se efendiji lično izvino nisam bio taj dan spriječen sam bio, tako da nadamo se da će i ona dionica asfalta od 350 metara biti dole produžena barem za nekih 750 metara, tako da ćemo imati situaciju nadamo se. I takođe pohvaljujem i ovu kolegu Hirkića za aktivnosti i Obodnicu takođe i nadamo se da će ta treća traka i taj put Tuzla-Orašje možda proći i kroz Obodnicu ili kroz Mramor tako da u svakom slučaju gdje god se radi mi pohvaljujemo te radove. U svakom slučaju mi smo uz naše građane.

Vezano samo za ovu presudu, odnosno odluku-mišljenje kako god Ustavnog suda vezano za vakufsko zemljište gore pošto se radi o istom investitoru kao i u Skojevskoj ulici znači o Bingu. Samo bih molio račune ovdje smo imali kolega Rifatbegović nekoliko puta radilo se o imovini ili zemljištu ako se ne varam Jevrejske zajednice. Samo sugestija službama da mislim da oni to odgovorno rade i pohvaljujem i šefa Službe Omara Hadžića koji svaki put za govornicom prvo istakne da je sve u skladu sa pozitivnim zakonskim propisima. Samo mi kao Gradski vijećnici stvarno moramo pose-bno voditi računa o imovini Islamske zajednice, Srpske pravoslavne crkve, Katoličke crkve i naravno Jevrejske zajednice. Znači, samo u budućem periodu da strogo vodimo računa ako. Mislim ja te zakonske propise ne poznajem nije nam zgorega tražiti i neko mišljenje posebno da li da se oni izjasne da nemaju nikakvih prava na vlasništvo nad zemljištem koje prodaje, izdaje, renta ili šta već Grad Tuzla. Toliko. Hvala.

## NATAŠA PERIĆ

U redu hvala. Sljedeći za riječ se javio vijećnik Senad Mehmedinović ispred Kluba PDA HDZ.

## SENAD MEHMEDINOVIĆ

Poštovana predsjedavajuća, zamjenice predsjedavajuće Mujkanović, zamjenici predsjedavajuće na rezervnoj klupi. Dakle, imam jedno pitanje koji se odnosi na izmjenu dijela regulacionog plana i odnosi se na tačku dva projekcije izgradnje i uređenja izmjene dijela prostorne cjeline. Dakle, nisam od onih koji zastupa Podravku pa da se miješam u sve stvari i ne volim da se miješam u one materije koje slabije poznajem. Međutim, ovdje mi je malo zaparalo oči vezano za neke stvari pa bih volio da dobijem odgovor na to.

Riječ je o izgradnji ovih spratova u sklopu regulacionog plana pa imamo vamo interesantne ove nazive lamele B1-B2 interesantno pop 4-pop 6 recimo, ali sve kad se sabere to ispadne 20 nekih spratova i sad u izmjeni regulacionog plana ovih 20 spratova se povećava govorim ukupno na 28 spratova. To znači da će se izmjenom regulacionog plana predviđa se da zgrade budu više za 8 spratova. I ako pretpostavimo da svaki sprat ima po 4 stana to je 32 stana puta neka prosječna cijena, to je četiri-pet miliona konvertibilnih maraka za investitora.

Dakle, zanima me zbog čega se povećava ova spratnost i da li se već zna ko će da bude investitor ovog projekta dole u dijelu regulacionog plana? Hvala ljepo.

## NATAŠA PERIĆ

U redu hvala. Zaključujem raspravu klubova vijećnika.

Otvaram raspravu vijećnika. Niko se ne javlja. Zatvaram raspravu vijećnika.

Stavljam na izjašnjava...Molim? (Odgovori.) Aha. Hoćete Omare samo odgovoriti na pitanja proistekla iz diskusije pa pauza.

## OMAR HADŽIĆ - Pomoćnik gradonačelnika za Službu za prostorno uređenje i zaštitu okoline

Zahvaljujem se predsjedavajuća. Lijep pozdrav vama i svima prisutnima naravno i hvala vijećnicima na konstruktivnoj raspravi i postavljenim pitanjima. Ja sam naravno kao i uvijek na raspolaganju da dam odgovore kako bi vijećnici mogli zauzeti kvalitetni stav i na kraju se izjasniti o materijalu.

Vijećnik Kapidžić je postavio pitanje da li se mijenja samo dio regulacionog plana. Evo ja ću podsjetiti Gradsko vijeće da je u januaru mjesecu razmatran prijedlog Odluke o pristupanju izradi izmjene dijela Regulacionog plana prostorne cjeline Solana Sjever. Taj materijal je usvojen. Objavljen u Službenom glasniku broj: 1 iz januara 2022. godine i tu je dat dakle, tom odlukom svojevrsan nalog Službi za prostorno uređenje kao nosiocu pripreme svakog ovakvog materijala i Upravnoj organizaciji Zavod za urbanizam kao nosiocu izrade da u roku od 6 mjeseci izrade prijedlog izmjene dijela obuhvata regulacionog plana. Samom tom odlukom i grafičkim prilogom te odluke iz januara ove godine definisano je da je površina obuhvata izmjene dijela regulacionog plana 1,36 hektara dok je cijeli obuhvat dakle, regulacionog plana koji je na snazi iz 2015. godine površine 10,3 hektara. Evo to bi bilo što se tiče odgovor na pitanje gospodina Kapidžića.

Što se tiče pitanja ovog koje ste postavili vezano za uvodni tekstualni dio grafike to ćemo vidjeti ako bude kolega arhitekta iz Zavoda za urbanizam trebao nešto da dopuni. Ja ću samo reći da je ova odluka koju sam maloprije spomenuo koju je Gradsko vijeće usvojilo u januaru proistekla iz inicijative koja je u skladu sa zakonom podnesena od strane vlasnika i posjednika zemljišta. Bingo je vlasnik i posjednik zemljišta u kojem je i ranije u petnjestoj godini, ne znam kad su postali vlasnici i posjednici u to ne mogu ulaziti međutim, ta površina na kojoj su planirane ove četiri lamele je u njihovom vlasništvu i posjedu. Oni su u skladu sa zakonom imali pravo da podnesu inicijativu. Inicijativa je razmatrana od strane Zavoda za urbanizam i Službe za prostorno uređenje. Ona je u skladu sa zakonom. Ništa što su zatražili nije nezakonito. Kolege urbanisti su to razmatrali i utvrdili da je inicijativa osnovana i tako smo zapravo i došli u januaru do Odluke o pristupanju izmjeni dijela obuhvata ovog regulacionog plana. Hoće li, ako se danas usvoji ovaj regulacioni plan taj investitor pristupit, podnijet zahtjev za urbanističku, hoće li je dobit, hoće li podnijet zahtjev za građevinsku mi to ne možemo danas nagađat. Hoće li raspolagat tom imovinom, hoće li uzet nekog da bude suinvestitor s njima to je već stvar poslovne politke vlasnika i posjednika te zemlje.

Dakle, mi ne možemo u to ulazit koja je prodajna cijena kvadrata stana i sl. zaista nije u nadležnosti ni Zavoda za urbanizam ni Službe za prostorno, ali je činjenica da ono što su oni zatražili a to je po dodatna dva sprata po svakoj od te četiri lamele što je ukupno kao što ste rekli 8 spratova.

Njihova je obaveza bila da obezbjede i dodatni i odgovarajući broj parking mjesta. Jer jedan stan po zakonu mora da ima obezbjeđeno jedno parking mjesto po dakle, tim urbanističkim standardima što su oni i ispoštovali. I sve je to zapravo ovdje i ovim izmjenom regulacionog plana u grafičkom prilogu i prikazano.

Evo ja toliko. (NATAŠA PERIĆ – U redu hvala.) Naravno ako ima dodatnih pitanja i ako treba i dodatna pojašnjenja evo ja sam na raspolaganju.

**NATAŠA PERIĆ**

U redu. U redu hvala. Dajem pauzu od 10 minuta većina sastanak. (Pauza.)

Stavljam na izjašnjavanje IZMJENU DIJELA REGULACIONOG PLANA PROSTORNE CJELINE. Molim vas malo tišina. (OMER BERBIĆ – Poslovnička.) Poslovnička. Omer Berbić. Izvolite.

**OMER BERBIĆ**

Ja bih vas stvarno molio kada tražite pauze ako zatražite 10 minuta onda barem da se držimo da bude 10 minuta ili ako će se odužiti, a pretpostavlja se da će se odužiti, onda nam barem recite da se i mi znamo organizovati.

**NATAŠA PERIĆ**

U redu. (OMER BERBIĆ – Hvala.) Uvažavam sugestiju. Molim? Poslovnička Damir Muratović. Izvolite.

**DAMIR MURATOVIĆ**

Od početka evo kako sam u Vijeću nismo pravili problem oko pauza do 30 minuta. Predsjedavajuća ide na vaš prijedlog, a preko 30 minuta mora glasat Gradsko vijeće i nikad nismo pravili problem oko toga ali ovo je danas šesta-sedma pauza.

Samo vas molim znači, da poštuju Poslovnik i sve pauze preko 30 minuta da-se daju na glasanje. Hvala.

**NATAŠA PERIĆ**

U redu hvala. Uvažavam sugestiju.

Stavljam na izjašnjavanje IZMJENU DIJELA REGULACIONOG PLANA PROSTORNE CJELINE “SOLANA SJEVER” U TUZLI

ODLUKU O IZMJENI I DOPUNAMA ODLUKE O PROVOĐENJU REGULACIONOG PLANA PROSTORNE CJELINE “SOLANA SJEVER” U TUZLI I

ODLUKU O USVAJANJU IZMJENE DIJELA REGULACIONOG PLANA PROSTORNE CJELINE “SOLANA SJEVER” U TUZLI sa amandmanom.

(SLAĐANA KRAJINA – Amandman je uz b) Dobro. (SLAĐANA KRAJINA – Amandman je uz b)

Hoćete pročitati samo amandman koji je gradonačelnik pod tačkom b) vezano za ovu odluku priložio?

**SLAĐANA KRAJINA – sekretar Gradskog vijeća Tuzla**

Amandman na prijedlog ODLUKE O IZMJENI I DOPUNAMA ODLUKE O PROVOĐENJU REGULACIONOG PLANA PROSTORNE CJELINE „SOLANA SJEVER“ U TUZLI.

U prijedlogu Odluke o izmjeni i dopunama Odluke o provođenju Regulacionog plana prostorne cjeline Solana Sjever u Tuzli, član 17. mijenja se i glasi:

„Dio prostorne cjeline Solana Sjever, prije izrade Prostornog plana Grada Tuzle za period 2010.-2030. godina, nalazio se u okviru granica izdvojenog eksploatacionog polja rudnika uglja „Moluhe“, koji je zatvoren 1963. godine. Ovo eksploataciono polje je, nakon provedenih

zakonskih procedura, zvanično „brisano“ iz katastra eksploatacionih polja, čiju evidenciju vodi Federalno ministarstvo energetike, rudarstva i industrije, te je navedena promjena ugrađena u grafički dio usvojenih Izmjena i dopuna Prostornog plana za područje Tuzlanskog kantona 2005 – 2025. („Službene novine Tuzlanskog kantona“, broj 14/21).

Imajući u vidu navedeno, za sve planirane objekte u okviru Regulacionog plana u fazi izdavanja urbanističke saglasnosti, više nije potrebno tražiti mišljenje rudarskog preduzeća koje je vršilo eksploataciju, u smislu odredbi člana 110. Zakona o rudarstvu („Službene novine Federacije Bosne i Hercegovine“, broj 26/10.). Međutim, za dio planiranih objekata i terena koji se nalazi unutar područja gdje je nekad vršena značajnija eksploatacija uglja (dio terena iznad napuštenih podzemnih rudarskih radova), potrebno je u postupku izdavanja urbanističke saglasnosti provesti odgovarajuća geološko - geotehnička istraživanja, koja trebaju da definišu stepen konsolidacije masiva iznad starih rudarskih radova, a u skladu sa propisima kojima se uređuje oblast prostornog uređenja i građenja.“

### **NATAŠA PERIĆ**

U redu. Sad stavljam na izjašnjavanje pročitane podtačke sa pročitanim amandmanom na izjašnjavanje. Hvala. Glasanje je okončano.

Konstatujem da su pročitane podtačke sa amandmanom, odnosno odluke usvojene sa, 31 glas za, niko nije bio protiv i nije bilo suzdržanih.

Prelazimo na šestu tačku. (ADMIR ČAVALIĆ – Poslovnička.) Molim? Poslovnička. (ADMIR ČAVALIĆ – Imamo zaključak.) Jel bilo zaključaka? (SLAĐANA KRAJINA – Jeste bio jedan prijedlog zaključka.) Aha. Dobro. Dobro. Izvinjavam se.

### **SLAĐANA KRAJINA – sekretar Gradskog vijeća Tuzla**

- Gradsko vijeće Tuzla traži da se hitno krene sa toplifikacijom do Spomen doma Moluhe.

### **NATAŠA PERIĆ**

Ma dobro. U redu. Molim vas da se izjasnite o pročitanoj zaključku.

### **SABIHA MUJKANović MUJAČIĆ – zamjenik predsjedavajućeg Gradskog vijeća Tuzla – samostalni vijećnik**

Glasanje je okončano. Konstatujem da je zaključak usvojen sa, 31 glas za, nije bilo protiv i nije bilo suzdržanih.

Prelazimo na tačku broj šest:

### **RAZMATRANJE I USVAJANJE: ODLUKE O DAVANJU SAGLASNOSTI ZA ZAKLJUČENJE UGOVORA O REGULISANJU MEĐUSOBNIH PRAVA I OBAVEZA U VEZI SA POVJERAVANJEM NA UPRAVLJANJE DOBRA U OPĆOJ UPOTREBI I JAVNOG DOBRA**

Predlagač je gradonačelnik Grada Tuzla.

Obrađivač je Služba za ekonomski razvoj, poduzetništvo i poljoprivredu.



Materijal su razmatrali: Komisija za statutarna pitanja i propise, Komisija za ekonomske odnose, Komisija za poduzetništvo i klubovi vijećnika.

Ima li potrebe za uvodno izlaganje? Nema.

Ima li potrebe da se pročitaju izvještaji Komisija? Nema.

Otvaram raspravu klubova vijećnika. Admir Čavalić.

### **ADMIR ČAVALIĆ**

Hvala puno dopredsjedavajuća. Imam samo jedno kratko pitanje. Razumijem da je ovo došlo shodno ovoj finansijskoj Reviziji Grada Tuzla koju smo prošli put razmatrali. Bila je septembarska-oktobarska objavljena prošle godine. Mene zanima samo jedno konkretno pitanje.

Zašto sada se donosi ova odluka zašto se nije ranije donijela u vezi Mejdana dakle, o upravljanju dobra o opštoj upotrebi javnim dobrima kad znamo da su odluke koje se odnose na javno dobro ranije donesene dakle, samo pitanje da mi se odgovori zašto zašto sada zašto se ranije nije donijela ova odluka? Hvala.

### **SABIHA MUJKANović MUJAČIĆ – zamjenik predsjedavajućeg Gradskog vijeća Tuzla – samostalni vijećnik**

U redu. Ima li još prijavljenih za diskusiju ispred klubova vijećnika? Nema.

Da li se neko prijavljuje za diskusiju ispred vijećnika? Nema.

Zatvaram raspravu i pozivam da se odgovori na pitanje.

### **ZIJAD LUGAVIĆ - Pomoćnik gradonačelnika za Službu za ekonomski razvoj, poduzetništvo i poljoprivredu**

Poštovana predsjedavajuća, sekretaru Gradskog vijeća, uvaženi, uvažene vijećnice i uvaženi vijećnici sve vas srdačno pozdravljam.

Ja lično odgovor na ovo pitanje ne bih mogao da vam dam obzirom da smo mi dobili javna preduzeća u ovu Službu u naš dio odgovornosti tek prije godinu-godinu i nešto.

Zbog čega to nije prije toga urađeno ne bih mogao ovom je li prilikom i u ovom trenutku da dam odgovor, ali evo možete doći kod mene u Službu u narednoj sedmici. Ja ću nastojati da dobijem adekvatno obrazloženje i isto ću vam prenijeti.

### **SABIHA MUJKANović MUJAČIĆ – zamjenik predsjedavajućeg Gradskog vijeća Tuzla – samostalni vijećnik**

Sada stavljam na izjašnjavanje prijedlog ODLUKE O DAVANJU SAGLASNOSTI ZA ZAKLJUČENJE UGOVORA O REGULISANJU MEĐUSOBNIH PRAVA I OBAVEZA U VEZI SA POVJERAVANJEM NA UPRAVLJANJEM DOBRA U OPĆOJ UPOTREBI I JAVNOG DOBRA i pozivam vijećnike da aktiviraju uređaje za elektronsko glasanje. U redu. Glasanje je okončano.

Konstatujem da je:

ODLUKA O DAVANJU SAGLASNOSTI ZA ZAKLJUČENJE UGOVORA O REGULISANJU MEĐUSOBNIH PRAVA I OBAVEZA U VEZI SA POVJERAVANJEM NA UPRAVLJANJEM DOBRA U OPĆOJ UPOTREBI I JAVNOG DOBRA usvojena sa,

30 glasova za, nije bilo protiv i nije bilo suzdržanih.

Prelazimo na sljedeću tačku Dnevnog reda.

**NATAŠA PERIĆ**

Sljedeća tačka je:

**RAZMATRANJE I USVAJANJE:**

**ODLUKE O RASPISIVANJU JAVNOG OGLASA ZA IZBOR I IMENOVANJA DVA ČLANA NADZORNOG ODBORA U JAVNOM KOMUNALNOM PREDUZEĆU "PANNONICA" d.o.o. TUZLA (sa tekstom Javnog oglasa)**

**b) ODLUKE O UTVRĐIVANJU POSEBNIH USLOVA I KRITERIJA ZA IZBOR I IMENOVANJA DVA ČLANA NADZORNOG ODBORA U JAVNO KOMUNALNOM PREDUZEĆU "PANNONICA" d.o.o. TUZLA U KOJEM GRAD TUZLA VRŠI OVLAŠTENJA PO OSNOVU UČEŠĆA DRŽAVNOG KAPITALA**

**c) RJEŠENJA O IMENOVANJU KOMISIJE ZA IZBOR DVA ČLANA NADZORNOG ODBORA U JAVNO KOMUNALNOM PREDUZEĆU "PANNONICA" d.o.o. TUZLA, U KOJEM GRAD TUZLA VRŠI OVLAŠTENJA PO OSNOVU UČEŠĆA DRŽAVNOG KAPITALA I**

**d) ODLUKE O PRIJEDLOGU KANDIDATA ZA PRIVREMENO IMENOVANJE NA UPRAŽNJENA MJESTA DVA ČLANA NADZORNOG ODBORA IZ REDA DRŽAVNOG KAPITALA**

Predlagač je gradonačelnik Grada Tuzla.

Obrađivač je Služba za ekonomski razvoj, poduzetništvo i poljoprivredu.

Materijal su razmatrali: Komisija za statutarna pitanja i poljoprivredu. Ne. Obrađivač je služba dobro.

Materijal su razmatrali: Komisija za statutarna pitanja i propise, Komisija za ekonomske odnose, Komisija za poduzetništvo, Komisija za izbor i imenovanja (pod c i d) i klubovi vijećnika.

Ima li potrebe za uvodnim izlaganjem? (Nema.)

Ima li potrebe da se pročitaju izvještaji Komisija? (Nema.)

Otvaram raspravu klubova vijećnika. Vijećnik Damir Muratović.

**DAMIR MURATOVIĆ**

Hvala. Ponovno imamo jako lošu praksu na koju smo prošli i pretprošli put upozoravali da direktori javnih preduzeća i ustanova budu članovi nadzornih i upravnih odbora drugih preduzeća i javnih ustanova u Gradu Tuzla.

Neću postavljati pitanje zar nemate drugih kandidata zato što je sve u skladu sa zakonom i čak ovdje je imponantna biografija direktorice Turističke zajednice i kompetencije ništa nije sporno. Čak i povezanost ustanove, odnosno Turističkog ureda na čijem je čelu sa Panonikom i to mogu razumjeti, ali uporno s obzirom da je imala već jedan mandat to je klasičan po meni sukob interesa, sukob funkcija.

Znači, tako da molim vas stvarno ovo kako možemo reći pod navodnicima praksa, da se stvarno ta negativna praksa ukine. Ako ste već direktor javnog preduzeća i ustanove pa ne morate brate biti i u nadzornom ili upravnom odboru pored ovoliko mladih i kompetentnih ljudi koji nam svaki dan odlaze znači. Hvala. Toliko.

**NATAŠA PERIĆ**

U redu hvala. Vijećnik Admir Čavalić ispred Kluba Naša stranka i Stranka za Bosnu i Hercegovinu.

## ADMIR ČAVALIĆ

Hvala puno. Dakle, ja ću aktualizirati vjerovatno ovo što je kolega Damir govorio, a prije toga zanima me zašto nema biografije od gospodina Latifa Ahmedića dakle, dobili smo samo biografije jednog prijedloga kandidata a imamo piše da su dva prijedloga dakle, iz reda državnog kapitala Latif Ahmedić i Amra Jaganjac? I onda nam je samo Amra Jaganjac na čemu čestitam i zaista imponantna biografija, dostavila evo vidite ova zadnja stranica ali ja nisam dobio, možda ste ostali dobili. Zašto nema Latif Ahmedić?

Mislim neozbiljno je da dobijemo samo biografiju jednog člana. Možda bolje onda nemojte nam ovo pripremat, nemojte ni jednu da ne dobivamo da nema ni jedne ni druge. Jel poslao gospodin Latif i sl.? Evo ja samo pokazujem kako je kod mene. Dakle, vidim samo Amra Jaganjac. Volio bih da vidim da li je tehnička greška ili zaista gospodin nije poslao svoju biografiju. To je prva stvar.

Druga ovo maloprije što je Damir govorio. Možda da napravimo pauzu ili nešto da vidimo da ispitamo jel sukob interesa dakle, da se direktor, odnosno voditeljica Turističkog ureda – Turističke zajednice Grada Tuzla koja je imenovana da se postavlja u nadzorni odbor. (NATAŠA PERIĆ – Izvinjavam se Admire pa Služba će dati odgovor odmah.) Ja, ja. Pa dobro, dobro. Samo...(NATAŠA PERIĆ – Nećemo praviti pauzu ovdje nek da odma.) Dobro. Iz reda državnog kapitala JKP Panonika. Dobro.

Dalje. Pozivam sve građane da se prijave. Mislim u fokusu ove tačke Javni oglas. Hajd manje više što smo privremeno imenovali nadzorni odbor. Pozivam sve građane i građanke Tuzle. Molim vas prijavite se na ovo.

I upućujem zaključak da izmjenimo ovu odluku, odnosno tekst Javnog oglasa. Samo kratko jedna rečenica mislim da će se svi složiti.

Kaže: Javni oglas će se objaviti u Službenim novinama Federacije Bosne i Hercegovine i u dnevnom listu Večernji list BiH Mostar.

Moj prijedlog izmjene i da to bude zaključak Gradskog vijeća je sljedeći. Ova rečenica glasi na način: Javni oglas će se objaviti u Službenim novinama Federacije Bosne i Hercegovine zarez u dnevnom listu Večernji list BiH – Mostar i na internet stranici javnog poduzeća, odnosno da se Javni oglas objavi na internet stranici Panonike Tuzla.

Mislim da je ovo jedan iskorak. Ja nisam obračao pažnju na to ne prijavljujem se na upravne i nadzorne odbore, ali građani mi kažu da to se na nekim zvaničnim stranicama internet ne objavljuje dakle, javnim ustanovama ne objavi se. Jednostavno onda građani moraju kupovati dnevni list ili tražiti službene novine.

Dakle, moj prijedlog i mislim da je vrlo konstruktivan i jasan. Nema razloga da bježimo od navedenog. Samo da se objavi na internet stranici. Zvaničnoj internet stranici Panonike Tuzla.

To upućujem i u formi zaključka a možemo i reformulisat samo da nam se ovaj tekst malo izmijeni. Dakle, jedan zarez je tu i samo se dodaje na zvaničnoj internet stranici i to je to. Hvala vam puno.

## NATAŠA PERIĆ

U redu hvala. Da li se još neko javlja ispred klubova vijećnika? Niko se ne javlja. Zatvaram raspravu klubova vijećnika.

Otvaram raspravu vijećnika. Vijećnik Berbić. Izvolite.

## **OMER BERBIĆ**

Hvala lijepo. Mene konkretno zanima ova praksa da mi objavljujemo ove pozive u Večernjem listu. Znači, govorim o dnevnom listu koji nije najčitaniji, nije vjerovatno ni među top pet najčitanijih na našem području. Zanima me po kojem osnovu mi to objavljujemo tamo i zbog čega i zanima me također da li ima mogućnost da mi uzmemo neko ispitivanje tržišta, ispitivanje javnog mijenja koji je list najčitaniji pa da se objavi?

Možda bi time dobili veći broj kandidata za upravne i nadzorne odbore i ostale komisije. Ovako smatram da sužavamo eventualni broj ljudi koji bi mogli kvalitetno i kvalitetnije da obavljaju ove funkcije nadzornih i upravnih odbora. Hvala lijepo.

## **NATAŠA PERIĆ**

U redu hvala. Da li se još neko javlja od vijećnika? Vijećnik Nikica Vidović. Izvolite.

## **NIKICA VIDOVIĆ**

Ništa samo mogla bi bit ako već to ispravka u jednom od dnevnih novina, a kolko sam ja shvatio vi ste rekli da će biti objavljeno na stranici tako da ne vidim nikakav problem. A za one koji imaju problem, meni se svako jutro isporučuje Večernji list vrlo rado ću dati na čitanje. Hvala.

## **NATAŠA PERIĆ**

U redu hvala. Zaključujem raspravu vijećnika.

Zamoliti ću pomoćnika gradonačelnika Službe za ekonomski razvoj, poduzetništvo i poljoprivredu da odgovori na postavljena pitanja.

## **ZIJAD LUGAVIĆ - Pomoćnik gradonačelnika za Službu za ekonomski razvoj, poduzetništvo i poljoprivredu**

Još jednom vas sve srdačno pozdravljam. Ja sam evo evidentirao vaša pitanja pa ću pokušati redosljedom da dajem odgovore kako ste ih i postavljali.

Prvo pitanje je bilo vezano za voditeljicu ureda koja je predložena da bude imenovana za vršioca dužnosti dakle, ne za člana nadzornog odbora, nego za vršioca dužnosti u vremenskom periodu od tri mjeseca, odnosno do okončanja procedure izbora kandidata po ovom Javnom pozivu.

Dakle, praksa je da oni članovi nadzornih – upravnih odbora kojima mandat ističe budu imenovani da budu vršioci dužnosti do momenta izbora novih i mislim da je to najrealnija i najobjektivnija osnova da ljudi koji su i bili tu i nastave još tri mjeseca dok se ne izaberu novi. To je jedno pitanje. Dakle, ovdje nije red o ponovnom, nije dakle riječ o ponovnom izboru istih u novi mandat nego je dakle, riječ o izboru privremenih kandidata za kandidate vršioca dužnosti članova nazornog odbora.

Drugo pitanje je sukob interesa.

Dakle, voditeljica ureda turističke zajednice Grada Tuzle nije ni direktorica pod broj jedan, a Turistička zajednica nije ni javno preduzeće ni javna ustanova. Dakle, Turistička zajednica se imenuje po Zakonu o turističkim zajednicama i ovdje nema dakle, govora o sukobu interesa.

Treće. Što se tiče biografije gospodina Latifa Ahmedića ja ne znam zbog čega nije dostavljena jel on je dostavio uredno i mi smo je prosljedili. (SLAĐANA KRAJINA – Evo sad su mi pojasnile. Znači, elektronski je dostavljena svim vijećnicima, a izgleda da je došlo greško...prilikom kopiranja nema te stranice. Evo sad vidim da je nema ni kod mene. Znači, elektronski ste dobili biografiju.)

Tako obzirom na ovo ja sam insistirao kao jedan od zaključaka čini mi se prošle sjednice Gradskog vijeća je bio i za ove osobe koje imenujemo kao vršioce dužnosti da dostavimo biografiju i ja sam to naknadno nakon Kolegija tražio da nam se dostavi biografija kako bi sve bilo transparentno i kako biste imali na raspolaganju sve informacije prije donošenja, prije donošenja odluka.

Zašto u Večernjem listu BiH Mostar? Zbog tog što je ta dnevna novina je li prošla na Javnom pozivu koji je Grad Tuzla raspisao. Prema tome mi tu moramo htjeli ne htjeli objavljivati, objavljivati sve.

Sljedeće je Objava na internet stranici.

Ja moram da vidim šta piše u statutu. Dakle, statut određuje gdje će se raspisivati. Ukoliko piše i nema pravne smetnje da se može objaviti na web stranici ja ću zamoliti direktora da objavi dakle Javni poziv i na web stranici. Dakle, samo da provjerimo pravni osnov da li to može da ne bi prekrši-li bilo bilo koji član bilo koje odluke pa evo statuta ili ili bilo kojeg drugog propisa.

## **NATAŠA PERIĆ**

U redu. To je to? Hvala Zijad. (ZIJAD LUGAVIĆ – Ja mislim da sam dao sve odgovore.) Jeste.

Stavljam na izjašnjavanje pod a) ODLUKU O RASPISIVANJU JAVNOG OGLASA ZA IZBOR I IMENOVANJE DVA ČLANA NADZORNOG ODBORA U JAVNO KOMUNALNO PREDUZEĆE “PANNONICA” D.O.O. TUZLA (SA TEKSTOM JAVNOG OGLASA)

ODLUKU O UTVRĐIVANJU POSEBNIH USLOVA I KRITERIJA ZA IZBOR I IMENOVANJE DVA ČLANA NADZORNOG ODBORA U JAVNO KOMUNALNOM PREDUZEĆU “PANNONICA” TUZLA U KOJEM GRAD TUZLA VRŠI OVLAŠTENJA PO OSNOVU UČEŠĆA DRŽAVNOG KAPITALA

RJEŠENJA O IMENOVANJU KOMISIJE ZA IZBOR DVA ČLANA NADZORNOG ODBORA U KOJEM GRAD TUZLA VRŠI OVLAŠTENJA PO OSNOVU UČEŠĆA DRŽAVNOG KAPITALA I

d) ODLUKE O PRIJEDLOGU KANDIDATA ZA PRIVREMENO IMENOVANJE NA UPRAŽNJENA MJESTA DVA ČLANA NADZORNOG ODBORA IZ REDA DRŽAVNOG KAPITALA U JAVNO KOMUNALNOM PREDUZEĆU “PANNONICA” d.o.o. TUZLA. Molim vijećnike da se izjasne. Glasanje je okončano.

Konstatujem da su pročitane odluke i rješenje usvojeni sa,  
30 glasova za, niko nije bio protiv i nije bilo suzdržanih.

Prelazimo na osmu tačku:

### **RAZMATRANJE I USVAJANJE:**

**ODLUKE O DAVANJU PRETHODNE SAGLASNOSTI NADZORNOM ODBORU JAVNOG PREDUZEĆA BIT CENTAR d.o.o. U TUZLI ZA IMENOVANJE DIREKTORA DRUŠTVA**

Predlagač je Nadzorni odbor Javnog preduzeća “BIT Centar” d.o.o. u Tuzli.

Obrađivač je Nadzorni odbor Javnog preduzeća "BIT Centar" d.o.o. u Tuzli i Služba za ekonomski razvoj, poduzetništvo i poljoprivredu.

Materijal su razmatrali: Komisija za statutarna pitanja i propise, Komisija za ekonomske odnose, Komisija za poduzetništvo i klubovi vijećnika.

Ima li potrebe za uvodnim izlaganjem? (Nema.)

Ima li potrebe da se pročitaju izvještaji Komisija? (Nema.)

Otvaram raspravu klubova vijećnika. Vijećnik Admir Čavalić.

## **ADMIR ČAVALIĆ**

Hvala puno predsjedavajuća. Dozvolite prije svega da čestitam kandidatu kolegi Robertu poznajem ga lično. On je i kolega ekonomista. Nisam iskreno znao da je već 17 godina direktor dakle, i on spada u red mlađih direktora na području našeg grada. Želim mu dakle, uspješne još četiri godine. To će biti dvadeset i jedna godina akobogda a stvarno uspješno vodi ovaj centar. Sad kažem mladoliko izgleda, drži do sebe svaka mu čast dakle i nadam se da će nastaviti i ove certifikate da dobiva i da se dalje educira i da napreduje, akobogda i doktorat uskoro da zaradi i ostvari.

Ono što opet želim ovdje problematizirati iako je bio jedan kandidat opet je Komisija dala identične ocjene pet-pet-pet. Molim vas nek se neko udostoji iz članova Komisije pa dadne i 4,95 neće ga ništa koštati puno. Jedan je kandidat. Jedan će proć, al nemojte da opet maksimiziramo te ocjene.

Dakle, to je samo moja bila zamjerka i kažem zaista ja sam mislio da je kolegi ovo treći mandat ili drugi svejedno. Vidio sam od 2005. godine je aktivan fondacija BIT, tako da želim još četiri uspješne godine akobogda dvadesetjedna godina i opet kroz četiri godine do makar 30 godina da vodi ovaj BIT. Hvala puno.

## **NATAŠA PERIĆ**

U redu hvala. Da li se još neko javlja? Niko se ne javlja. Zaključujem raspravu klubova vijećnika.

Otvaram raspravu vijećnika. Vijećnik Berbić. Izvolite.

## **OMER BERBIĆ**

Evo hvala ljepo. Pa prije svega da izrazim svoje nezadovoljstvo činjenicom da opet imamo jednog kandidata na Javnom oglasu što je opet dokaz koliko su ljudi u Tuzli izgubili nadu da, izgubili vjeru u javni konkurs, a čim se izgubi vjera u javni konkurs gubi se vjera i u institucije u javna preduzeća itd. i smatram da je ovo zaista jedna spirala u koju smo ušli gdje moramo na neki način probat da se izvadimo, a to se jedino može depolitizacijom javnih preduzeća i depolitizacijom Gradske uprave.

Možda bi bilo interesantno ne računajući da kažem evo BIT centar za kojeg smatram da je zaista jedno kvalitetno preduzeće, možda bi bilo interesantno da malo krenemo razmišljati o tome da se ograniči mandat na dva mandata kako bi svaki puta kada dođe novi direktor. Evo sad smo i vidjeli imamo novog direktora Saobraćaj i komunikacije, imamo novu direktoricu Centralnog grijanja. Kada dođu novi direktori na neku poziciju gdje su ljudi tu po 15-20 godina stvarno se osjeti razlika i osjeti se neka promjena. Osjeti se neka energija. Osjeti se da ti ljudi žele da postignu nešto s tim preduzećem. Možda bi bilo interesantno da razmislimo o neformalnom ograničavanju na dva mandata, pa evo i kolega Robert za kojeg smatram da je izuzetno kvalitetan kadar možda da uzme neku od drugih javnih institucija da je digne na isti nivo na kojim je postavio i ovaj BIT centar.

U tom kontekstu možda bi trebalo da promijenimo paradigmu Gradskog vijeća i da promijenimo malo način na koji biramo, jer ovako izgleda mi da smo svi upali u neku spiralu pesimizma, da smo svi upali u spiralu toga da se ljudi ne javljaju na javne konkurse i da je sve politički podobno i da se sve politički bira. Smatram da je to veliki problem grada Tuzle. I opet kažem. Novi direktori i direktorica i direktor koje sam pohvalio zaista su za par mjeseci napravili napravili strašan posao barem po onom što sam ja vidio i što sam dobio informacije. Hvala ljepo.

## **NATAŠA PERIĆ**

U redu hvala. Vijećnik Admir Čavalić.

## **ADMIR ČAVALIĆ**

Hvala puno predsjedavajuća. Evo slušajući mlađeg kolegu iz Kluba moram i ja dakle, da navedem i jedno zapažanje i zaista evo novi direktori Saobraćaj i komunikacije, Mejdan, Centralno grijanje ostvaruju rezultate zato što su tek došli i hoće da se dokažu. Tako bi bilo i sa nekim drugim dakle i komunalac dakle, je jedno vrijeme je svježije bio, kolega Admir i sl. dakle, i to su uglavnom bili dijelovi nekih političkih dogovora koalicija i dobro je to. Ja sam ako se sjećate u Narodnom pozorištu naveo sviđa mi se što se ide u demokratizaciju javnih ustanova i javnih poduzeća na području grada Tuzla.

Ja na bazi rasprave kolege Berbića predlažem zaključak da mi kao Gradsko vijeće predložimo nadležnim službama da idu u pravcu da se ograniče mandati direktora na dva, dakle osam godina. Mislim da je osam godina dovoljno da se dokažete. Ako predsjednik Sjedinjenih Američkih Država može biti osam godina i ako naši predstavnici bez kontinuiteta dakle, mogu samo ono osam godina pa onda moraju pauzu praviti možda i naši direktori možda da bude osam godina maksimalno. Jer inače dakle, po Tuzli se ovdje priča o direktorima koji su tu 20 godina. Pazite 20 godina je stvarno velik period. Mi ne živimo kao kornjače. Živimo dosta kraće. 20 godina je velik. Dakle, dijete se rodi i krene na fakultet to je 20 godina dakle, i ode u Njemačku je li nažalost. Nije možda dobro da...Čovjeku i dosadi. Bilo kakav posao da ga radite 20 godina jednostavno dosadi i ne možete normalno davati rezultate.

Ovo naravno nema veze sa kolegom Robertom. On izuzetno radi i on se kroz ovu njegovu impresivnu biografiju konstantno dakle usavršava. Evo sad i treba da doktorira i ide napreduje itd. (NATAŠA PERIĆ – Molim vas malo tišine.) Ovo ima i inače sa konceptom, ne bi ovdje nikad ne napadam ad hominem osobe dakle, konceptualno nije dobro grad Tuzla da bude grad staračkih ovih direktora. Dakle, da se tu ko baje dakle vuku po dvajst-dvajspet godina. Mislim onako je malo i smiješno. Malo pratiti neke druge urbanije gradske sredine gdje su direktori četiri godine, osam-deset maksimalno i onda ide dalje dakle, mijenja profesiju. Ode nešto drugo da radi da ga inspirira itd.

Dakle, da mi damo u jednom ljepom duhu da se to teži tome da se direktori ili oni da se ne prijavljuju ili da mi im ograničimo da budu samo dva mandata na osam maksimalno godina i to je to. Hvala vam puno.

## **NATAŠA PERIĆ**

U redu. Omere zašto se javljate? (Za riječ.) Hajde. Mislila sam da je replika nisam džaba pitala.

## **OMER BERBIĆ**

E hvala ljepo. Pa evo na bazi inspirativnog govora kolege Čavalića (NATAŠA PERIĆ – Joj al inspirišete jedan drugog de se više inspirišite.) De nas i vi malo inspirišite molim vas. Na bazi inspira...Ne zaista, zaista ozbiljno na ozbiljnu temu.

Volio bi da kada kada dobijamo i biografije i kada dobijamo prijedloge za direktore da nam dođu direktori i da nam daju svoj plan rada i da nam daju koncept u kojem oni žele da provedu preduzeće, jer kada dobijemo izvještaj nakon što imenujemo direktora ja bih stvarno volio da imam nečemu po čemu treba da sudim a to jeste po rezultatima. Ukoliko nam direktor kaže. Uradit ćemo to, to i to za šest mjeseci, za godinu dana, za dvije godine, za četiri godine i mi podržimo, ja želim svake godine da pratim na izvještaju šta se uradilo. I ukoliko je 70% uspješno treba da podržimo ljude.

I zato na bazi ovog dajem zaključak da zahtjevamo, da zahtjevamo da se u budućnosti direktori javnih preduzeća obraćaju sa svojim planom, dugogodišnjim planom rada od četiri godine kako bi mi mogli da pratimo njihov rad na bazi njihovih, njihovih, na bazi onoga što nam oni obećaju. Hvala ljepo.

## **NATAŠA PERIĆ**

U redu hvala. Vijećnik Hasib Hirkić. Izvolite.

## **HASIB HIRKIĆ**

Ja ću kratko. Nije ovdje do nas dal se neko prijavio, dal se jedan prijavio ili će se deset prijaviti. Najvjerovatnije da se ovdje moraju poštovati procedure imajući u vidu da najvjerovatnije svi ostali nisu ispoštovali procedure i nisu mogli da konkurišu na to mjesto zbog toga je i jedan i ako to bude išlo na ovom principu znači, mislim da se neće ni prijavljivati oni koji ne ispunjavaju uslove, tako da evo kolega Berbiću da znaš da nije samo zbog toga jedan prijavljen. Hvala.

## **NATAŠA PERIĆ**

U redu hvala. Zaključujem raspravu. Molim? Replika.

## **OMER BERBIĆ**

Pa evo na bazi inspirativnog govora gospodina Hirkića želim da pohvalim njegov napredak u ovim pravnim aktivnostima i da se zahvalim što mi je objasnio. Hvala ljepo.

## **NATAŠA PERIĆ**

Replika. Selma Čatibušić, pa vijećnik Rifatbegović. Jeste i vi repliku? (ZIJA RIFATBEGOVIĆ – Ne, ne neću ja repliku.)

## **SELMA ČATIBUŠIĆ**

Evo na bazi inspira...Šalim se naravno. Samo sam htjela reći kolegi Hasibu pošto je rekao nije do nas. Apsolutno jeste do nas s obzirom da nekako način imenovanja kako direktora tako i osoba u upravne i nadzorne odbore uveliko ovisi o Gradskom vijeću i uopšte ti javni konkursi kako se sprovode ja uvijek spomenem, iako mi mnogi to zamjere konkurs koji se



desio u Gradskoj upravi prije nekoliko mjeseci i način na koji su imenovani, odnosno izabrani ljudi koji su uglavnom bili namještenici, dok su neki magistri prava odbijeni sa više pozicija osam ili čak više. Tako da mislim da trebamo da radimo na transparentnosti što više i na neki način ono što je kolega Omer rekao da vratimo vjeru ljudima u taj javni poziv. Eto toliko.

### **NATAŠA PERIĆ**

Replika. Hasib Hirkić. Molim vas samo malo ozbiljnosti.

### **HASIB HIRKIĆ**

Nije mi niko ništa dao Selma tako da znaš ubuduće da ni od kog ništa ne uzimam ni poklone a kamoli nešto drugo.

Imajući u vidu da ovdje neke stvari nisu jasne ja bi evo zamolio da možda ko zaključak jedan bude. Da nam se od 120.000 građana grada Tuzle ili možda više dostave biografije pa da se mi možemo za njih javljati na konkurse. Eto hvala.

### **NATAŠA PERIĆ**

Zahvaljujem. Replika je li? Replika. Admir Čavalić vijećnici Selmi Čatibušić. Hajte molim vas da privodimo ovo kraju.

### **ADMIR ČAVALIĆ**

E hvala puno. Dakle, repliciram kolegici Selmi vezano za rečenicu koja se odnosi na transparentnost da mi moramo raditi na tome. Ja kažem da mi već radimo na tome.

Pohvaljujem praksu kolege Lugavića dakle, koji nam sada dostavlja biografije. Evo vidjeli smo da je ovo bila tehnička greška. Prije tako nije bilo. Sad dobijamo biografije ne samo za kandidate već i za VD-ove. Hajde sad da uspostavimo praksu što sam maloprije predložio i volio bi sad nismo kao zaključak to, da uglavnom uvijek po automatizmu ako to statut dozvoljava uvijek se Javni oglasi objavljuju na internet stranici i to je unapređenje prakse. I šlag na tortu bi bio da mi zaista na bazi toga i plus one stenograme što sam naveo da dobijemo sa intervjuja kandidata i to je dakle konstruktivan prijedlog dakle, sve to usavršava te prakse konkursa i kad to sve mi posložimo onda ćemo vjerovatno imati pet-šest-deset kandidata. I slažem se sa kolegom Hirkićem ne trebamo mi vuć te kandidate za ruku i da ih mi tjeramo da se prijave, ali mi trebamo pokazat transparentnost i otvorenost institucija. Zašto ja non stop naglašavam institucija? (NATAŠA PERIĆ – Admire ovo već nije replika.) U vrijeme kriza institucije su ključne. Hvala i izvinjavam se.

### **NATAŠA PERIĆ**

Ništa. Vijećnik Zijah Rifatbegović. Diskusija. Izvolite.

### **ZIJAH RIFATBEGOVIĆ – vijećnik Stranke demokratske akcije**

E hvala vam. Ja samo želim čuti od pravnik. Ja mislim da sam dobro pročitao. Ne mogu se sada sjetiti ali ja mislim da postoji zakon da direktor u javnom preduzeću možete biti samo u dva mandata. Ja bih vas zamolio da neko nam to pravno protumači.

Ja mislim da taj zakon postoji. Ako taj zakon postoji onda smo mi ti koji trebamo reći da takva dokumentacija koja se predaje ako neko već je bio dva mandata onda ona nije po

pravilima Federalnog zakona. Tako da ima ta činjenica i ja to znam iz razloga jer su bar kad se govori o Kantonalnim i državnim ustanovama, ne znam za lokalnu upravu, ali evo trebalo bi to nama protumačiti. Ja mislim da postoji zakon koji jasno definiira da direktor u javnom preduzeću možete biti samo dva mandata.

## **NATAŠA PERIĆ**

U redu hvala. Zaključujem raspravu vijećnika.

Ne znam sad gospodine Lugaviću da vi možda date odgovor. Ne znam stvarno kako je u preduzećima i ustanovama. (Zijad Lugavić govori s mjesta bez mikrofona op.a.) Molim? (Zijad Lugavić govori s mjesta bez mikrofona op.a.) Dobro. Dobro. Bit će dostavljen pravni odgovor onda vezano za ovo. Dobro. (Zijad Lugavić govori s mjesta bez mikrofona op.a.)

(SLAĐANA KRAJINA – Ne može. Ne može zbog stenograma s mjesta odgovarat.) Dobro. Nema veze dobit ćete svi pravni odgovor vezano za prijedlog vijećnika Rifatbegovića.

Stavljam na...(ZIJAH RIFATBEGOVIĆ – Izvinjavam se. Izvinjavam se samo da kažem da ovo ne bi bio presedan. Mi smo i ranije birali direktore koji su već tri-četiri mandata davali smo im saglasnost.

Ali mislim ovo što kolege govore da bi bilo lijepo da nam neko samo taj zakon pravni protumači kako ne bi dublje ulazili u te probleme u budućnosti je li?) Dobit ćete. Dobit ćemo svi.

Stavljam na izjašnjavanje ODLUKU O DAVANJU PRETHODNE SAGLASNOSTI NADZORNOM ODBORU JAVNOG PREDUZEĆA BIT CENTAR D.O.O. TUZLA ZA IMENOVANJE DIREKTORA DRUŠTVA. Glasanje je okončano.

Konstatujem da je:

ODLUKA O IMENOVANJU DIREKTORA JAVNOG PREDUZEĆA BIT CENTAR D.O.O. TUZLA usvojena sa,

30 glasova za, niko nije bio protiv i nije bilo suzdržanih i molim sekretara da pročita zaključke. (OMER BERBIĆ – Možemo li pauzu prije zaključaka opozicija da se dogovori?) Dobro. Kolko, koliko? (OMER BERBIĆ - 5 minuta.) Dobro. (Pauza.)

Pozivam vijećnike da uđu u salu. Molim vijećnike da uđu u salu.

Molim Slađanu da pročita zaključke proistekle iz rasprave. Pročitajte.

## **SLAĐANA KRAJINA – sekretar Gradskog vijeća Tuzla**

Prijedlog zaključka:

- Gradsko vijeće Tuzla predlaže nadležnim Službama da razmotre zakonske mogućnosti da se ide u pravcu da se mandati direktora javnih preduzeća čiji je osnivač Grad Tuzla ograniče na dva mandata, odnosno maksimalno na osam godina.

I drugi prijedlog zaključka:

- Gradsko vijeće Tuzla sugeriše da se razmotri mogućnost da se ubuduće direktori za koji se predlaže imenovanje na sjednici Gradskog vijeća Tuzla iznesu svoj plan rada i koncept vođenja preduzeća kako bi Vijeće moglo pratiti njihov rad i realizaciju tog plana.

Molim vijećnike da se izjasne o pročitanim zaključcima. (Opet.) Poništavam glasanje ponovo. Molim vijećnike...Glasanje je okončano.

Konstatujem da pročitani zaključci nisu dobili potrebnu većinu, 8 vijećnika je glasalo za, niko nije bio protiv i 16 suzdržanih.

Prelazimo na devetu tačku:

**RAZMATRANJE I USVAJANJE:**

Pod a) **ODLUKE O DAVANJU SAGLASNOSTI NA ZAKLJUČENJE UGOVORA O ZAKUPU POSLOVNE PROSTORIJE SA ZAKUPCEM JAVNO PREDUZEĆE BIT CENTAR d.o.o. TUZLA I**

b) **ODLUKE O DODJELI U ZAKUP POSLOVNIH PROSTORIJA NEPOSREDNOM POGODBOM JAVNO KOMUNALNO PREDUZEĆE SAOBRAĆAJ I KOMUNIKACIJE d.o.o. TUZLA**

Predlagač je gradonačelnik Grada Tuzla.

Obrađivač je Služba za ekonomski razvoj, poduzetništvo i poljoprivredu.

Materijal su razmatrali: Komisija za statutarna pitanja i propise, Komisija za ekonomske odnose, Komisija za poduzetništvo i klubovi vijećnika.

Ima li potrebe za uvodnim izlaganjem? (Nema.)

Ima li potrebe da se pročitaju izvještaji Komisija? Nema.

Otvaram raspravu klubova vijećnika. Niko se ne javlja. Zatvaram raspravu klubova vijećnika.

Otvaram raspravu vijećnika. Niko se ne javlja. Zatvaram raspravu vijećnika i dajem na glasanje pročitane odluke. Glasanje je okončano.

Konstatujem da su pročitane odluke usvojene sa,

25 glasova za, niko nije bio protiv i nije bilo suzdržanih.

Prelazimo na desetu tačku Dnevnog reda:

**RAZMATRANJE IMOVINSKO-PRAVNIH AKATA:**

Pod a) **ODLUKE O PRODAJI NEKRETNINA U VLASNIŠTVU GRADA TUZLE NEPOSREDNOM POGODBOM RADI OBLIKOVANJA GRAĐEVINSKE PARCELE ZA IZGRADNJU KOLEKTIVNOG STAMBENOG OBJEKTA U ULICI SRPSKA VAROŠ U TUZLI**

b) **RJEŠENJA O IMENOVANJU KOMISIJE ZA PROVOĐENJE POSTUPKA PREGOVARANJA ZA PRODAJU NEKRETNINE U VLASNIŠTVU GRADA TUZLE NEPOSREDNOM POGODBOM RADI OBLIKOVANJA GRAĐEVINSKE PARCELE ZA IZGRADNJU KOLEKTIVNOG STAMBENOG OBJEKTA U ULICI SRPSKA VAROŠ U TUZLI I**

c) **RJEŠENJE O ODBIJANJU KAO NEOSNOVANOG ZAHTJEVA ZA OTKUP GRAĐEVINSKOG ZEMLJIŠTA (Mustafić Fikret, lokacija KO Slavinovići), broj: 01/07-27-9853/21**

Predlagač je gradonačelnik.

Obrađivač je Služba za geodetske i imovinsko-pravne poslove.

Materijal su razmatrali: Komisija za statutarna pitanja i propise, Komisija za ekonomske odnose, Komisija za prostorno uređenje i zaštitu okoline, Komisija za izbor i imenovanja (pod b) i klubovi vijećnika.

Ima li potrebe za uvodnim izlaganjem? (OMER BERBIĆ – Može li samo za ovu Srpska varoš zanima me o čemu radi se?) Dobro.

Pozivam obrađivača da da uvodno izlaganje.

Vezano za Srpsku varoš ako možete samo obrazloženje?

**JASMINA HASANEFENDIĆ – ŠIMLEŠA - pomoćnik gradonačelnika za Službu za geodetske i imovinsko – pravne poslove**

Dobar dan. Pozdravljam sve vijećnice i vijećnike. Dakle, ovo je ODLUKA O PRODAJI NEKRETNINE U VLASNIŠTVU GRADA TUZLE NEPOSREDNOM POGODBOM RADI OBLIKOVANJA GRAĐEVINSKE PARCELE.

Naime, radi se o situaciji u kojoj investitor ima pravosnažno Rješenje o urbanističkoj saglasnosti kojim rješenjem je formirana građevinska parcela za izgradnju predmetnog objekta i ta građevinska parcela obuhvata i dio zemljišta u vlasništvu Grada Tuzle i na osnovu Zakona o stvarnim pravima ispunio je uslove da otkupi parcelu neposrednom pogodbom. Dakle, Odluka je u skladu sa Zakonom o stvarnim pravima zatim Pravilnikom o postupku javnog konkursa za raspolaganjem nekretninama u vlasništvu Federacije BiH, kantona, općina i gradova dakle, radi se o parceli ukupne površine 355 m<sup>2</sup>. Investitor i fizičko lice koje je ishodovalo pravosnažnu urbanističku saglasnost jeste Okanović Davor koji je podnio nadležnoj Službi zahtjev za otkup zemljišta po ovom pravnom osnovu.

**NATAŠA PERIĆ**

U redu hvala. (OMER BERBIĆ – Samo ako može kratko. Koja parcela je to jel to ova zgrada Delinga koja se pravi ili je neka nova?) Ne, ne ovo je... Zgrada Deling je preko puta. (OMER BERBIĆ – Ova je preko puta znači?) Jeste, jeste prema Panonskim jezerima. Jeste.

**NATAŠA PERIĆ**

U redu hvala. Otvaram raspravu klubova vijećnika. Niko se ne javlja. Zatvaram raspravu klubova vijećnika.

Otvaram raspravu vijećnika. Niko se ne javlja. Zatvaram raspravu vijećnika.

Stavljam na izjašnjavanje pročitane odluku i rješenja. Glasanje je okončano.

Konstatujem da je pročitana odluka i rješenja usvojeni sa,

24 glasa za, nije bilo protiv i 1 suzdržan.

Prelazimo na jedanaestu tačku Dnevnog reda:

**RAZMATRANJE I USVAJANJE:**

**ODLUKE O PROSJEČNOJ KONAČNOJ GRAĐEVINSKOJ CIJENI STAMBENOG PROSTORA IZ PREDHODNE GODINE**

Predlagач je gradonačelnik.

Obrađivač je Služba za geodetske i imovinsko-pravne poslove.

Materijal su razmatrali: Komisija za statutarna pitanja i propise, Komisija za ekonomske odnose, Komisija za poduzetništvo i klubovi vijećnika.

Ima li potrebe za uvodnim izlaganjem? (Nema.)

Otvaram raspravu klubova vijećnika. Niko se ne javlja. Zatvaram raspravu klubova vijećnika.

Otvaram raspravu vijećnika. Niko se ne javlja. Zatvaram raspravu vijećnika.

I stavljam na izjašnjavanje ODLUKU O PROSJEČNOJ KONAČNOJ GRAĐEVINSKOJ CIJENI STAMBENOG PROSTORA IZ PREDHODNE GODINE. Molim vijećnike da se izjasne. Glasanje je okončano.

Konstatujem da je pročitana odluka usvojena sa,

26 glasova za, nije bilo protiv i nije bilo suzdržanih.

Prelazimo na dvanaestu tačku:

**RAZMATRANJE I USVAJANJE:**

Pod a) **ODLUKE O POKRETANJU POSTUPKA IZMJENA GRANICA KATASTARSKIH OPŠTINA NA PODRUČJU GRADA TUZLE RJEŠENJA O IMENOVANJU KOMISIJE ZA IZMJENE GRANICA KATASTARSKIH OPŠTINA BUKINJE I HUSINO NA PODRUČJU GRADA TUZLE**  
 c) **RJEŠENJA O IMENOVANJU KOMISIJE ZA IZMJENU GRANICA KATASTARSKIH OPŠTINA HUSINO I PLANE NA PODRUČJU GRADA TUZLE**

Predlagač je gradonačelnik.

Obrađivač je Služba za geodetske i imovinsko-pravne poslove.

Materijal su razmatrali: Komisija za statutarna pitanja i propise, Komisija za prostorno uređenje i zaštitu okoline, Komisija za izbor i imenovanja (pod b i c) i klubovi vijećnika.

Ima li potrebe za uvodnim izlaganjem? (Nema.)

Otvaram raspravu klubova vijećnika. Niko se ne javlja. Zatvaram raspravu klubova vijećnika.

Otvaram raspravu vijećnika. Niko se ne javlja. Zatvaram raspravu vijećnika.

I stavljam na izjašnjavanje pročitane odluku i rješenja. Molim vijećnike da se izjasne. Glasanje je okončano.

Konstatujem da je pročitana odluka i rješenja usvojeni sa,  
 28 glasova za, nije bilo protiv i 1 suzdržan.

Prelazimo na trinaestu tačku:

**RAZMATRANJE I USVAJANJE:**

**ODLUKE O DAVANJU SAGLASNOSTI NA ODLUKU NADZORNOG ODBORA JAVNO KOMUNALNOG PREDUZEĆA VODOVOD I KANALIZACIJA D.O.O. TUZLA O IZMJENAMA I DOPUNAMA OPŠTIH USLOVA ZA SNABDIJEVANJE VODOM I USLUGAMA ODVOĐENJA OTPADNIH VODA OPĆINE TUZLA I**

**b) ODLUKE O DAVANJU SAGLASNOSTI NA ODLUKU NADZORNOG ODBORA CENTRALNO GRIJANJE D.D. TUZLA O DONOŠENJU NORMATIVNIH AKATA**

Predlagač je: Nadzorni odbor Javno komunalnog preduzeća "Vodovod i kanalizacija" d.o.o. Tuzla (pod a) i Nadzorni odbor Centralnog grijanja d.d. Tuzla (pod b).

Obrađivač je: Služba za komunalne poslove, izgradnju i poslove mjesnih zajednica.

Materijal su razmatrali: Komisija za statutarna pitanja i propise, Komisija za ekonomske odnose, Komisija za komunalne poslove i pitanja mjesnih zajednica, Komisija za poduzetništvo i klubovi vijećnika.

Ima li potrebe za uvodnim izlaganjem? (Nema.)

Otvaram raspravu klubova vijećnika. Vijećnik Omer Berbić. Izvolite.

**OMER BERBIĆ**

Hvala ljepo. Izuzetno mi je drago da napokon Grad Tuzla i gradska preduzeća počinju da razmišljaju u korist potrošača. Da se napokon u javnim tuzlanskim preduzećima dolazi do

te spoznaje da je mjerenje i naplaćivanje po utrošku jedini pravi način naprijed. Izuzetno mi je drago da su menadžmenti, odnosno nadzorni odbori i upravni odbori ovih preduzeća prepoznali taj problem i da su krenuli da rade na tome i da se upravo dio ovih normativnih akata dobija da će ljudi uskoro moći kalorimetre i vodomjere ugrađivati u svoje stanove iako nemaju saglasnost svih ljudi unutar zgrade.

Do sada kada trebate saglasnost svih ljudi unutar zgrade znalo se dešavati da od 20-30 stanova jedan koči i niko više ne može da napravi sebi da mu se obračunava po utrošku umjesto da se obračunava po kvadratima, jer je paušalno naplaćivanje zastario sistem već prije 20 godina.

Želim da pohvalim još jednom menadžmente. Želim da pozovem sve građane i sve građanke koji smatraju da bi manje trošili kada bi sebi kada bi plaćali po utrošku umjesto paušalo da se prijave i da pređu na utrošak po kalorimetru, po vodomjeru kako bi uštedjeli ne samo sebi novac, nego i energiju u gradu s obzirom da smo mi već prešli količinski nivo energije za zagrijavanje koji može podneti taj jedan cjevovod iz centralnog grijanja. Mislim da će ovo uspjeti da smanji nivo energije koji i mi trošimo i mislim da će na kraju krajeva biti dobro i za potrošače i za javna preduzeća i za grad u cjelosti.

Ovo također razrješava druge stvari kao što je bila odluka Konkurencijskog vijeća, pritisci Ombdusmena, pritisci razno-raznih nevladinih organizacija koje su se javile da diskutuju na ovu temu koje su ovo godinama propagirale kao nešto što bi se trebalo, što bi se trebalo napraviti.

I zaista se nadam i smatram da će biti tako da će na kraju ova dva javna preduzeća uraditi sve što je u tehničkoj i ljudskoj mogućnosti da se ljudima kojim je to tehnički moguće što prije ugrade kalorimetri pogotovo znajući da naši stanovnici žive u stanovima iz Jugoslavije koji su izuzetno veliki i gdje su davanja jednog penzionera 150 ili 120 maraka mjesečno za zagrijavanje šest mjeseci ne srazmjerno velika njihovim primanjima.

Sve moje pohvale i nadam se da će ovo zaživjeti i u praksi i da ćemo kao tako napraviti jedan veliki iskorak u pružanju usluga grada Tuzla i još jednom pohvala menadžmentu, pohvala nadzornim i upravnim odborima na ovom koraku. Hvala ljepo.

## **NATAŠA PERIĆ**

U redu hvala. Sljedeća za riječ se javila vijećnica Selma Ćatibušić ispred Kluba Platforme za progres. Izvolite.

## **SELMA ĆATIBUŠIĆ**

Ma ja imam samo jedno pitanje za, ne znam ko je došao obrađivač iz centralnog grijanja. Obzirom da sam dobila upit od par građana iskreno nisam u tom dijelu i ne razumijem se, pa eto voljela bih da mi se nekako tehnički to objasni.

Kada je u pitanju mogućnost isključenja, tj. sa centralnog grijanja jedna gospođa mi je rekla kao da ona to želi zato što joj kćerka ne stanuje u tom stanu a plaća grijanje itd. Ali da u tom slučaju mora doći do sjećenja je li cijevi itd. Da li je to tačno i da li postoji neka druga možda mogućnost da se to ljudima ne radi, nego da dođe do na neki način nekog drugog oblika isključenja? Eto to me zanima čisto da bih mogla prenjeti ljudima koji su mi dostavili taj upit kako je to moguće i eto kako će se to obaviti. Hvala.

## **NATAŠA PERIĆ**

U redu hvala. Sljedeća za riječ se javila vijećnica Sabiha Mujkanović ispred Kluba samostalnih vijećnika.

## **SABIHA MUJKANOVIĆ MUJAČIĆ**

Evo da vas sve srdačno pozdravim. Ja ću se samo kratko obratiti. Želim i da pozdravim menadžmenta ova dva preduzeća. Vidim da su tu. Znači, želim istaći nakon što sam napravila uvid na važeće akte centralnog grijanja ja ću se na njih znači i fokusirati. Da su novi opšti i tehnički uvjeti puno jasniji i precizniji i razumljiviji za građanstvo i zaista ono što posebno želim da ih pohvalim na uvažavanju vijećničkih inicijativa u vezi sa izradom projektne dokumentacije čime su postali preduzeće za koje sada zaista smatram da je u službi građana, te poštivanju zakonskih propisa kada je u pitanju Konkurencijsko vijeće. Kolega Omer je to maloprije pomenuo.

Činjenica je da je centralno grijanje do sada u dva navrata moralo platiti kazne Konkurencijskom vijeću čini mi se prvi put 20.000 a da drugi put 40.000 konvertibilnih maraka, ali evo vidimo da sa novim znači normativnim aktima i njihovom dosljednom primjenom to se više neće događati.

Zaista ne sumnjam da će menadžmenti oba ova preduzeća uvijek biti na usluzi građanima i da će iz godine u godinu samo poboljšavati kvalitet svojih usluga. Zahvaljujem.

## **NATAŠA PERIĆ**

U redu hvala. Zaključujem raspravu klubova vijećnika.

Otvaram raspravu vijećnika. Vijećnik Čavalić. Izvolite.

## **ADMIR ČAVALIĆ**

Hvala predsjedavajuća. Samo prije svega pohvale Instituciji Ombudsmena za ljudska prava i Konkurencijskom vijeću koji su prepoznali dakle ove probleme i blagovremeno reagovali a onda pohvala i menadžmentu vezano za ove interne vodomjere, odnosno mjerila ili utroška toplotne energije.

Volio bih samo da apelujem na građane da iskoriste ove mogućnosti i evo sada smo ovdje gledali dakle, dobro je ovo menadžment uradio centralnog grijanja. Opšti uslovi kao što kolegica Sabiha reče vrlo jasni. Član 35. posebno bitan izdvajanje sa sistema daljinskog grijanja dakle daje se mogućnost, sloboda, pravo ono što je utvrdilo Konkurencijsko vijeće korisnicima da mogu dakle, na adekvatan način troškovno prihvatljiv u smislu da nisu to neki troškovi bitni i sl. tehnički izvodljiv isključe se sa ovog sistema i posebno ovi tehnički uslovi.

Preporučujem dakle, da građani isčitaju ovo dva dokumenta jer ima dosta građana u gradu Tuzla koji su zaista zainteresovani za ova dva pitanja. Bilo bi dobro dakle, da maksimalno ovo promoviramo medijski i sl. dakle, da se zna i čuje za ovo i još jednom dakle pohvala menadžmentu. Ovo je jedan dobar iskorak i nadam se da ćemo imati sličnih ubuduće po pitanju ova dva poduzeća ili svih drugih javno komunalnih poduzeća u našem gradu. Hvala.

## **NATAŠA PERIĆ**

U redu hvala. Zaključujem ras... (MERIMA SOFTIĆ SPREČIĆ – Mogul ja?) Aha. Merima Softić Sprečić. Izvoli.

## **MERIMA SOFTIĆ SPREČIĆ**

Apropo ovog što je Admir Čavalić rekao meni recimo, ja imam jednu dilemu kod člana 2. ove izmjene Odluke o izmjenama i dopunama opštih uslova za snabdijevanje vodom i uslugama odvođenja otpadnih voda.

Što se tiče ovaj član 49. koji se mijenja i glasi: Pa da ne čitam evo vi imate materijal ispred sebe. Korisnik usluge je dužan promjenu broja članova domaćinstva prijaviti davaocu usluge najkasnije do 15-tog u tekućem mjesecu da bi ista imala učinka u tom mjesecu ili recimo prijava i odjava broja članova domaćinstva kod pojedinog korisnika usluge utvrđuje se na osnovu pisanog zahtjeva korisnika usluge uz obaveznu priloženu ovjerenu kućnu listu.

Mene interesuje do sad je tu prijavu radio predsjednik Odbora etažnih vlasnika na osnovu njegovog stanja uvida o tome, o svom reču žargonski komšiluku. Znači, mogao je otprilike da prati ko stanuje i živi u tim zgradama.

Dolazi se nekad do situacije. Evo recimo ovdje kaže da se to zadire previše je li u intimu pa je zaštita ličnih podataka. Pa Admir evo da me i ti mislim ono da nekako dođemo na neko od rješenja a da je zaista dobro za sve građane. Dolazimo onda u situaciju da ljudi ne prijavljuju onaj broj članova koji živi u stanu. Da u članovima možda boravi više broj ljudi pogotovo ako se radi. Pogotovo recimo danas imamo ovo rentanje stan na dan i dolazimo u situaciju da plaćamo paušalno račune recimo po broju članova i da jedan penzioner plaća istu vrijednost recimo na mjesečnom iznosu ako ih je dva člana. Ja ću sad reći nekih 30 maraka-četdeset. Jako velike račune dobivamo u odnosu na to da nemamo baš neku kontrolu koliko ljudi trenutno boravi u zgradi.

Po meni je taj predsjednik Odbora etažnih vlasnika osoba koja na neki način može dati neku svoju zadnju riječ o tome koliko ima članova u stanu i misli da to nije neko posebno zadiranje u privatnost. Naravno ako zakon kaže drugčije nisam ja tu da idem protiv zakona.

Evo samo onako glasno razmišljam što se tiče ovog člana nekako mislim da, da je ipak trebamo uključiti da predsjednici Odbora etažnog vlasnika ipak daju neku svoju možda na kućnu ovjerenu listu da se on potpiše i da kaže da tačno je da tu žive dva, dvije tri osobe ili netačno je, ja ih nisam nisam vidio da žive nego u stanu ulaze tri-četiri osobe. Eto čisto onako jedno razmišljanje koje je na terenu primjećeno, jer nekada su prijavljene jedna ili dvije osobe obzirom da ide paušalno plaćanje na kompletnu zgradu. Radi se o kolektivnom ovo priča o kolektivnom stanovanju. Znači, možda nekad onako ne fer, et čisto nama svima malo na razmišljanje da ne preletimo preko ovog člana. Volila bi da čujem iskreno i Admirovo mišljenje oko ovog. Eto hvala.

## **NATAŠA PERIĆ**

Vijećnik Admir Čavalić.

## **ADMIR ČAVALIĆ**

Hvala puno. Mislim da je kolegica Merima otvorila jedno vrlo bitno pitanje s tim da, hajd sad da opet naglas razmišljamo. Mislim da generalno predsjednik Odbora etažnih vlasnika nema jasnu informaciju i uvid koliko je ljudi fizički u tom stanu. Dakle, i on paušalno daje ocjenu. Dakle, posumnjao bih u mogućnost da on bude korektivni faktor u ovom procesu, ali se slažem sa kolegicom Merimom da jeste problem generalno i može doći do zloupotreba.

Ja pretpostavljam da kada predaju tu kućnu listu dakle, da oni preuzimaju punu krivičnu materijalno pravnu odgovornost da je to korektno tačno kao što mi potpisujemo izjave neke i garantujemo da je tako. E sad možda bolje je tražit institucionalni način da se to sankcioniše, provjeri ili sl. a ne da možda dajemo na paušalnu ocjenu predsjednika Odbora etažnih vlasnika.

Slažem se to su uglavnom dobronamjerni ljudi koji vode računa o svom komšiluku, kontrolišu, prate i sl. ali sad je pitanje koliko i oni mogu pratiti u pojedinim objektima. Dakle, koliko imaju zaista uvida u to dakle ko se kreće. Evo stan na dan. Dakle, ko ulazi danas tu, izlazi, koliko provodi vremena i sl. Dakle, sad malo propitujemo i njih kao mogućnost da budu oko sokolovo lajički kazano da baš posmatraju šta se dešava itd. to bi bilo kao u onim



špijunskim filmovima osamdesetih dakle iz Istočne Njemačke dakle, da baš znaju znaju ko je šta, zavjesa itd.

Ali kažem slažem se problem postoji dakle, i kolegica Merima ga je ispravno identificirala sad možda samo vidjeti u kontekstu zaštite podataka, ali možda da prebacimo prije na institucije da vidimo ko je tu ima odgovornost dakle, ako daje se pogrešna slika o broju broju u domaćinstvu broju ljudi.

## **NATAŠA PERIĆ**

U redu hvala. Zaključujem raspravu vijećnika.

Ja ću sad zamoliti ispred centralnog grijanja da neko odgovori vijećnici Čatibušić za ove cijevi. Ovdje ćete vi. Obrađivači su ovdje.

## **SULJO SARIĆ – pomoćnik direktora za tehnička pitanja u JP Centralnom grijanju Tuzla**

Evo ja bih želim da pozdravim predsjedavajuću, uvažene vijećnike i sve kolegice i kolege.

Želim da kažem da da u članu 35. imamo određene preduslove za izdvajanje sa sistema. Naime, neko ko želi izdvajanje sa sistema treba da dokaže da je vlasnik ili da ima saglasnost vlasnika objekta i to izdvajanje vrši se blindiranjem ili radijatorskih veza, odnosno uvažena vijećnica je u pravu. Potrebno je to odrezati zato što da ne bi bilo kasnije zloupotrebe posebice ako je ta veza u stanu i nekoga nema u tom stanu onda se vrši na taj način da se to odreže, blindira trajno da se više ne može priključiti bez našeg nadzora i bez ispuštanja eventualno vode ukoliko bi neko želio da ne zloupotrijebi ovaj institut koji je sad uveden. To je to.

## **NATAŠA PERIĆ**

Dobro. Hvala. Ispred vodovoda hoće li neko odgovorit na pitanje vijećnice Softić? Izvolite. Direktor Aid Berbić.

## **AID BERBIĆ - direktor JKP „Vodovod i kanalizacija“ Tuzla**

Uvaženi članovi Kolegija, poštovani vijećnici dugo smo se borili sa ovim pitanjem ovo što je vijećnica Merima i Admir što su postavili kao problem. To je problem koji je sve prisutan a to govori najviše do nas. Znači, ne postoji Admire institucioni način da neko prijavi nekog ili da da neku zakletvu i ništa.

Ovo je sve inicijero jedan sudija iz Tuzle koji je dobio poso u Brčkom i otišo da stanuje. Naravno čestiti i poštteni predsjednik Odbora etažnih vlasnika ga je skinuo sa liste. Međutim, kad je vidio da sudija radi samo tri dana u sedmici a da 4 sata provodi u stanu u Stupinama onda ga je ponovo prijavio i napismeno nam to napiso.

Naravno gospodin je, pošto je sudija. Sad je izabran i za Kantonalnog sudiju u Tuzli, tad je bio još u Brčkom i iskoristio svoje veze ove Agencije za zaštitu ličnih podataka. A Agencija za zaštitu ličnih podataka kad dođete tamo to je u najmanju ruku NASA. Znači ništa, ne možete otić, danas ustati i otvoriti oči dok ne pitate Agenciju za zaštitu ličnih podataka. Da vidite te mantre što ili sarajlije kako kažu ublehe kad dođete s njima da pričate. Oni su nama čak dali i prekršajne prijave koje su naravno na sudu. Kažnjeni smo ukorima, ali suština u tome je da su oni zahtijevali da svaki vlasnik stana samo dođe i kaže živim ja sam u stanu i to mi i obračunaj. Kad smo rekli pa onda će svi doć i reć nema nikog u stanu, stanuje (nerazgovjetno

izgovorena riječ op.a.) a potrošena voda ko će je platit. Tako da smo se u dogovoru sa i upraviteljima i konsultacije sa pametnim ljudima i sa ljudima iz struke vodovoda Bosne i Hercegovine dogovorili da je to otvorena mogućnost da svako dođe, da nema maltretiranja niti često imamo u ulazima probleme sa hajmo reći nekim ljudia koji su na čelu Odbora etažnih vlasnika a koji zaista ne obavljaju na način kako jesu. Imamo situacije da nam ljudi dođu i kažu znam ja da u tvom stanu živi šestoro ali ne smijem prijaviti zato što će me doći izlupat naveče, neg moram držat jedno ili dvoje i to su činjenice. Tako da smo otvorili dvostranu komunikaciju znači, svako ima pravo da dođe i da prijavi koliko misli da ima i koliko bi po njegovom trebalo da je u stanu a onda mi to putem dobrog etažnog vlasnika i na druge načine isprovjeravamo da vidimo. Inače ovo se odnosi samo na objekte gdje su centralni vodomjeri. Znači, mi smo već negdje na 29-30 hiljada od 49 i po hiljada brojila koje očitavamo i isporučujemo znači negdje oko 30.000 je na individualnim stambenim objektima. I svaki dan to raste.

Meni je važnija ova druga inicijativa da smo otvorili mogućnost isto tih Odbora etažnih vlasnika da više ako u ulazu imate 15 ili 7 stanova i neko s nekim nije dobar i neće da mu potpiše da čovjek ne može da realizuje. A ja vam iskreno kažem najveći interes vodovoda je da svi budu na centralnom vodomjeru jer ćemo onda gubitne koji se nalaze u sistemu i u zgradama svest na minimum zato što je to i nešto. Tako da mi jednostavno već duže vrijeme to i radimo. Omogućavamo bilo kojem vlasniku individualne stambene jedinice da ugradi svoj vodomjer i onda nije bitno ko je u stanu i koliko ih je u stanu. I većinom ovi stanovi što se izdaju dan za dan ili za ovo to su većinom novi stanovi koji imaju individualna brojila ili to rješavaju i nemamo nikakvih problema s time. Evo ja mislim da je jasno. Ako treba još šta tu smo.

## **NATAŠA PERIĆ**

U redu hvala.

Stavljam na izjašnjanje ODLUKU O DAVANJU SAGLASNOSTI NA ODLUKU NADZORNOG ODBORA JAVNO KOMUNALNOG PREDUZEĆA VODOVOD I KANALIZACIJA D.O.O. TUZLA O IZMJENAMA I DOPUNAMA OPŠTIH USLOVA ZA SNABDIJEVANJE VODOM I USLUGAMA ODVOĐENJA OTPADNIH VODA OPĆINE TUZLA I

ODLUKU O DAVANJU SAGLASNOSTI NA ODLUKU NADZORNOG ODBORA CENTRALNO GRIJANJE D.D. TUZLA O DONOŠENJU NORMATIVNIH AKATA. Molim vijećnike da se izjasne. Poništavam glasanje ponovo. Poništavam glasanje. Molim vijećnike da se ponovo izjasne. Glasanje je okončano.

Konstatujem da su pročitane odluke usvojene sa,  
30 glasova za, nije bilo protiv i nije bilo suzdržanih.

Prelazimo na četrnaestu tačku:

### **RAZMATRANJE I USVAJANJE:**

**ODLUKE O DAVANJU SAGLASNOSTI ZA ZAKLJUČENJE ANEKSA UGOVORA O REGULISANJU MEĐUSOBNIH PRAVA I OBAVEZA U VEZI SA POVJERAVANJEM NA UPRAVLJANJE I KORIŠTENJE JAVNIH DOBARA, KOMUNALNE I DRUGE INFRASTRUKTURE I OBJEKATA (JAVNO KOMUNALNO PREDUZEĆE VODOVOD I KANALIZACIJA D.O.O. TUZLA)**

**b) ODLUKE O DAVANJU SAGLASNOSTI ZA ZAKLJUČENJE ANEKSA UGOVORA O REGULISANJU MEĐUSOBNIH PRAVA I OBAVEZA U VEZI SA POVJERAVANJEM NA UPRAVLJANJE I KORIŠTENJE JAVNIH DOBARA, KOMUNALNE I DRUGE INFRASTRUKTURE I OBJEKATA (JAVNO KOMUNALNO PREDUZEĆE KOMEMORATIVNI CENTAR D.O.O. TUZLA)**

**ODLUKE O DAVANJU SAGLASNOSTI ZA ZAKLJUČENJE ANEKSA UGOVORA O REGULISANJU MEĐUSOBNIH PRAVA I OBAVEZA U VEZI SA POVJERAVANJEM NA UPRAVLJANJE I KORIŠTENJE JAVNIH DOBARA, KOMUNALNE I DRUGE INFRASTRUKTURE I OBJEKATA (TRŽNICE - PIJACE D.O.O. TUZLA)**

**d) ODLUKE O DAVANJU SAGLASNOSTI ZA ZAKLJUČENJE ANEKSA UGOVORA O REGULISANJU MEĐUSOBNIH PRAVA I OBAVEZA U VEZI SA POVJERAVANJEM NA UPRAVLJANJE I KORIŠTENJE JAVNIH DOBARA, KOMUNALNE I DRUGE INFRASTRUKTURE I OBJEKATA (CENTRALNO GRIJANJE D.D. TUZLA)**

**e) ODLUKE O DAVANJU SAGLASNOSTI ZA ZAKLJUČENJE ANEKSA UGOVORA O REGULISANJU MEĐUSOBNIH PRAVA I OBAVEZA U VEZI SA POVJERAVANJEM NA UPRAVLJANJE I KORIŠTENJE JAVNIH DOBARA, KOMUNALNE I DRUGE INFRASTRUKTURE I OBJEKATA (JAVNO KOMUNALNO PREDUZEĆE KOMUNALAC D.O.O. TUZLA) I**

**f) ODLUKE O DAVANJU SAGLASNOSTI ZA ZAKLJUČENJE ANEKSA UGOVORA O REGULISANJU MEĐUSOBNIH PRAVA I OBAVEZA U VEZI SA POVJERAVANJEM NA UPRAVLJANJE I KORIŠTENJE ZEMLJIŠTA, PLAŽA, OBJEKATA I OPREME U OKVIRU I U FUNKCIJI DVA SLANA JEZERA SA SLANIM VODOPADIMA I BAZENIMA U GRADU TUZLA (JAVNO KOMUNALNO PREDUZEĆE PANNONICA D.O.O. TUZLA)**

Predlagач je gradonačelnik.

Obrađivač je: Služba za komunlane poslove, izgradnju i poslove mjesnih zajednica.

Materijal su razmatrali: Komisija za statutarna pitanja i propise, Komisija za ekonomske odnose, Komisija za komunalne poslove i pitanja mjesnih zajednica, Komisija za poduzetništvo i klubovi vijećnika.

Ima li potrebe za uvodnim izlaganjem? (Nema.)

Ima li potrebe da se pročitaju izvještaji Komisija? (Nema.)

Otvaram raspravu. Vijećnik Admir Čavalić. Izvolite. Rasprava klubova vijećnika.

## **ADMIR ČAVALIĆ**

Hvala puno predsjedavajuća. Neću dužiti jedno je samo pitanje. Dakle, ova predzadnja odluka. Kaže Odluka o davanju saglasnosti za zaključenje aneksa ugovora o regulisanju međusobnih prava i obaveza u vezi sa povjeravanjem na upravljanje i korištenje zemljišta, plaža, objekata i opreme u funkciji i u funkciji dva slana jezera sa slanim vodopadima i bazenima u gradu Tuzla.

Mene zanima i to je pitanje koliko ima slanih jezera u Tuzli da li dva ili tri jel ja koliko znam 1. septembra 2012. godine je otvoreno treće Panonsko jezero a ovdje u odluci pišu da su dva slana jezera sa bazenima, vodopadima i bazenima. (NATAŠA PERIĆ – Dobro.) Dakle, volio bih tačno da mi se precizira da dobijem odgovor na pitanje koliko je slanih jezera u Tuzli dva ili tri? (NATAŠA PERIĆ – U redu.) I da li je ovdje greška, da li treba dodat tri slana jezera sa slanim vodopadima i bazenima ili je jedan bazen a dva su slana jezera? (NATAŠA PERIĆ – Dobro.) Dakle, to je samo tehničko pitanje da ne bi mi pogriješili il ili je možda neka druga odluka reguliše to treće jezero. Hvala puno.

**NATAŠA PERIĆ**

U redu hvala. Da li se još neko javlja? Niko se ne javlja. Zaključujem raspravu klubova vijećnika.

Otvaram raspravu vijećnika. Niko se ne javlja. Zatvaram raspravu vijećnika.

Zamoliti ću nekog iz Službe za komunalne poslove da da odgovor. Gospođa Mirela Uljić će nam dati odgovor.

**MIRELA ULJIĆ - Pomoćnik gradonačelnika za Službu  
za komunalne poslove, izgradnju i poslove mjesnih zajednica**

Poštovana predsjedavajuća, poštovane vijećnice i vijećnici i poštovane kolege prema evo sad da kažem onako u diskusiji raspoloživim informacijama zapravo se terminološki radi o dva jezera, jednom trećem dakle, bazenu i plus slapovi sa bazenom. Tako je, takve informacije ja imam zašta molim da kažem u narednom periodu da ćemo još jedanput detaljno provjeriti i vidjeti o čemu se radi.

Dakle, u osnovnom ugovoru koji je jedan od 6 ugovora koje je Grad Tuzla zaključio sa šest komunalnih preduzeća 2020. godine ta je terminologija. Procedura je bila da se uz prethodno pribavljeno mišljenje pravobranilaštva zapravo traži i dobije saglasnost Gradskog vijeća da se takvi ugovori kojim se povjerava na korištenje i upravljanje i javna dobra i sva druga komunalna infrastruktura povjere tim našim komunalnim preduzećima. Ovaj put se radi dakle, o aneksima na postojeće ugovore kojim se preciziraju odnosi koji se tiču tekućeg i investicionog održavanja, a sve u skladu sa jednom od preporuka Ureda za reviziju insitucija Federacije i zapravo to je ono što je danas na dnevnom redu ovaj materijal, a ja molim da još jedanput da kažem u dogledno vrijeme mi terminologiju isprovjeravamo. Hvala.

**NATAŠA PERIĆ**

U redu. Hvala. Hvala vama.

Stavljam na izjašnjavanje pročitane odluke. Glasanje je okončano.

Konstatujem da su pročitane odluke usvojene sa, 28 glasova za, nije bilo protiv i nije bilo suzdržanih.

Prelazimo na petnaestu tačku Dnevnog reda:

**RAZMATRANJE I USVAJANJE IZVJEŠTAJA O RADU GRADSKOG  
PRAVOBRANILAŠTVA TUZLA ZA 2021. GODINU**

Predlagач je gradonačelnik Grada Tuzla.

Obrađivač je: Gradsko pravobranilaštvo.

Materijal su razmatrali: Komisija za statutarna pitanja i propise i klubovi vijećnika.

Ima li potrebe za uvodnim izlaganjem? (Nema.)

Ima li potrebe da se pročitaju izvještaji Komisija? (Nema.)

Otvaram raspravu klubova vijećnika. Vijećnik Admir Čavalić.

**ADMIR ČAVALIĆ**

Hvala puno predsjedavajuća. Dakle, komparirao sam ovaj izvještaj sa izvještajem iz 2020. godine. Nema nekih značajnijih razlika barem po pitanju statistike što je OK u redu.

Ono što opet napominjem ovdje vidimo u drugostepenim da dosta naših građana tuži Grad Tuzlu zbog ujedna pasa i dosta građana tuži zato što je okliznulo se na zaleđenoj površini. Ja apelujem da građani nastave s tom praksom dakle, na nama je da to riješimo. Imaju pravo da tuže i da dobiju slučajeve.

Jedno je vrlo konkretno pitanje i ovo je indikativno nadam se da imamo jasno pojašnjenje. Pazite, izvještaj prošle godine što smo dobili imali smo jasno imena i prezimena i nazive tužitelja ili tuženih u tabeli. Dakle, to je bilo u prošlogodišnjem izvještaju kojeg smo dobili za 4. redovnu sjednicu Gradskog vijeća Grada Tuzla za 2021. godinu. U ovoj tabeli imamo samo inicijale.

Moje pitanje. Da li se nešto sakriva sa inicijalima ili nas je neko primoro dakle, ne vidim nikakvo objašnjenje zašto sad koristimo inicijale? Dakle, prošli put su bila imena i prezimena jasno. Baš sa otišo da pretražim i da nađem prošlogodišnji izvještaj. Zašto su inicijali? I mislim malo je teško sa inicijalima baratati, jer konkretno me zanima ova tabela drugostepeni postupci riješen na teret Grada Tuzla pa imate broj dva redni broj: P-693/15 piše P. N i dr. jel neki P.N i drugi dakle, o kome se radi? I tuženi su Grad Tuzla i drugi. Naknada štete. Dosuđen iznos je 56.000 otprilike i troškovi su oko 8.600 Dakle, da mi se objasni ovaj predmet i ko su ti P.N. i drugi. Dakle, jel su oni zaštićeni jel možemo znati i sl? Jer kažem u prošlogodišnjem izvještaju nisu bili inicijali bila su puna imena i prezimena i nazivi kompanija. U ovogodišnjem izvještaju imamo inicijale. Je li se šta bitno promijenilo a da mi nismo dobili informaciju ili se nastoji zaštititi dakle, neki pojedinci koji su tužili Grad Tuzlu ili koji su tuženi od strane Grada Tuzla.

Sve u svemu kažem statistički posmatrano nikakve diferencijacije nema ovo kada gledamo ovim pravosnažno okončanim predmetima, prekidima, aktivnim predmetima kad se komparira u komparaciji sa ranijim izvještajem dakle, pravobranilaštvo radi svoj posao. Nešto dobije a nešto izgubi i to tako ide tim nekim svojim prirodnim tokom. Hvala puno i zamolio bih na odgovore na ova vrlo konkretna (tehničke smetnje op.a.).

## **NATAŠA PERIĆ**

U redu hvala. Sljedeća za riječ se javila vijećnica Selma Ćatibušić ispred Kluba Platforme za progres.

## **SELMA ĆATIBUŠIĆ**

Pa obzirom, mislim radi se svakako o Izvještaju Gradskog pravobranilaštva i nekako trebalo bi se, trebali bismo se toga i držati ali ja bih samo iskoristila ovu priliku ujedno da apelujem na ostale službe. Mislim, Gradsko pravobranilaštvo sigurno ne može dobit slučajeve koji su unaprijed izgubljeni zato što se ne znam očigledno krše neka ljudska prava ili građani su sigurno u pravu. Ali i s tim u vezi nakon što dođe do presude apelujem na druge nadležne službe od komunalnih i ostalih da onda one nastave raditi svoj posao.

Konkretno evo mi smo se već dotakli slučaja našega sugrađanina Zlatka Uroševića gdje je faktički Grad morao, tj. platiti štetu i idalje njegov problem nije riješen. Znači, u tom slučaju čovjek može ići opet tužiti Grad, opet će se gubiti novac, a druga nadležna služba nije riješila taj problem da tako kažem. Tako da svugdje mora postojati određena odgovornost, jer kažem razumijem da se neki slučajeve jednostavno ne mogu dobit to je tako. Tako da evo da službe počnu raditi sinergijski i da na kraju krajeva Grad ne gubi taj novac koji svakako opet plaćaju građani i građanke ovog grada.

**NATAŠA PERIĆ**

U redu. Hvala Selma. Sljedeći za riječ se javio vijećnik Anel Ibeljić ispred Kluba SDP-a. Izvolite.

**ANEL IBELJIĆ – vijećnik Socijaldemokratske partije**

Hvala predsjedavajuća. S obzirom da je moje prvo javljanje danas sve vas srdačno pozdravljam. Ja koristim ovu priliku da pohvalim ovaj izvještaj i da zaželim puno sreće u radu kolegici Nini.

Gradsko pravobranilaštvo radi jako odgovoran posao. To po meni obavljaju na jako uspješan i korektan način. Ipak oni na najbolji mogući interes štite imovinske interese Grada Tuzle. Eto toliko. Hvala.

**NATAŠA PERIĆ**

U redu hvala. Zaključujem raspravu klubova vijećnika.

Otvaram raspravu vijećnika. Vijećnik Omer Berbić, neka se pripremi vijećnik Rifatbegović.

**OMER BERBIĆ**

E hvala ljepo. Ja ću prvo da uđem u ove prvostepene postupke jer sam ovdje vidio da ima jedna diskrepancija između prvostepenih postupaka riješenih u korist Grada i na teret Grada.

Ovdje piše da je riješenih postupaka u korist Grada 184.346 maraka, a na teret Grada 308.550 maraka što je skoro pa duplo. Zanima me ovdje konkretno, ako duplo gubimo šta je ovdje u pitanju i da li se moglo raditi na prevenciji ovih postupaka koji su doveli do toga da se ovdje bude u minusu recimo sigurno 150.000 maraka jer puno je to novca?

O ovim drugostepenim postupcima bi bilo vrijedno pričati ukoliko ne bi bilo ove jedne presude od 5.973.000 KM i vidio sam da je ta presuda znači, presuda radi isplate kupoprodajne cijene zbog poništenja rješenja o privatizaciji JKP Komunalac. Hipotetički ukoliko bi mi izgubili ovu presudu od 5.892.000 maraka to bi bilo katastrofa za Budžet a ima ih još koliko znam. Sva su ova javna preduzeća na ovaj način riješena.

Zanima me o kolikim mi kamatama ovdje pričamo ako već govorimo o 6 miliona maraka ukoliko bi ishod na ovim više stepenim sudovima bio drugačiji i zanima me, mislim pošto je ovo ovo jedna tempirana bomba ukoliko pukne Grad Tuzla će biti u strašno nezavidnoj situaciji 6 miliona to je 10% našeg Budžeta uzajamno, sve kapitalne investicije. Kolike su šanse da Grad Tuzla izgubi ovaj spor i o kolikoj kamati mi ovdje pričamo kako bi se eventualno i mogli spremili u idućim godinama za ovo? Hvala ljepo. (ANEL IBELJIĆ – Može li replika?)

**NATAŠA PERIĆ**

U redu hvala. Replika. Anel Ibeljić.

**ANEL IBELJIĆ**

Ja koliko vidim iz ove tabele ona nosi naziv: Drugostepeni postupci riješeni u korist Grada Tuzle, tako da po nekom mom zapažanju mi smo u stvari ovaj postupak dobili. E sad

teško je preiducirati da li će biti nekih pravnih lijekova koji će se koristiti na ove odluke, te mislim da je nezahvalno o tome govoriti trenutno u trenutnoj situaciji. Hvala.

### **NATAŠA PERIĆ**

Replika. Omer Berbić.

### **OMER BERBIĆ**

Gospodine Ibeljiću ja ne znam kada ste vi postali glasnogovornik pravobranilaštva. Ja bi volio da pravobranilaštvo stane i da mi kaže, odgovori na ova pitanje. (NATAŠA PERIĆ – Dobro odgovorit će.) Pa dobro mislim, ovo preiduciranje. Nisam ništa preiducirao ja samo pitam da bi bili spremni ukoliko dođe do takve situacije.

### **NATAŠA PERIĆ**

Dobro. (vijećnik govori s mjesta bez mikrofona op.a.) Nema. Imali ste repliku već jednu. Vijećnik Zijah Rifatbegović.

### **ZIJAH RIFATBEGOVIĆ**

E hvala vam. Ja ću vrlo kratko. Pogledao sam ovaj izvještaj i želim da pohvalim rad Gradskog pravobranilaštva u Tuzli i mislim da ulažu maksimalne napore ukoliko uzmemo okolnosti u kojima i na koji način je li su okolnosti ne samo u Gradu Tuzli nego i šire tako da ima osnova da se ovaj izvještaj pohvali i da im zaželim da i u buduće ekspeditivno, pošteno i korektno kao što rade je li ovaj svoj posao i do sada da rješavaju ovo sve što je pred njima, a izazovi su veliki tako da čestitam im na dosadašnjem radu.

### **NATAŠA PERIĆ**

U redu. Zaključujem raspravu vijećnika.

Stavljam na izjašnjanje Izvještaj o radu Gradskog pravobranilaštva Tuzla za 2021. Možete samo? (tehničke smetnje op.a.) Hoćel? (vijećnik Admir Hasanbašić govori bez uključenog mikrofona op.a.) De kod Janje. Poništavam glasanje. (vijećnik Admir Hasanbašić govori bez uključenog mikrofona op.a.) Samo da mu promijeni bateriju. Pa nije to pošto je već mora u sali vijećnik koji je glasat.

Stavljam na izjašnjanje IZVJEŠTAJ O RADU GRADSKOG PRAVOBRANILAŠTVA ZA 2021. Glasanje je okončano.

Konstatujem da je IZVJEŠTAJ O RADU GRADSKOG PRAVOBRANILAŠTVA usvojen sa, 27 glasova za, nije bilo protiv i nije bilo suzdržanih.

Prelazimo na šesnaestu tačku razmatranje izvještaja Komisije za izbor i imenovanja. (OMER BERBIĆ – Oprostite a odgovor na pitanja?) Aha. Joj izvinjavam se. (ADMIR ČAVALIĆ - Imamo puno pitanja.) Ima. Dobro. Hajte. Molim? Možel pismeno da vam odgovori molim vas pošto smo već ali evo da je obavežem da...Može li? (OMER BERBIĆ – Hajte ali evo.) (vijećnik Admir Čavalić govori s mjesta bez mikrofona op.a.) (SLAĐANA KRAJINA – De nek odgovori.)

Hajde odgovorite. Dobro. Hajte Nina molim vas odgovorite na ovo. Ma nije namjerno. Pa mislim nemojte sad nemoj prijava sad za lažno prijavljivanje.

## **NINA POPIĆ NEZIROVIĆ – Gradski pravobranilac Tuzla**

Samo za inicijale je li? (NATAŠA PERIĆ – De samo njemu. Ispunite mu želju.) Dobro. Prije svega želim da vas sve pozdravim.

Inicijali su razlog jedini razlog što smo ove godine naveli inicijale su zato što su se građani znali žaliti i kada naplate neki iznos onda se to kao sazna i onda se oni žale zašto mi javno raspravljamo o tome.

Ja danas imam sve presude. U situaciji ako vas konkretno zanima neki predmet ja ću vama rado pročitati. Znači, nismo imali nikakve upute od nekog nego smo sami odlučili da od ove godine bude to praksa radi zaštite klijenata, odnosno radi zaštite stranaka. (ADMIR ČAVALIĆ – Nije agencija reagovala zato?) Ne, ne. Nipošto. (NATAŠA PERIĆ – U redu. Hvala Nina.) Ako mislite da je pravilnije da stavljamo imena od narednog možemo stavljati.

## **NATAŠA PERIĆ**

Nemojte ništa. Hvala na odgovoru. E hvala na odgovoru. (NINA POPIĆ NEZIROVIĆ – Jel to sve? Hvala.)

Prelazimo na šesnaestu tačku:

### **RAZMATRANJE IZVJEŠTAJA KOMISIJE ZA IZBOR I IMENOVANJA**

Zamolit ću sekretara Gradskog vijeća da pročita izvještaje.

## **SLADANA KRAJINA – sekretar Gradskog vijeća Tuzla**

Komisija za izbor i imenovanja je podnijela izvještaj sa sjednice. Komisija za izbor i imenovanja je razmotrila te Gradskom vijeću Tuzla na izjašnjavanje prosljeđuje prijedlog Hasiba Hirkića samostalnog vijećnika da se:

Halid Bajrami razriješi dužnosti člana Savjeta...

## **NATAŠA PERIĆ**

Poslovnička. Izvolite.

## **MIREL MIŠKOVIĆ – vijećnik Socijaldemokrata BiH**

Evo javljam se za riječ povodom ove tačke Dnevnog reda gdje pozivam evo sve svoje kolege da dobro promisle kako će glasati, jer ovim se krše svi dogovori, sva saradnja između stranaka, svi međustranački dogovori, kao i pravila koja su važila dugi niz godina.

Molim da se podcrta u stenogramu da se ovim uvode nova pravila, da se postavlja novi sistem vrijednosti, da se imenovanja vrše na jedan nedemokratski način gdje se ne poštuje izborna volja građana. Mišljenja smo takođe da ovo nije dobro za dalji rad ovog Gradskog vijeća.

Dalje, hoću da napomenem da li je ovim prekršen Poslovnik? Da li je ispoštovano sve pri njegovom donošenju? Da li se tumači dvojako ili kako kome odgovara?

Mi kao Klub, a i ostali klubovi u Gradskom vijeću će potražiti zaštitu i mišljenja na drugim instancama.

Napominjem i ovo da mi kao Klub više nećemo voditi raspravu o ovom.



Konstatovali smo da su narušeni međustranački dogovori, dobra praksa koja je vladala u Gradskom vijeću, a obavještavamo naše kolege vijećnike da će biti upućena apelacija Ustavnom sudu zbog nastale situacije tumačenja Poslovnika Gradskog vijeća.

Dalje. Kakav odgovor ćemo dobiti da li je sve u redu, da li će biti lične ili kolektivne odgovornosti znat ćemo kad odgovor stigne.

Takođe napominjem da se odluke Ustavnog suda će se morati poštovati, a na ovaj način upoznajem vijećnike i na moguće posljedice koje mogu proizaći, proizaći iz svega ovoga.

Takođe evo još jednom napominjem da se nećemo javljati više po ovom pitanju, a kad odgovori stignu sa viših instanci opredjelit ćemo se u kojem ćemo pravcu ići. Eto. (NATAŠA PERIĆ – U redu hvala.) Imo sam za obavezu da upoznam kolege vijećnike sa ovim (NATAŠA PERIĆ – Hvala kolega Miškoviću.) a vi glasajte kako god mislite da treba.

**NATAŠA PERIĆ**

Hvala kolega Miškoviću. Molim sekretara da pročita prijedloge.

**SLAĐANA KRAJINA – sekretar Gradskog vijeća Tuzla**

Komisija za izbor i imenovanja je razmotrila, te Gradskom vijeću Tuzla na izjašnjavanje prosljeđuje prijedlog Hasiba Hirkića samostalnog vijećnika da se:

Halid Bajrami razriješi dužnosti člana Savjeta Mjesne zajednice Mramor,  
a da se na dužnost člana Savjeta Mjesne zajednice Mramor izabere Sabina Imširović,  
Anadin Džinić razriješi dužnosti člana Savjeta mjesne zajednice Šićki Brod,  
a da se na dužnost člana Savjeta Mjesne zajednice Šićki Brod izabere Nijaz Bašić,  
Sakib Topić izabere na dužnost člana Savjeta Mjesne zajednice Gornja Tuzla.

**NATAŠA PERIĆ**

Molim vijećnike da se izjasne. Glasanje je okončano.

Konstatujem da su pročitani prijedlozi usvojeni sa, 20 glasova za, 3 vijećnika su bila protiv i 2 suzdržana.

**SLAĐANA KRAJINA – sekretar Gradskog vijeća Tuzla**

Sljedeći prijedlog:

Komisija za izbor i imenovanja je razmatrala prijedlog Hasiba Hirkića, samostalnog vijećnika, za razrješenje i imenovanje novih članova komisija, te usvojila sljedeći zaključak:

Komisija za izbor i imenovanja je razmotrila, te Gradskom vijeću Tuzla na izjašnjavanje prosljeđuje prijedlog Hasiba Hirkića, samostalnog vijećnika da se:

Kemal Kurtić razriješi dužnosti predsjednika Komisije za predstavke i prijedloge,  
a da se na dužnost predsjednika Komisije za predstavke i prijedloge izabere Aldijana Hodžić,

Osman Bajrić razriješi dužnosti člana Komisije za zaštitu prava nacionalnih manjina,  
a da se na dužnosti člana Komisije za zaštitu prava nacionalnih manjina izabere Halid Bajrami,

Jasmin Brkić razriješi dužnosti člana Komisije za saradnju sa jedinicama lokalne uprave i samouprave,

a da se na dužnost člana Komisije za saradnju sa jedinicama lokalne uprave i samouprave izabere Franjo Pejić,

Izudin Ferizović razriješi dužnosti člana Komisije za komunalne poslove i pitanja mjesnih zajednica,

a da se na dužnost člana Komisije za komunalne poslove i pitanja mjesnih zajednica izabere Mirsad Džambić.

**NATAŠA PERIĆ**

U redu. Stavljam na izjašnjavanje pročitane prijedloge. Glasanje je okončano.

Konstatujem da su pročitani prijedlozi usvojeni sa, 20 glasova za, 3 je bilo protiv i 2 suzdržana.

Molim sljedeći.

**SLADANA KRAJINA – sekretar Gradskog vijeća Tuzla**

Komisija za izbor i imenovanja je razmatrala prijedlog Kluba vijećnika Socijaldemokrata Bosne i Hercegovine za razrješenje i imenovanje novih članova Savjeta Mjesne zajednice Mramor, te usvojila sljedeći zaključak:

Komisija za izbor i imenovanja je razmotrila, te Gradskom vijeću Tuzla na izjašnjavanje prosljeđuje prijedlog Kluba vijećnika Socijaldemokrata Bosne i Hercegovine da se:

Aldijana Hodžić razriješi dužnosti predsjednika Savjeta Mjesne zajednice Mramor, Selim Hirkić i Halid Bajrami razriješe dužnosti članova Savjeta Mjesne zajednice Mramor,

te da se na dužnost predsjednika Savjeta Mjesne zajednice Mramor izabere Franjo Josić, a da se na dužnost članova Savjeta Mjesne zajednice Mramor izaberu Matea Ilić i Dževad Malkić.

**NATAŠA PERIĆ**

Molim vijećnike da se izjasne. Glasanje je okončano.

Konstatujem da pročitani prijedlog nije dobio potrebnu većinu, 5 vijećnika je glasalo za, 1 je bio protiv i 18 suzdržanih.

Molim sljedeći.

**SLADANA KRAJINA – sekretar Gradskog vijeća Tuzla**

Komisija za izbor i imenovanja je razmatrala prijedlog Kluba vijećnika Tuzlanske alternative za izmjenu člana Komisije za ekonomske odnose, te usvojila sljedeći zaključak:

Komisija za izbor i imenovanja je razmotrila, te Gradskom vijeću Tuzla na izjašnjavanje prosljeđuje prijedlog Kluba vijećnika Tuzlanske alternative da se:

Nedžad Malikić razriješi dužnosti člana Komisije za ekonomske odnose, a da se na dužnost člana Komisije za ekonomske odnose izabere Halid Ramić.

**NATAŠA PERIĆ**

Stavljam na izjašnjavanje. (Uh pardon greška.) Poništavam glasanje. (Izvinjavam se.) Hajd ponovo. Glasanje je okončano.

Konstatujem da je pročitani prijedlog usvojen sa, 22 glasa za, nije bilo protiv i nije bilo suzdržanih.

Molim dalje.

**SLADANA KRAJINA – sekretar Gradskog vijeća Tuzla**

Sljedeći:

Komisija za izbor i imenovanja je razmatrala prijedlog Omera Berbića, vijećnika Naše stranke, za izmjenu člana Savjeta Mjesne zajednice Jala, te usvojila sljedeći zaključak:

Komisija za izbor i imenovanja je razmotrila, te Gradskom vijeću Tuzla na izjašnjavanje prosljeđuje prijedlog Omera Berbića, vijećnika Naše stranke da se:

Admir Mahmutović razriješi dužnosti člana Savjeta Mjesne zajednice Jala, a da se na dužnost člana Savjeta Mjesne zajednice Jala izabere Maid Dedić.

**NATAŠA PERIĆ**

Stavljam na izjašnjavanje prijedlog. Glasanje je okončano.

Pročitani prijedlog je usvojen sa, 21 glas za, nije bilo protiv i nije bilo suzdržanih.

**SLADANA KRAJINA – sekretar Gradskog vijeća Tuzla**

Komisija za izbor i imenovanja je razmatrala prijedlog Kluba samostalnih vijećnika za razrješenje i imenovanje članova savjeta mjesnih zajednica, te usvojila sljedeći zaključak:

Komisija za izbor i imenovanja je razmotrila, te Gradskom vijeću Tuzla na izjašnjavanje prosljeđuje prijedlog Kluba samostalnih vijećnika da se:

Jasmin Selimi razriješi dužnosti predsjednika Savjeta Mjesne zajednice Grabovica,

a da se na dužnost predsjednika Savjeta Mjesne zajednice Grabovica izabere Jasenka Žigić,

Abdulah Ibršimović razriješi dužnosti člana Savjeta Mjesne zajednice Mosnik,

a da se na dužnosti člana Savjeta Mjesne zajednice Mosnik izabere Elvin Ovčina,

Novalija Selimović razriješi dužnosti člana Savjeta Mjesne zajednice Dobrnja,

a da se na dužnost člana Savjeta Mjesne zajednice Dobrnja izabere Adil Suljendić,

Dževad Memić razriješi dužnosti člana Savjeta Mjesne zajednice Ši Selo,

a da se na dužnost člana Savjeta Mjesne zajednice Ši Selo izabere Ervin Adrović,

Fuad Alibalić razriješi dužnosti člana Savjeta Mjesne zajednice Mejdani,

a da se na dužnost člana Savjeta Mjesne zajednice Mejdani izabere Zumreta Džaferbegović,

Asim Mehanović razriješi dužnosti člana Savjeta Mjesne zajednice Tušanj,

a da se na dužnost člana Savjeta Mjesne zajednice Tušanj izabere Emina Ramić.

**NATAŠA PERIĆ**

Molim vijećnike da se izjasne. Glasanje je okončano.

Konstatujem da je pročitani prijedlog usvojen sa, 20 glasova za, niko nije bio protiv i 1 suzdržan.

## **SLADANA KRAJINA – sekretar Gradskog vijeća Tuzla**

Komisija za izbor i imenovanja je razmatrala prijedlog Kluba vijećnika Socijaldemokratske partije Bosne i Hercegovine za izmjenu člana Savjeta Mjesne zajednice Srednja Lipnica, te je usvojila sljedeći zaključak:

Komisija za izbor i imenovanja je razmotrila, te Gradskom vijeću Tuzla na izjašnjavanje prosljeđuje prijedlog Kluba vijećnika Socijaldemokratske partije Bosne i Hercegovine da se:

Pejo Divković razriješi dužnosti člana Savjeta Mjesne zajednice Srednja Lipnica, a da se na dužnost člana Savjeta Mjesne zajednice Srednja Lipnica izabere Anto Đurić.

## **NATAŠA PERIĆ**

Molim da glasate. Glasanje je okončano.

Konstatujem da su pročitani prijedlozi usvojeni sa, 22 glasa za, niko nije bio protiv i nije bilo suzdržanih.

Prelazimo na sedamnaestu tačku:

Pod TEKUĆIM PITANJIMA imamo:

Obavještenje Službe za kulturu, sport, mlade i socijalnu zaštitu o razlozima prolongiranja Informacije o realizaciji Akcionog plana za Rome 2018-2021 pa evo da primimo k znanju ovu informaciju.

Ovim smo iscrpili Dnevni red.

I podsjećam vijećnike da će se, u povodu 4. aprila. Samo malo sačekajte. Povodu 4. aprila 1992., datuma od posebnog značaja za noviju historiju Tuzle, kada je Skupština Opštine Tuzla donijela odluku o organizaciji i pružanju otpora agresiji na Bosnu i Hercegovinu i Tuzlu, odavanje poštovanja i polaganje vijenaca na spomen obilježja na Slanoj Banji biti 4. aprila u 12,00 sati, potom u 12,45 polaganje vijenca na spomen ploču na zgradu u kojoj je održana sjednica Skupštine Opštine Tuzla a svečana sjednica Gradskog vijeća održat će se u 13,00 sati u Narodnom pozorištu.

Svim vijećnicima i građanima Tuzle i Bosne i Hercegovine, katoličke vjeroispovijesti, želim u svoje ime i u ime vijećnika Gradskog vijeća Tuzla uputiti srdačne čestitke povodom nastupajućeg katoličkog blagdana, Uskrsa.

Takođe svim vijećnicima i građanima Tuzle i Bosne i Hercegovine, pravoslavne vjeroispovijesti, želim u svoje ime i u ime vijećnika Gradskog vijeća Tuzla uputiti srdačne čestitke povodom nastupajućeg pravoslavnog praznika, Vaskrsa i naravno svim vijernicima Islamske vjeroispovijesti želim sretan ramazanski post.(Hvala.)

(S obzirom da je Dnevni red iscrpljen predsjedavajući Gradskog vijeća Tuzla je zaključio 13. redovnu sjednicu Gradskog vijeća u 15:56 sati.)

**STENOGRAM SAČINILA**

**Jasminka Delalić**

**PREDSJEDAVALA**

**Nataša Perić, prof. s.r.**